

北京圖書館 編

北京圖書館藏珍本  
年譜  
叢刊

第 133 册

DUXIU.COM

北京圖書館出版社




□ 北京圖書館 編

北京圖書館藏珍本  
年譜叢刊

北京圖書館出版社

第 133 册



第一三三冊目錄

宮傳楊果勇侯自編年譜卷五	一
思補老人自訂年譜	九
恩福堂年譜	三〇九
厚山府君年譜	五三九

自編年譜卷之五

勦辦蜀夷議

治外夷如風寒在天地拓土開疆先兵防而後  
民實之曰營曰衛葺理邊務猶醫者用藥調和  
營衛所以密腠理也而又羈縻之薄來厚往意  
在卻風寒也然疆土多一尺寸如浪一飲啄不  
免於病光武關以外揖而謝之無法之法最爲  
妙法治內夷如濁穢在臟腑無病時節飲食有  
病時慎醫藥曰表曰裏得其法清自升而濁自  
降也我邊廳營設自嘉慶十三年凡廳屬地方

半皆夷地自十三年以前爲流民盤剝日漸侵  
佔逼夷退處窮山而民猶復侵入西河窮其所  
往以致逼極情急逐殺侵地居民一百餘里出  
雙溪口用兵勦辦後卽雙溪口爲界築大堡城  
緊逼之設通判守備鎮撫設汛弁分防扼要是  
猶臟腑積滯稍解而餘毒未盡卽加補劑轉致  
閉塞不通故三十年來常多仇殺結毒至今一  
旦竊發是前之設汛防邊所謂防夷之路亦如  
防川川壅而潰傷人必多者也且夷處幅幘之  
中旣難揖而謝之又難化夷爲良勤曰野夷是

外彼生成已屬不羈之馬偶爾出掠直同走壙  
之獸勢使然也黔楚苗疆乾隆六十年勦辦後  
撤永綏廳城於花園出苗藪六十里設苗官年  
給賞俸責其管束苗衆與民各守生業迄今安  
於無事峩邊廳城偏處一隅過於逼近夷巢善  
後章程宜改作千總汛防以杜其前量移廳治  
擇地另建城池以續其後移峩眉遊擊與通判  
協同鎮撫控制四面其原設汛防量添兵力加  
團練以共守之蓋團練非不可用民爲家眷繫  
累故人心散而無束耳若使之各按村場市集

併小爲大集零爲總各築各堡歸宿眷口糧食  
先於要隘截山設險阻狹爲塹比鄰聞柳遠鄉  
聞砲一處有警羣起援應分投守禦堅壁清野  
賊至無所擄掠民守家私同於兵守法度寓兵  
於農無需糧餉勝於連營夷旣歸命選良有司  
視民夷爲一體善爲撫字之果三年報最卽予  
題陞更於夷目中擇其忠實者定以年賞如越  
嵩土百戶例卽黔楚苗疆設苗官舊章以示羈  
縻至於現在用兵機宜兩月前赤夷十三支烏  
拋一族勾結涼山野夷因饑羣起出巢焚掠見

初調官兵到來悉行退遯揆其賊計非勢之不  
敵也既已飽其所掠樂得退歸巢穴拒險以待  
觀我動靜兩月以來零星出投彼來此歸意存  
遷延老我師干且有魁西蜚瓜兩支終未出見  
領兵叅遊等因兵單未便深入就勢勾攝亦歷  
來辦理夷案舊章以致日久稽滯究屬含混本  
提督得請添兵四百名前來督辦魁西蜚瓜兩  
支亦聞風來投悉請拿送克夷交送擄去丁口  
審情度勢用兵急攻畏死心一羣從力拒山險  
林密如虎負隅兵連禍結收功無期緩則各求



生路易於收服然夷情狡猾形同脫兔勢難卽  
時同歸須卽餌其歸窟田窟餌其來格或有未  
格滅之是謂鵬勦次於已歸之中察其窮克極  
惡者戮之是謂鋤奸緩急虛實迎機應變出其  
不意攻其不備是謂鎮倒羣克兵法曰攻心爲  
上攻勢次之不得已而後戰三代版圖無巴蜀  
滇黔其地皆夷人居猶之獠狃濁氣未清也秦  
漢以後疆土日闢化濁爲清四川人才代出財  
賦豐裕得山川清淑之氣謂天府之國然有清  
卽有濁有夏卽有夷猶之有晝卽有夜天地自

然之理夏至以後夜長二分清極而濁日長也  
冬至以後晝長二分濁極而清日長也盛世政  
多包荒蓄其濁也季世政多撻剔濾其清也然  
養身之道清濁適宜清氣升而濁穢降自然保  
壽而康百病不生邊外夷情皮膚之疥癬內地  
夷情臟腑之積滯清升則疥癬不生濁降則積  
滯自消頻年以來內外常多夷務咸謂流民浸  
削盤剝構釁止見一面其實遠之日疎未嘗近  
之使親殊失正本清源之道兩年用兵勘得大  
涼山自雲南發脈越金沙江入四川界結龍頭

山其山蜿蜒千數百里至曲曲烏石圈子抵銅河而止爲峩眉山屏障山脊聳拔左右支脚伸屈千壑萬藪喬松虹栢秦人喻終南山曰核桃瓢殆有甚焉山之西南則有越鴛廳屬二十四家以及上下土司熟夷與西番部落由大渡河卽五月渡瀘處直達西昌縣五百餘里運銅驛路魏武謂褒斜棧閣曰五百里天井中行未足擬其險阻而驛路左越大山卽銅河分支阻河則有上官六格敲脚三種熟夷又有西番另種沿河盤踞而河之南岸卽係大梁山右肋野夷

居之又山之西北則有清溪縣屬熟夷峩邊廳屬十二地二十六地屬夷曲曲烏野夷表延千里沿銅河兩岸而居去歲癸巳羣起滋享用兵勦辦一律廓清慎選夷目定以年賞分四季承領輸派夷目各帶通事赴文武衙門供差日給口食年赴省垣叩謁大府以示羈縻年來甚爲安靜近之使親也山之東北另有十三支赤夷亦峩邊廳屬今歲甲午因歲歉出巢掠食廳營兵單力難收束芳隨後親馳軍中夷已見兵先遁一月之間剿其獷悍撫其馴服概照去歲規

畫章程一律辦清尙有山之正東馬邊廳屬生  
熟夷十三支山之東南尙有雷波廳屬生熟夷  
十二支皆蟻附龍頭山左右支脚之羣夷也四  
面州縣環裏曰野夷曰熟夷悉在幅幘之中非  
化外四夷可以揖而謝之者山之中尙有大梁  
山縱橫千里地土膏腴分族而居幸在俗多讎  
殺離而不合合則爲害益烈矣其俗旣如此而  
凡處兩肋支脚之羣夷猶復恃爲退藪自古用  
兵才如諸葛亦止攻心夫攻心卽所以正本清  
源也現在尙須規畫馬邊雷波兩廳夷衆悉如

慎選土百戶例遣官員前往劃一辦理分節各  
夷日割具木刻各保各屬夷衆各保各處要隘  
不准本屬及他夷衆出巢越境滋事是猶臟腑  
積穢暢之使達以免錮閉日深非結卽泄實久  
安長治之道謹條列應辦事宜於左

已辦

一越舊屬沿河上官六格腳敲西番四種夷人  
去歲並未附和滋事且供運兵差極稱恭謹業  
已酌定各准挑充士兵二百名每年給餉銀  
三兩六錢年輪一二名赴省叩謁大府

一越嵩屬屬河外野夷二十三支頻年潛行越河  
赴漢地相縶民人習以爲常去歲雖未附和滋  
事而數次用兵久未馴服去秋順便加兵懲創  
酌定每全頂夷目一名年賞銀十六兩六品夷  
目一名年賞銀二十兩每通事一名年賞銀四  
兩分四季赴寧越營隨兵餉承領逐月輪派夷  
目一名通事一名赴寧越營都司衙門值班每  
名日給口食銀一錢年輪夷目二名通事二名  
赴省叩謁大府

一越鴉廳屬土司嶺如龍之妻所管二十四處土

百戶有松光林在內先經越嶲營叅將唐永清  
輪派赴叅將衙門值班去歲並未附和滋事現  
定按月照常輪派夷目二名通事二名值班各  
日給口食銀一錢年輪一二名赴省叩謁大府  
惟尙未議給年賞不足以昭公允擬請如前例  
一越嶲廳屬上土司嶺登富所管熟夷下土司嶺  
華封所管熟夷去歲出巢滋事剿辦後酌定按  
月輪派夷目一名通事一名赴寧越營都司衙  
門值班各日給口食銀一錢年輪一二名赴省  
叩謁大府惟尙未議及年賞未便任其日久向



隅擬請如前例

以上除辦定章程已籌有經費外惟擬添年  
賞及該班口食暨越嶲叅將年需巡費銀六  
百兩寧越都司年需巡費銀四百兩尙未籌  
定擬請酌籌定爲長例

一大樹堡背瀘水南岸通夷驛路癸巳前任桂提  
督軍其處歿後寶將軍接辦芳於道光十三年  
由陝調川相繼受任一面督兵進剿一面勸民  
輸力築堡示曰夷狼也汝等附山居防狼噬羊  
豕作圈護之防夷傷性命自宜築堡護之現在

百餘戶兩面排居前街百餘丈後戶比櫛爲羊豕作圈四面爲性命作圈一面按戶各築後墻戶戶相連卽可成堡墻外掘土築之墻益高塹益深矣如謂貧富不一築墻一丈抵資百金家有金帛鄰有戢秭按家資除後戶築墻一丈抵百金外餘資按百責捐築墻一丈工價添修堡門堡樓苟富吝貧抗公呈驅逐堡外小戶大家雖難遷就遇變不能不准其入堡半責其資以備不時補砌之費或於要隘築礮拒之不使夷人深入亦無不可民感而樂爲之匝月工成

馬邊廳南八夷巢八十里烟峯汎七十里麥子坪  
六十里涼峯頂六十里天喜五十里夷車河與  
建昌雷波馬邊三交界

雷波廳西八夷巢三十里烏角汎三十里磨石溝  
四十里西疎角三十里石飄飄四十里長河壩  
三十里寒朋嶺四十里大谷堆三十里黃毛崗  
三十里天喜八十里夷車河通大涼山與西昌  
交界

峨眉縣南三十里青龍場四十里楊柳鋪二十里  
龍池二十里大圍三十里新場二十五里沙坪

二十里紅花溪四十里接官坪十里峩眉廳

峩邊廳東南入夷巢二十五里梯子岩左五里黑  
鷄坪胃祖家右十里化林坪胆巴家中十里美  
落村烏拋家美落村三十里蘿卜坪雅札家三  
十里連峩蘿參哈疎家四十里馬處切參鷄疎  
家越大梁入大涼山界

峩邊廳西南入夷巢十五里雙溪口十里大橋地  
十里干溪呆得家二十里熱水白瓦家哈納家  
分支二十里苦竹坪二十里四板橙哈什三家  
二十里石門坎二十里西河哈納家二十里卑

鷄疎家過西河二十里馬家坪媽家三十里扼  
杆白魁家四十里哈雀蜚瓜家五十里沙馬溪  
四十里煮馬坪魁西家一百里聶轟轟山頂與  
越嶲交界通大涼山

沙坪東南沿邊三十里忿溪三十里老鴉溪三十  
里流灘三十里五渡溪三十里岩房四十里慈  
竹坪六十里濫池子三十里柴丁場三十里下  
溪汎四十里馬邊廳

易曰數往者順知來者逆欲知來先求往開天  
闢地乾坤始定日月初生無從追溯大撓於甲  
子紀年可考者黃帝六十一年起迄今四千四  
百七十六年耳不明日月初生何由上測星象  
不明星象何徵休咎以本年冬至前一日七政  
四餘所躔部位逆而推之一千零一十五萬五  
千七百五十六年日月合璧五星聯珠會躔於  
子中虛宿爲始是爲甲子年甲子月甲子日甲  
子時爲祖算順而考之年月與時三百六十六  
紀甲子一週年則康熙二十三年甲子係第一

紀上元甲子月則道光十四年甲午年前冬至  
甲子月係第一紀上元甲子時則道光十九年  
十一月十七日己酉冬至甲子時係第四紀上  
元甲子皆易於入算惟日則閏餘小建歷年已  
久難於入算遵

欽定數理精蘊截至雍正元年癸卯爲祖算至道光  
十九年己亥前一年冬至日甲辰係第四紀上  
元甲子二百二十一數前一日癸卯二百二十  
數其法自癸卯至己亥冬至前一日一百一十  
五年用周天三百六十五度二千四百二十三

分三十四秒四十二微乘之得四萬二千零二  
度八千六百八十五分五十八秒三十微加三  
十七退五十九爲法除零實四萬一千九百八  
十度以大週法三六除之餘二百二十數戊戌  
年四月二十三第一紀上元甲子五月二十四  
第二紀中元甲子七月二十五第三紀下元甲  
子九月二十六日第四紀上元甲子冬至前一  
日癸卯在第四紀上元甲子內自第一紀甲子  
起二百二十數除甲子元七十二丙子元七十  
二戊子元七十二餘四數入庚子元第四局此



太乙之的旨也傳祥麟述

十

天上萬物質映其象地下萬物氣凝其形天動  
動中有靜北辰見之地靜靜中有動升降見之  
太極陽也太極生兩儀先陰而後陽夏至一陰  
生從日入戌起夜長二分地上升二分也升至  
秋分日出卯入酉天地平分再升極於冬至前  
一日日出辰入申陰盈天地三分之二二陽餘其  
一陰極而嚴寒也冬至一陽生自日入申起夜  
短二分地下降二分也降至春分日出卯入酉  
天地各半再降極於夏至前一日日出寅入戌  
陰餘三分之一陽盈其二陽極而酷暑也是以

奇門夏至以後地盤逆布六儀三奇而升而天  
盤之奇儀則當順布而讓以應之冬至以後地  
盤順布六儀三奇而降而天盤之奇儀則當逆  
布而下以臨之至於九星隨奇儀八門入中宮  
寄坤時入中宮借用死門皆的旨也傳祥麟述

兵凶戰危關係國計民生嘗觀戰冊究屬紙上  
談兵自見公聞公訓將卒嘗以錐喻之謂其將  
不堅幹不挺空勞柄力而幹未有不折者兵不  
銳鋒不入空勞幹柄力未有能破敵者幹堅鋒  
銳而柄不知兵妄肆其力徒喪將卒未有能成  
功者三者依爲表裏有一不良國計民生成敗  
攸關因悟古先鋒大將元帥之名蓋由於此命  
帥權在廟堂有推轂禮重其權也選大將選先  
鋒權在元帥善於識人得素著奇功異能置之  
大將先鋒之列自然妥當不得宿將後起不乏

人才聖如帝堯試舜而後用之選其才使之於  
無關成敗之小敵果能見機而作蹈隙而進無  
往不克然後任之爲先鋒任之爲大將夫先鋒  
卽今之奮勇也大將卽今之翼長也立營近則  
促遠則離濠疊難恃未若厚疊鹿角柵爲第一  
旣分任其責何妨分其營使士卒各認其主將  
如身使臂如臂使指分十分之一爲奮勇隊獨  
立如前分十分之二爲翼長隊分立左右接續  
奮勇營爲大營前張兩翼分十之三爲主帥立  
大營接續翼長營成離卦大營後用十之二分

立兩子營爲大營後布兩翼再立後營駐火器  
糧食後餘十之二又立兩小營中實輜重成坎  
卦行則三軍如乾之健處則九營成未濟之象  
俯仰觀之未濟卽旣濟之妙附錄所聞爲用兵  
法傳祥麟述

壘營用土石易摧塌截木排柵征教匪時蜀之  
宿將何袁兩鎮軍爲之亦被賊長筭暗套齊力  
拉倒同歿於陣惟厚疊鹿角柵鈎椿深釘綰定  
叢枝榦內梢外裏疊五七層外高八九尺黔將  
田鎮軍朝貴爲之卽簿暮立營亦必疊足始息

自編年譜卷之五  
一日督兵叠至四鼓皆力乏而寢羣賊潛至拉  
不能拔鑽不能入攀不能上閤營熟睡無一覺  
者迨黎明兵起始蹙礮擊之賊退咿鎮軍曰田  
寨頭謂其攻寨頭洞堡易攻鎮軍鹿角難夫鹿  
角卽拒馬之遺制用以愚敵則先軫破楚桓侯  
退曹用以拒戰則渾瑊撤之而敗吳璘用之而  
勝我

朝平噶爾丹於昭莫多亦拒馬之益故凡與師用砲  
車拒馬利於平行用鹿角叢枝便於山林除結  
營而外砲車拒馬已載陣圖詳說而鹿角叢枝

每戰十兵一柯行則助勢立則拒敵有所憑仗  
軍心自壯敵人怯於攻敵馬怯於馳乘怯力擊  
戰無不克傳祥麟述

問立功曰不在臨時在平時平時喫一大虧天  
於面上畫一大圈喫一小虧畫一小圈是謂獸  
圈圈頻頻求畫惟恐不足畫到其面如麻人眼  
不見天眼見水旱疫癘善劫也天自了之刀兵  
凶劫也身首異處天了恐駭見聞命人了之了  
之者麻面也即使自信面麻或有麻勝我者苟  
冒昧爭先天必抑之非災卽禍是謂二人同功



後起者勝必待天命曰汝其爲之再無麻勝汝者然後出頭功無不立立功後天謂賞浮於功名浮於勞無如別無他麻故將就成全已不十分滿意若更貪天之功矜驕自詡謂非我不成嗚呼殺人一命抵一命萬萬生靈自認兇手不問抵償何待自古大將多不善其後者皆由此

沙文清述

將士問勇公曰閒送少壯老者各三人死脫殼時那能無疾而終與其磨滅床褥不如陣亡疆場穿咽快於喉閉洞胸快於心疼破腹快於腸

癰頭裂快於腦疽赤心力闔忠魂凝結壯乾坤  
之氣爭日月之光不疼不癢莫快於此自然勇  
氣百倍予曾矛穿左臂右膝未嘗痛楚是以知  
之沙文清述

制軍某公倜儻不羈父惡之罄產納粟之鹽大  
使官公無聊謀充藩庫書吏不果往求庶母盜  
父金納粟未入流候補吳會無餘資矣謀派夜  
巡通商者僕啓門入深室拏賭衆驚逸公曰止  
爲此不閉戶何率也燭滅續光索茗一飲而去  
仍囑其閉門恐他吏知次晨有首公賄縱者指  
據確鑿質之公公曰弈也坐告者誣商酬以金  
不受歲杪會金助之議微息公立券納之商焚  
券不責償謀充中丞巡捕司啓請善事中丞太  
夫人太夫人子視之公謀諸相士爲撫藩談休

咎見公假驚立公退撫藩問故相士曰大貴人  
也上中丞一階太夫人知謂中丞曰芝蔴官何  
從而起當爲我與彼加粟納五品職汝爲國作  
育人材亦應爾中丞承母命維謹代納之適供  
巡幸大差謀辦雨具畢臻華美加繫香囊實以職名  
扈從悉知名名以顯其才如此而政績可知也  
官廉訪時總軍旅糧餉賊陷大帥營公破鞘任  
運夫爭取衆樂所有白挺奮隨衝圍而出至關  
隘阻衆謂曰國帑也汝輩名籍載冊懷逃者死  
爲國救帑功也每大元寶一枚酌賞二金百萬

帑無少遺

上嘉之應任方伯中丞制府循聲嘖嘖

上謂清官第一民頌青天無二後接勲戚某公總督  
任某倉卒奉

命撤回八

覲遺累賞虧官帑意在途迎面託周旋恰值長安道  
上會文武大寮同迎路館及八城交謁故左諸  
途順路拜他寮出城去某公莫測其意手書飛  
浼同好務求彌縫公履任三月不問庫款遇便  
運某公留抵奇珍細玩還之不加寸贖一日方

伯請點庫項公曰足乎方伯曰足如例點視果  
足公曰十數萬帑若受面託我之責也諸公未  
必踴躍卽使勉強彌補無非挪移我之咎也故  
違之使彼自求諸公耳以彼聲威一紙書賢於  
十萬師遠矣日理公牘無冬夏黎明登二堂始  
啓宅門出八雜役稍露詭密一搜破弊見屬吏  
於堂左璃窻四顧無障蔽退食終日危坐二堂  
閉門後公牘隨時投鈿陸續手拆分交各幕簿  
暮逐處畫稿討論日間事日清日案堂左右隙  
垣手植瓜菜熟惠知好曰自圃者教民儉有吃

飯不如嗑粥強三日餘出一日糧之句衣不贅  
華食不重味性嗜菽汁人呼曰某豆花傅祥麟

述

幼聞老卒云曾侍泰贊某左右出征邊寇初將  
軍泰贊分道進擊將軍陷於陣泰贊已深入聞  
信一面捲撤一面奏明收集敗軍申明滅此朝  
食掃穴犁庭

廟堂嘉其志使佩將軍印某請兵足五萬籌餉足六  
年奉

嚴旨切責申奏如前并陳非此不可狀

批回捧閱無他諭惟硃書該殺該殺盡餘紙未復大  
書總總該殺仍堅陳如前及遞回奏章捧匣啓

視但



御手撕成字花無一完全筆畫喜曰

恩允矣果五年檢渠

廟獻拓土千餘里置五大營鎮撫之封公拜相當其  
時非瞻識堅請在先因循承命即使先二三年  
奏勅亦必頻催嚴督擾煩宵旰甚矣唯唯諾諾  
豈事君致身之道哉故詩曰無然泄泄沙文清  
述

事老親勤求餓飽轉致傷脾杜門塞窻轉致傷  
風貧苦使聞憂愁勞神暴棄使知驚惱傷氣頻  
請策畫思慮勞神斲喪致病垂憐傷心非養親  
之道承湛述

事老母坤道也從一而終事老父乾道也一生  
二二生三三生萬物不幸老父而鰥食色性也  
性靜者鰥還靜基性動者鰥激動災一陰一陽  
之謂道萬物不生於老陽老陰而生於少陽少  
陰不生於少陽之巽而生於少陽之坎不生於  
少陰之震而生於少陰之離萬物生於坎離然

乾巽體出陽儀其原同乾爲老陽巽爲少女七十非人不暖請納小星最益老年還其原也有出溥同氣之友愛無出效結草之故轍孝豈有勝於此乎是亦養志之一道承湛述

幹功立業自當不爲家爲清吏可爲不可爲後嗣飄泊悉非得中之道功成自然業就一子節祿三千年利三百足資溫飽賢者不哭不笑不肖者一笑而竭多則不肖者必笑賢者亦不免於笑終於一笑而已矣承湛述

卜居於古無烽燧之鄉卜葬於不近三邊之處

河邊城邊田邊也營室遜公祖及廟宇之堂塾  
師延盛德君子勿兼他人子弟澣勿傭婦厨勿  
雇役女教識字勿看閒書兒習時藝勿驚博雅  
十口之家以千五百金置田除資糊口餘作家  
用另以千五百金賤時貴糴貴時賤糶備作外  
費婚喪致定禮宴會約五簋貧富如一人已無  
嫌常客酒不過五巡葷用兩脩庶幾不笑不哭  
姪承湛述

守墻垣大門倉廩須人力與其雇工閒用未若  
使耕兩資其力雇工五人自耕五百挑穀以一

人養牛六隻一人充灑掃雜差兩人樵汲一人  
拾糞農忙添雇帮工農隙各執其事拾糞於剎  
平旁坡一糞二土叅合堆積待至來夏土糞相  
融掬土分秧插入泥底勝於他物姪承湛述

叔父曰漢文帝惜百金臺費曰中人之產自係  
二千年前食賤用儉依然上古之風今則生齒  
日繁食費用奢卽養兵論之守餉日銀三分三  
釐糧一升資一身之食用而已挑戰加銀五錢  
挑騎加銀五錢隱示力圖上進受室立家原其  
定制有深意焉士卒中竟有籍充字識取資守

兵糧餉公餘發奮讀書由科甲而騰達者不乏其人智而勤也亦有僅資守兵糧餉受室生子男婚女嫁終其身雖未發達亦未嘗凍餒愚而勤且儉也處家之道勿謂百金爲少勿以三千金爲多在於勤與不勤儉與不儉耳卽三千金而論分半置田年收籽粒祇資十口食用分半賤糴貴糶取息應酬慶弔餘備婚喪節資其費如浮養閒人過十口以上卽不浪費不出數年則三千之家以次消折甚矣甯與人一斗不養人一口大可畏也計口度日如家有二十口必

須六千金仍如其法置田三千糴糶三千田息  
作家常食用立一內記糶息作應酬雜費立一  
外記量入爲出日求苟合其額月求苟完其制  
年求苟美其餘美益加美子傳孫孫傳子爲居  
室定制孳孳言糶言糶利權在己放債取息利  
權在人賤糶貴糶易買易賣不事營謀利已利  
人姪承湛述

婚嫁宴客兩人執一席先使飽餐各司器皿各  
進饌各撤筵各歸各所所不拐灣餉無他耗客  
退責成總管點交司厨節長補短費半豐倍至

於酬吊同厨分餚一味兩釜一釜兩人分任意  
餚分案實蓋兩人抬盒逐案取餚入席宴罷收  
蓋歸案餘餚仍入原釜司食司茶兩人共執一  
席器皿各歸各處燭則通計燈籠酌定照處一  
堂若干枝自昏至亥全給之至亥自丑至黎明  
減半兩次給之酒則折歸另盃澄清再用庶無  
浪費承湛述



無論窩鉗乳突元氣如鴻濛浮含水面厝棺於元氣之內上不干天下不墜淵剛在太極暈中享其渾融是爲的穴即使稍偏左右猶近鴻濛餘潤若過低人謂脫氣非也墜淵也掘地及泉鑿穿內暈亦同於墜淵固不可苟過高則出濛人謂鬥殺亦非也干天也浮脫潤澤何益乎我望雲巖生基嫌其點穴畧高懷疑三年未敢憑虛自決己亥十月初八五鼓櫛沐瞑坐恍若神告曰生基灰線必須下三尺五寸覺來著之得頤之噬嗑夫頤養其遺骸也大吉之至試減五

寸著之得同人之妬與濛妬猶未享其渾融也  
試加五寸著之得師之損與泉戰而損也囓吾  
兒將來藏我殼必移下三尺五寸勿遺我九泉  
恨

自編年譜卷之五

南海傅祥麟校刊

官傳誠村楊侯自編年譜序

官傳誠村楊侯天下奇男子也其才奇其遇奇  
遇而不遇不遇而終乃大遇則益奇才以勇而  
不僅一勇將才以智而不僅一智將智勇皆不  
得而名則尤奇然而天非以奇才私侯也又非  
以奇遇徒富貴侯也有奇變斯有奇才有奇才  
斯有奇遇有奇遇斯有奇功蓋觀於侯之自編  
年譜而天運乘除往復之數人事虧盈倚伏之  
幾我

國家功德之醜厚威畧之宏遠與夫文武臣工之

效命中外民氣之固結所以鞏億萬年太平無  
疆之祚者胥於是乎見焉我

朝自開國以來

聖

聖相承仁漸義摩寰海禔福至於

純皇臨御六十年同符

聖祖文謨武烈邕垓沂埏蓋寓縣殷阜極矣物眾地大  
自有乙卯黔楚苗變之事侯自投筆從戎隻身  
探虎穴時年未壯也而已計安桑梓手翦鯨鯢  
未幾而白蓮教匪又起始也萌孽於楚旣乃蔓

延秦蜀聚衆至逾百萬頭目無慮數十輩幾與漢之黃巾唐之黃巢明之流寇等而皆以次削平不與前代同其禍則

廟謨制勝師武臣克殫其力也當是時

睿廟方親政銳意滅賊督責諸將帥

嚴旨一日數下徵兵飛輓徧海內主兵者爲經畧額侯而忠武楊侯爲之翼侯於征苗時已重爲兩侯所器至是出奇決勝謀戰罔不資之遂由偏裨躋專闔以余所聞兩侯沉毅雄勁殆天生戡亂才而侯意思安閒智畧輻輳天實生以爲兩侯

副今觀譜中所紀戰功最著者如兩面設伏前後夾擊則有黃土場之戰以少勝衆則有小廟口之戰縱而後擒則有遂風寨之戰取勢則有石筭河之戰兜擊則有人頭堰之戰備預則有大安漕之戰百里趨利並力收功則有雲台鋪之戰卽倉卒臨敵如平井鋪庫谷口之戰亦布置嚴密無寸隙兩侯之力何莫非侯之力而首尾十載危苦萬狀中間額侯以稽遲落帥權又馭下過嚴厲諸將紛紛引避而侯與忠武獨心識其苦忠謂平賊必斯人相與擁持不肯去訖

以成功然則侯蓋有大過人者而豈徒敢戰深入臨危制變之足多也哉抑余又聞之賊始起特爲會軍逮其轉戰積年機變百出遂爲勁敵額侯乃堅壁清野以餒之又日夜窮追不使稍憊賊乃技窮至遁入南山則皆百戰而僅存者較其精悍何止一以當千而搜捕餘匪侯獨以身當之瀕死者數矣猶疊被

嚴綸僅乃蕝事於虜何其難也迨夫寧陝新兵之變侯以單騎入萬賊中陽開陰闔倏弭忽驚侯亦岌岌莫必其命終賴夙昔威惠入人之深不折寸



筮俯首就絡而格於例議萬里荷戈危疑震撼  
之交絕無幾微見於顏面此其所養又何如哉  
卒以忠悃上孚積勞莫掩特邀

帝鑒洊復崇階於是又有滑臺之捷南山之捷

今上六年逆回張格爾盜邊張故霍集占逆裔也久  
蓄驟逞邊塵四驚時侯駐節固原而忠武督陝  
甘而聞警並馳直度大漠三戰三捷遂復喀城  
收和闐廓清諸部而張逆逸界外不可蹤跡侯  
乃設間誘之來七年除夕追至鐵蓋山竟俘以

歸捷奏入

帝曰都哉天畀朕良將子其大賚汝於是列爵通侯  
晉銜官傅圖形

制贊

錫宴

賜詩蔭子延世之榮玉馬袞黼之賁

寵光赫奕焜耀無前而侯年已六十矣當其投筆從  
戎時豈意及此惟才奇故遇奇功更奇然而侯  
不自謂奇也侯至性天植敦篤倫紀尤拳拳於  
師友年譜之作蓋爲兩侯紀勞績垂示方來使  
知累代所不能定者兩侯克定之非以自鳴功

伐而於未弁下卒之有寸庸片技者雖微不遺  
至爲主將孫都司挺身代死又爲忠武請復翼  
長義氣激勃抗辭不撓尤其犖犖大者侯嘗言  
我本不才天以我心癡耐苦置之多事之區俾  
了此劫天爲蒼生不爲才也是以篤於誼而厚  
於仁蓋所性得之故運之以智而無智名達之  
以勇而無勇名用能出入死生夷險一節爲

兩朝建不世之勲侯卽不自奇天下則競奇之矣而  
又烏平測之哉於虜茲其所以爲天下奇男子  
也道光十九年八月二十七日善化賀長齡跋

讀自編年譜述畧

文清後公三十年生甫離襁褓卽聞父老勗子  
弟謂公年二十居父喪三年不茹葷酒事母孝  
友于兄弟苗變圍城兩匝月當事縮手公畫策  
禦之勘定苗疆繼征教匪出師六載厯官鎮終  
南山止自行間年甫三十二歲人競艷之道光  
丙戌試禮闈遇安徽孝廉包慎伯名下士也備  
述曾入公幕携辦盜伐

東陵儀樹巨案馬蘭鎮內務府大臣新舊任

欽差統領二悉推公一意葺理一手秉筆前後十一

奏

上嘉之渠目擊調停寅好遣緝盜賊清釐界址條議  
章程深謀遠慮無不盡善終是役彼未嘗與一  
謀叅一議凡留侯武侯誠意伯所知者公皆知  
之頌爲天人更道喆嗣穎悟有大過人者旣晤  
鐵葦公子得公著作讀之益知功名根於孝友  
起於危難成於膽畧守如澹定心儀久之己亥  
於黔安始見公公年七十矣燕頷虎額鶴髮童  
顏面著斑痣七點目光四射眉長寸許髯飄飄  
若仙事無鐘細經耳目歷久罔或遺息於亥起

於寅百日之間公餘成平平續錄二萬餘言  
書千文全帙徑二尺許付梓燈下與友人書蠅  
頭小楷畢肖山陰更復酬應求書者日揮百紙  
無倦容筆墨外無玩好物居恆汲水而饋迎風  
而居食不求甘衣不求美謂名利無兼收理達  
如是窮如是不爲家爲風度端凝喜怒不形於  
色誘掖後進若恐不逮談理通達無礙救正人  
心聽者潛移默化撫將卒如家人父子時勉忠  
孝述及

君親恩未嘗不涕零也存神養氣顧惜精力志圖報

効躍騎左右超距長於技擊教勇力授外功十  
二式教弓矢作論射二十則所著壽世醫竅全  
形保生方三元透易青囊衍易制菘精選制菘  
別選風樹悲吟心經解行坐功圖三式入門濟  
世利人用心良苦出自編年譜六萬餘言使校  
字知

太夫人抱恙十四載勉強精神待公卸甲

聖天子賞復三品銜捧輿秦粵遂公斑衣癸酉重九  
前當滑城告變之日適公服闋之期甫脫素冠  
卽換征裝家國勤勞精誠感格天全忠孝兩無

關隙一節一行皆足爲後世法卽力議回疆南路四城棄不如守一奏侃侃千五百餘言獨斷敢言

上是之較萊公邀契丹獻幽薊之地畫百年無事之策其君臣相遇爲何如哉蜀夷巢穴公比之狼窩狼噬物作圈護之噬人當作堡護之近窩居民周而二千餘里獎勵民力築堡自衛不費公帑堡成較勝連營壁堅野自清夷無所掠自然安靜行於大樹堡諸處有成效矣卒未果行識者惜之經史子集了了胸中人莫窺其涯際每



有心得援筆卽書公意平鋪直叙而已其實斬盡枝葉不經不子自成一家前後平平錄八萬餘言絕不剿古義襲陳言笑曰古人卽當日之今人今人卽後世之古人典墳以前無典墳患不典墳耳他若銘誄傳誌律詩時菀皆大手筆脫稿輒焚謂棺不蓋論不定晚節末路果善其後而子孫賢自有修飾而哀集之者李杜文章不知積稿凡幾傳者百不及一存之徒貽笑柄其謝

賜壽云天所助者順也臣何力之有焉弔岳忠武云

殺身心不痛心痛敵未滅題阜蘭望河樓云天上來題劍閣云高而不危偶摘古語亦剪裁精當皆其餘技也譜中或載或未載菘林爭頌之人知公之戰功遇額忠毅公楊忠武侯而後建豐功膺

異數後先比美不知用兵如錐鋒不銳不利幹不堅不挺柄不力不入公任其鋒忠武任其幹忠毅任其柄相依而成更成於

廟謨鴻遠專其任且久始成奇勳且公未遇二公以前苗變倉皇策謀響應激發衆志保障危城既遇

二公以後獨當一面肅清終南單騎收降一力  
擒渠滅賊司寨火攻滑臺奪陷陣之機入虎狼  
之穴忍戍邊之屈讓破城之功奪人所不及奪  
人所不敢入忍人所不能忍讓人所不肯讓  
賀耦耕中丞曰奇男子信哉桑植沙文清謹述

宮傳誠村先生通侯麾下猥承不棄以

尊著自編年譜誣諉校訂旬日以來寢饋於斯如讀史漢列傳與傅介子趙充國班定遠一流人上下議論又如身在行間親覩淮陰鉅鹿之戰兩軍從壁上觀汗流股慄震駭莫可言狀至於家庭瑣屑身世艱難將母望兄感懷傷逝仁孝之心藹然紙上尤令人欷歔感泣涕下縷縷而不可已若夫叙事之妙則又合左國馬班爲一手有目者皆知之復何庸贊一詞惟是三十年前卽聞

賢侯大名虛懷下士尤喜人譏彈文字嘗以不  
得一見爲恨今天假之緣老獲託處

麾下又承諄諄下採若以

顯鶴

爲稍能辨菽麥

者而誘之使言深懼舛陋無以塞盛意謹就管  
見所及畧陳一二惟

執事察之年譜之作與史事相表裏言之不可  
不詳而擇之不可不慎惟詳且慎乃可信今傳  
後

尊譜年經月緯條系事件亦旣詳且盡矣而其  
中竊有疑而未安者三一日世系古人作書必

有自叙以明得姓受氏之由蓋自子長孟堅而  
下皆然而年譜尤其著者案譜楊氏出漢太尉  
伯起公後至唐懿宗時再思公生由淮南丞遷  
辰州長史結營飛山與李克用同受昭宗絹紹  
徵兵衆奉爲誠州刺史稱合公今考合公爲楊  
業之稱宋史楊業本傳業并州太原人在邊防  
二十年契丹憚之六子皆貴顯官供奉殿直延  
昭尤驍勇善戰昭子文廣爲廣西鈐轄知宜邕  
二州英宗曰文廣名將後且有功擢成州團練  
使世稱楊氏世將又宋史南蠻傳誠徽唐谿峒

州宋初楊氏居之號十峒首領以其族姓散掌  
州峒太平興國四年首領楊蘊始來內附八年  
楊通寶始入貢命爲誠州刺史淳化二年其刺  
史楊政巖復來貢是歲政巖卒以其子通塏繼  
知州事熙寧八年有楊光寶者率其族姓二十  
二州峒歸附詔以光寶爲右班殿直繼有楊昌  
銜者亦願罷進奉出租賦爲漢民詔補爲右班  
殿直子姓十八人補授有差獨光僭不從未幾  
亦降乃與其子曰儼請於其側建學舍求名士  
教子孫詔潭州長史朴成爲徽誠等州教授授

光僭爲皇城使以誠州刺史致仕官爲建宅置  
飛山一帶道路巡檢未及拜而卒遂其贈之錄  
其子六人又乾道十四年成忠郎充武岡都軍  
巡檢谿峒首領楊進京備方物求貢十五年楊  
進禹復求人貢皆誠徽州諸楊也時稱楊氏世  
勲與太原之楊判然兩族後人因其姓同其時  
同其官同其所官之地又畧同稗官野乘混而  
一之流俗譌傳又以令公威名甚著誠州刺史  
爲楊氏世職因以加之再思公耳非再思公必  
刺誠州號令公也至云五代時民遭塗炭獨公



奉唐正朔保障滇黔民賴以安此則據家譜可  
以破宋史楊承磊族人以地附楚之謬何以言  
之梁之稔惡極矣天下惡之唐祚雖絕當時列  
鎮猶有用天祐紀年以號召其國者獨馬殷父  
子甘心臣附會謂楊氏之強再思公之賢而肯  
以其地附不恥臣梁之馬氏平况楊氏入宋後  
承平已久江南諸國相繼入版圖始率其族人  
獻土地則當日據有二十二州之地力能固楚  
不汲汲於附楚也明甚是則家譜之可信者

宋惟

史獻土在太平興國四年家譜作開寶八年爲不同耳

須畧爲辨駁以宋

史雖蕪雜要係官書不可不辨此其宜更正者  
一也一曰稱謂父前子名君前臣名朋友相謂  
以字或以官或以爵其尊且顯者則加公以別  
之又古人稱謂非三公不公自來名人文集有  
於其祖父亦稱君者至後世文人之習每人必  
有一號其稱某官某地亦然如總督必曰制軍  
巡撫必曰中丞近鄞人全謝山祖望力辯近日  
稱中丞之非譜中所紀多軍前章奏臚句之文

### 嚴旨

緼綸皆敬謹編入準以君前臣名之義與史法同一

切皆宜稱名又 本朝文章稱某公某上姓施下名

之漢人則可施之滿人則於文不順近日名人

集中於滿洲大老上書某官爵諡下書某某公

如文成阿桂公文似尙可從如以為太直則大

書其官爵諡有諡者書諡無則書其官爵而以其名旁注於

下亦或可繁文叠見有宜稱上一字以別之者

如德侯德於文法猶順獨不可稱上一字為某

公下兩字為某某也若同輩則直稱名為是又

近人於師門稱夫子似亦非古古人家臣仕於

私門則稱夫子以官稱以爵稱非師之也夫子

欲之此冉有稱季氏於其師前之詞當時聖門  
中亦稱其師爲夫子者竊以爲大聖曾仕於魯  
爲司寇故以其官稱之非謂稱師之必宜夫子  
也執事譜中所師事者有三鄙意以爲不如稱  
師之爲當如稱松筠公爲湘浦師  
那文毅爲繹堂師之類又古稱伯叔  
父爲諸父其疏遠爲族父如詩云速我諸父書  
云王曰伯父叔父是也漢疏廣傳臣父子出國  
門馬援兄子上書亦云臣父子此等稱謂漢世  
猶爲近古若伯仲叔季次第之稱施之兄弟則  
可施之諸父則不可執事旣叔事忠武則宜稱

族父稱時齋叔簡文也重言之不得不爾初見

譜中正宜以叔父稱之耳堂叔宜稱從祖父或

疑其太古則稱從叔父亦可若堂叔則俗稱也

不可入文他若文生文孝廉如縣學生員廩膳生員某科舉人之

類及州縣建立在後者皆宜從本稱如松桃廳秀山縣之

類此其當更正者二也一日間文詩刺謔浪禮

戒游詞昌黎大儒好為滑稽無實之語習之作

書詆之退之雖護前亦不能拒也然世傳昌黎

好諧亦不過毛穎傳送窮文之類偶爾游戲未

嘗施之於平淮西碑大文也

執事年譜所紀皆軍國大政煌煌

廟謨

神算所著蒞師武臣勝負得失所關邊庭萬里腹裏內地沙漠窮黎閭閻赤子疾苦性命所繫懸之

國門上之史館一字不易千金難購宜何如鄭

重竊以篇中一切詆諧謔語

如初次出關與熊遊擊王守備語奏

凱人關與忠武丙

皆可從節不宜留之爲後人

口實如謂一時情事不能遽割則

執事著述等身何惜另編一卷存之如左傳之

有國語文人之有外集不猶愈乎此其當更正

者三也至於文案俚言俗字

如爬作排準作當  
准乾作乾之類

一一改正

執事幼讀有用書肆志經史及古襍家言爲文  
浩瀚無涯渙已復棄去弱冠從戎逮壯專閫身  
歷行間五十年大小數百戰爲

國家削平禍亂中復提一旅走萬里立功塞外挈  
已潰之殘彘歸之

天子身畫凌烟功銘鍾鼎復何暇與文人較量字句

况顯鶴

學殖荒落識見迂淺又何能窺測

殊勲偉績於萬一詩不云平詢於芻蕘如以爲

可採卽以顯鶴是書附存譜末聊當跋語則

執事之功大心小不遺一善與顯鶴之庸陋無

狀得上交

賢者不避盡言之嫌皆有本末可告天下後世  
又不僅如昌黎所云得附三王之末有餘榮焉  
者矣不宣

道光二十年孟夏月新化鄧顯鶴百拜謹上



自編年譜卷之五

三

書楊侯自編年譜後

編年紀事國史也年譜則編一人所歷之年紀  
一生所行之事耳求其關國大計可垂典則與  
國史相表裏爲後世法若陶士行郭子儀者亦  
僅矣宋之韓范人傑也西夏之征固稱赫奕然  
究未能平元昊以武畧顯讀史者爲宋惜焉侯  
以雄才大畧歷事

三朝建樹奇勳別歷中外何其盛歟後之讀年譜者  
觀所以禦苗變則睢陽常山不難守也觀所以  
清教匪則黃巾黃巢不難撲也觀所以靖流賊

則自成獻忠不足平也觀所以捨逆渠則匈奴  
單于不足滅也侯嘗曰不死心了必死事以死  
心幹不死功是又在得侯之心而師侯之法乃  
可以建侯之偉績豈偶然哉益陽拔貢生蔡用

錫謹書

官傳誠村楊果勇侯自編年譜跋

憶自束髮受書見夫史傳所載如漢之諸葛武侯唐之郭汾陽宋之范文正公明之王文成公常掩卷太息恨不生當其際或得近隸左右親聆指授庶幾得以有成未嘗不低徊久之及長遊於江淮京洛齊魯吳楚之間所見終鮮其人迨己亥之冬謁

侯於武陵節署乃若夙昔所願欲而不得見者恍然遇之又得盡讀其所著述若道源輔教諸編闡河洛之苞符明善博約諸編闡理學之實

竅經權審機諸編籌軍國之遠謨叙羹保生諸  
編鑄倫物之寶鑑凡十二卷存神養性則有河  
洛要言一卷滌念洗心則有惕慮要言一卷以  
教士文則有制義別選名文精選四卷以教武  
士則有陣圖詳說易筋外功圖論射三卷衛民  
之生則著壽世醫竅五症明辨全形保生方四  
卷計民之藏則著三元透易青囊衍易七卷永  
懷孝思則著風樹悲吟一卷欲人壽考則著陳  
希夷行功坐功圖一卷或顯言之或隱言之或  
正言之或喻言之或精言之或淺言之在在無

不以濟民利物爲心於是默識

侯之德暢聆

侯之言竊欲詳聞

侯之功屢請不已而

侯乃慨然曰雖有微勞何功之足云哉第念生平遭逢

聖主獲展寸長得以隨諸大帥經歷戰陣五十年其間奇正之師縱擒之法夷險之境疾徐之機各大帥之豐功偉績可爲後世法者而於

君上之恩雙親之慈師傅之德兄長之愛朋友之誼

內助之賢常耿耿於中而不能釋嘗慮述之他  
日不如自述之詳乃出其自編年譜四卷授  
讀之捧誦百遍夫乃知

聖天子之知人善任超邁唐虞而

國家景運之隆薄海民心之固與夫將帥之運籌  
士卒之用命卽至叛夫悍卒莫不感恩戴德革  
面洗心我

朝之駿畧鴻規度越前古矣爰請於

侯授之剗剗俾天下之士咸得廣其見聞天下  
之讀其書者亦得因其意中之言悟其言外之

旨觀其言如見其心聞其功而知其德而於  
侯之天資純粹平易近人不矜不伐之衷不怨  
不尤之學不援不陵之素不憂不懼之懷皆可  
想見之矣心儀其人殆與王文成公諸人可方  
駕而並軌焉若

侯者庶幾無愧於立德立功立言之三不朽哉  
道光二十年庚子十月南海傳祥麟謹跋



--	--	--	--	--	--	--	--	--	--

附錄侯來書

廿前得手書承吾弟雅惠索兄自叙年譜代災

梨棗私心感激欲涕兄老矣所以自叙生平遭

遇之故特爲

君恩親慈師德兄愛友誼妻賢全我倫常感非恆泛

且所經戰陣如三省教匪等於黃巾黃巢李闖

前代無剿辦長法我

朝有戡定良規惜攻謀出於武將手叙事由於文

人筆只圖采烈鋪張轉掩精神命脈而且奏案

屢牘斷難彙融一心往古將才多鉤鎔於左傳

可師可法者數十戰而已左傳之所以能鉤鏘  
將才者極叙當日用兵之實際所以能極叙實  
際者古皆大司馬主兵一手記載不似後世戰  
出武功叙資文筆種種感戴心叙事心垂法心  
加之先輩有傳傳不盡真有譜譜不盡實爲其  
傳出於後代譜出於後嗣迥非其人本來面目  
炫煌太過欺天欺人挂一漏萬昧君昧親與其  
歉仄於死後未若詳記於生前然叙則叙矣應  
俟蓋棺論定果善其後庶無忝於生平若有未  
善徒貽笑柄是以藏稿十二年非真知已未嘗

輕洩乃承過愛情殷意美原不敢公然付梓又  
不忍輕率負情吁此譜刻成萬一白之人間兄  
現雖年逾古稀自覺精力未憊多活一日多操  
心一日行百里者半九十里九十里後日暮矣  
腹朽矣力疲矣十里艱辛苦逾九十趨步天亮  
溺坑夜長夢多吾弟此舉固爲見兄之長竟是  
逼兄之短雖屬逼兄之短正係規兄之長今而  
後敢不益加惕慮至易席而止旬餘以來思徹  
先後幾廢寢食故而遲於作答昨宵清思待旦  
惟有至懇吾弟刻竟刷存一部寄兄一部手封

原板或存台處或寄兄處直待兄壽終正寢日

或馬革裹歸日再展手封使小兒泣覽盛舉永

泐生生世世 道光庚子處暑日

愚兄楊芳時年七十有一沐手敬書

傅祥麟敬錄



尺五歲豐四年四月二十一日內閣奉



臣諭子告大學士潘世恩立品端方學問醇正由乾隆

癸丑科一甲一名進士授職修撰自翰林洊擢正卿

皇考宣宗成皇帝深加倚畀超登揆席簡任綸扉總理部務

入直上書房夙夜宣勤

特命肩輿入直晉加太傅

賞戴花翎並

賞用紫韁

賞穿黃馬褂

恩眷益隆服官五十餘年小心謹慎克稱厥職道光二十九年因腰脅作痛懇請開缺疊蒙

恩諭慰畱朕卽位後因其年逾八袞寬予假期俾得從容調養嗣因陳懇肫切勉從所請准其致仕並賞食全俸又因重與鹿鳴恩榮筵宴疊加賞賚用昭篤眷方冀長承恩澤永享遐齡茲聞溘逝悼惜實深著加恩賞給陀羅經被派怡親王載垣帶領侍衛十員卽日前

往奠醑並著入祀賢良祠任內一切處分悉予開復  
應得卹典該衙門察例具奏伊孫國子監學錄潘祖  
同著賞給進士准其一體殿試翰林院編修潘祖蔭  
著以翰林院侍讀候補監生潘祖保著賞給舉人准  
其一體會試用示朕軫念耆臣之至意欽此



				<p>         一、          二、          三、          四、          五、          六、          七、          八、          九、          十、       </p>	<p>         一、          二、          三、          四、          五、          六、          七、          八、          九、          十、       </p>	<p>         一、          二、          三、          四、          五、          六、          七、          八、          九、          十、       </p>	<p>         一、          二、          三、          四、          五、          六、          七、          八、          九、          十、       </p>	<p>         一、          二、          三、          四、          五、          六、          七、          八、          九、          十、       </p>
--	--	--	--	---	---	---	---	---

諭賜祭文

朕惟國家輔弼之材畱自

先朝者彌重者碩典型之望繫於朕念者尤深悵凋謝於老  
成用愴懷於疇昔爾太傅予告大學士潘世恩立品端  
方學問醇正冠羣英於早歲宅百揆於耆年徧歷清華  
洊躋顯要九卿任其七六部領其全四典春闈三司秋  
賦蓬島特崇領袖樞廷久筦絲綸登第閱三十一科服  
官更五十餘載宋李沆之入相不事更張漢諸葛之立

朝惟聞謹慎緬後先而媲美更遭際之獨隆朕昔在三  
天曾資模楷迨登大寶益望贊襄重違引退之誠莫遂  
慰畱之願懸車遽許詔精全支旣而再與賓興重開聞  
喜恩施疊沛喜人瑞以允孚存問時殷冀期頤之克享  
茲聞溘逝軫惜良深經被飾終禮筵致奠崇祠載祀內  
帑仍頒易名肖厥生平延賞隆於後嗣於戲論當代三  
公之選聞望式崇是

先皇一德之臣恩榮宜厚尙其來格妥此苾芬

諭賜碑文

朕維酬庸典渥嘉懋績於耆臣求舊情殷重

先朝之碩輔念老成而頓邈塵忠盡以長畱爾太傅予告大學士潘世恩品勵端方學臻醇正始翱翔於上第旋游陟於卿僚任鈞衡而望蔚師儒贊密勿而班躋保傅頻持玉尺綜華實以掄材早領瓊林冠蓬瀛而樹範被服煥中央之色翠羽聯輝安輿邀異數之加紫絲耀采崇資廿四考勤勞徧厯六官敬事五十年謹慎常如一日

膺

皇考簡孚之篤乞退居而屢荷

慰畱際朕躬親政之初予休假而仍期承弼嗣以陳情之肫  
懇俾解朝纓再叨錫宴之光榮疊褒人瑞方冀長霑祿  
養備顧問於昇平何圖遽告淪徂覽遺章而軫悼賜之  
經綈特耐賢良諡以文恭聿昭風度於戲我國家榮哀  
恩禮飾終高馬鬣之封爾後嗣爵秩科名延賞賁龍綸  
之寵式彰嘉命視此穹碑

諭賜入祀賢良祠祭文

朕惟鈞衡輔治緬懷耆舊之臣俎豆酬庸懋舉馨香之  
典雕筵式啓鳳綽爰申爾太傅予告大學士潘世恩植  
品端方矢忱篤斐冠羣英於蕊榜厯清秩於蓬山洵陟  
卿階超登揆席直樞廷而襄贊機務允諧統芸署以對  
揚仙班是領頻持使節輜軒遠莅於大邦壘掌文衡模  
楷尤嚴於吉士效論思於講幄並勤史冊之編摩示褒  
寵以宮銜更作師資之表率策騎而昇輿加錫飾冠則

儀羽榮影晉太傅以優崇步禁廷而扶掖賜褶叶黃裳  
之吉引纒分紫綬之輝洎允懸車仍優詔精延鶴算而  
厚膺第祿渥龍光而重宴春秋誼表靖共恩推似續方  
謂優游歲月戀闕長殷何期凋謝典型奠觴深悼經被  
聿昭夫隆禮文孫並荷夫殊施永令問以易名茂彝章  
而秩祀於戲旂常紀伐睠懷遺範以云遙芬苾流馨庶  
爰明禋而用享英靈來格寵命欽承

予告太傅大學士臣潘世恩跪

奏爲

天恩未報福薄災生伏枕哀鳴仰祈

聖鑒事竊臣以一介庸愚渥荷

四朝知遇早登上第游陟

綸扉服官五十餘年毫無報稱

皇上龍飛踐阼

恩予致仕支食全俸嗣以重與鹿鳴恩榮筵宴仰沐



寵褒稠疊

延賞子孫五載以來時叨

眷注凡

大造生成所獨厚非

微臣

寤寐所敢期

臣

雖解組閒居

而依戀

闕廷尚冀勉攝頽齡長享

昇平之福詎本月上旬以後舊疾漸增精神日散藥

餌罔效牀蓐纏綿自揣萬無生理伏念我

國家重熙累洽

皇上下惕朝乾長治久安萬年有道惟是近年寇氛未戢以至民生日蹙帑藏日虧伏願

皇上核功罪以馭將帥慎出入以裕度支重封疆以撫黎元舉賢能以襄治理則時艱可弭民氣可甦抑臣又聞至人之用心如鏡不凝滯於既往不將迎於未來逮乎物至順應則妍媸畢照慶賞刑威一視其人之自取而已無與焉是以喜怒不形而精

神常固此則

宸修藏密尤爲臨民敷治之原

臣

神瞽氣浮語盡音竭

敷陳冒昧銜結靡涯惟有訓囑臣子臣孫恪勤供

職清慎讀書以圖報效

國恩勉繼

微臣

未竟之志

臣

無任瞻戀哽咽伏乞

皇上聖鑒謹

奏

年譜

思補老人手訂

乾隆三十四年己丑十二月二十一日卯時生

時我父光祿公

公諱奕基字汝勤號雲浦杭州府錢塘縣附貢生商籍後改歸

吳縣

四庫全書館議

敘州同知祁篤藻注

業儒家居

黃太夫人

太夫

人江西雩都縣知縣諱士欽西樵公女祁篤藻注

生子於馬醫科里第將

誕前夕先大父貢湖公

公諱冕候選布政司理問祁篤藻注夢一

麒麟墮地化爲嬰兒既覺聞呱呱聲訊之曰男也

名之曰世輔小字曰麟是歲世父榕皋公

諱奕

成

進士用內閣中書

吾潘氏自唐僖宗朝逢時公

為歙州刺史任滿去官父老攀留遂家於歙 六

世祖谷馨公

公諱仲蘭內閣中書

祁篤藻注

往來吳中卜居

南濠後遷黃鸝坊

五世祖其蔚公

公諱景文杭州府錢塘縣

歲貢生祁篤藻注

高祖敷九公

公諱兆鼎錢塘縣歲貢生處州府松陽縣教諭

祁篤藻注

曾祖閑齋公

公諱暄錢塘縣貢生祁篤藻注

曾祖妣戴

太夫人

太夫人廣東連平州知州諱之諤勛菴公女祁篤藻注

祖貢湖公

祖妣汪太夫人太夫人候選州同知諱元任翊宸公女祁寯藻注

三十五年庚寅二歲

三十六年辛卯三歲

三十七年壬辰四歲

偕兄樹庭諱世榮同入塾從譚蘭皋師授書

三十八年癸巳五歲

曾大父閑齋公捐館舍 曾大父積學能文屢躋

場屋親見世父榕皋公仲父畏堂公諱奕藻先後登

科爲之色喜於諸重孫中尤鍾愛予箸有寸耕草  
堂文鈔行於世是年妹氏生

三十九年甲午六歲

光祿公應試北闈以薦卷挑取 四庫館謄錄

四十年乙未七歲

四十一年丙申八歲

夜聞 光祿公誦詩經心甚喜授以數行卽能背  
誦自後讀四書外兼課經書

四十二年丁酉九歲

從黃曉山舅氏

諱國華己酉舉人

授書

四十三年戊戌十歲

大母汪太夫人棄養

四十四年己亥十一歲

從莫維山師

諱濰浙江丁酉舉人

授書

先大父時令背誦

左傳如一字無訛賜以筆墨詩箋一日子兄弟隨

侍以君子食無求飽命作破題子援筆立成日以



食觀君子志不在飽也 大父閱之喜甚加賜圖

書及名人書札

四十五年庚子十二歲

從陸方輿師

諱廷襄蘇州府庠生

授書

光祿公應試北闈

薦而未售九月

大父捐館舍冬偕理齋

諱世璜樹

庭兩兄應吳縣試

四十六年辛丑十三歲

受業蔣實庵師

諱華元和恩貢

四十七年壬寅十四歲

偕理齋樹庭兩兄赴崑山應試理齋兄入泮

四十八年癸卯十五歲

讀文選及唐人賦偶作蠟梅花賦實庵師見而賞之自後兼課作賦及古今體詩肄業平江書院始

改今名

四十九年甲辰十六歲

應吳縣試李泉亭邑宰

諱逢春

取列第九名時泉亭

先生延清江楊桐舫先生諱懋珩辛卯進士閱卷覆試日

桐舫先生令背誦諸經古文尤賞予詩賦諸作以

范文正天下為任屬對予應聲曰韓昌黎百世之

師先生大喜謂異日必以文章名世因令錄於卷

末以呈閱時庭中丞諱鶚元中丞亦深器焉郡試胡

鑒泉先生諱世銓大加激賞覆試評予卷云昔呂文

穆見王沂公詠梅詩以為此子早安排作狀元宰

相矣吾於作者亦云第三覆案出拔置第一總評

云制義代聖賢立言以理明辭達爲主吳下稱人  
文淵藪震川慕廬諸先輩卓然以文章名世理勝  
故也童試中才華豐贍者正不乏人獨是卷言理  
明切天然朗潤較勝他作且其年僅成童而器宇  
凝重顧視不凡果由是孜孜不懈於學異時或當  
以文章追步歸韓亦未可知掇巍科躋清班特其  
餘事耳因拔置首選用示鼓勵潘生勉乎哉儻不  
善用其才以爲道已在是或且將俯視一切也其

負予期望之意多矣潘生勉乎哉予以少年薄植

蒙先生獎勛諄諄既自愧亦自勉也院試取入府

學第十九名樹庭兄取入吳庠第一名試題民到於今受其

賜賦得梅子黃時雨得調字學使為謝金圃先生諱壖時官吏部左侍郎

肄業紫陽書院山長彭芝庭先生諱啟豐是年仲父

畏堂公成進士入翰林

五十年乙巳十七歲

受業吳朱庵師諱鼎科己卯孝廉科試一等

五十一年丙午十八歲

受業孫朗庭師

諱登標乙酉解元

七月隨侍

光祿公赴

金陵鄉試

光祿公自庚子遭

先大父之變棄

置科舉是秋以仲父畏堂公官卷率理齋樹庭兩

兄及子同入場父子兄弟矮屋中儼如家庭聚處

人皆豔羨試畢隨侍游雨花臺報恩寺歸途登燕

子磯至金山觀東坡所畱玉帶由大江放棹而還

是年補廩世父榕皋公典貴州試

五十二年丁未十九歲

歲試一等

五十三年戊申二十歲

受業顧莪庭師

諱禮琥甲辰進士

鄉試卷出常熟令黃先

生諱元

房科試一等是年仲父畏堂公典湖南試

十一月元配謝夫人來歸

候選州同知諱長源怡堂公女

出塾後

光祿公親自督課與樹庭兄列坐畱餘堂每日

講授經義及詩古文辭樹庭兄甲寅領鄉薦予在

京師寄詩云幾度秋風慙瑁璫桂花香裏讀書聲  
蓋庭中有丹桂二株 光祿公手植數年後已高  
出屋角矣

五十四年己酉二十一歲

至金陵鄉試未及試病歸理齋兄中式

五十五年庚戌二十二歲

七月初七日大女生歲試一等姪遵潢來問業

五十六年辛亥二十三歲



受業平江院長吳竹堂師

諱霽癸未進士

科試一等樹庭

兄補廩姪遵潢入泮

五十七年壬子二十四歲

三月二十六日子曾沂生四月初四日謝夫人卒

時年二十一于歸後事堂上盡孝盡禮持家勤儉

待下慈祥口不言人過舉止端重以產後病亡子

著有夫人事略秋應試金陵子中式第五十三名

舉人

頭場題舜有臣五人二節子曰父母其順矣乎無曲防三句賦得天影落江虛得虛字五

言八  
韻 主考為滿洲鐵冶亭師 諱保時官禮部左侍郎 鍾祥李

雲門師 諱潢時官內閣學士 同考為德州盧海門師 諱蔭文時官建

平縣知縣 是科吾蘇中式共十六人至建平謁海門師

即畱閱縣試卷

五十八年癸丑二十五歲

正月偕理齋兄曉山舅氏杏園表兄 一機 入都會

試與理齋兄同住仲父畏堂公四眼井寓榜發予

中式第八十六名貢士 頭場題古者民有三疾一節或生而知之三句孔子

戶尊

日操則存至莫知其鄉賦得  
繁林翳蒼得賢字五言八韻  
總裁劉石菴師諱壙時官

吏部諱省欽時官  
尚書鐵冶亭師吳白華師工部右侍郎同考章桐

門師諱煦時官  
刑部郎中覆試二等第五名

殿試一甲第一名

賜進士及第

授翰林院修撰

御製還宮閣卷詩云傳臚返禁城渥雨喜新晴曬潤麥麩

協高低禾黍生憑觀真滿志自問益惶情細閱十魁卷

都知予戒盈詩注向例殿試前一日由讀卷官擬題八條請旨示定四條然後撰策問今年第四問保泰持盈非讀卷官原擬乃予特命發問者今日進呈前十名詳加披閱尙知發揮此義此予夙夜單心宥密而多士草茅新進竟能共喻朕懷此中庸九經之所以貴誠也

臣

世恩謹跋云世恩江左庸材壬子膺鄉薦癸丑聯捷殿試卷進呈

欽定一甲一名進士授職修撰自慙薄植曷稱大科伏讀

制策以保泰持盈諄諄下問敬惟

聖主單心宥密夙夜兢兢草茅下士何能仰窺萬一顧嘗

念宋臣程頤易傳云德善日積則福祿日臻德踰  
于祿則雖盛而非滿竊本此意以對揚豈有芻蕘  
之一得迺

聖懷沖挹不遺土壤細流虔誦

宸章實深感愧恭錄

御製筆誤識過文云昨朝考之題於三月卽擬定親書封

識清晨連封發交監試王大臣以試諸士可謂謹密之極矣乃今日閱卷諸臣定等呈覽視之其疏題則積古也不見於經文乃憬然而悟曰本擬稽古而予筆誤稽爲積監試諸臣見不及此而未請旨是諸士子之誤皆予一人之誤也夫試題一字之誤亦何關要然使政之是非人之生死亦如此誤書可乎且予誤而無人敢言則諸事叢脞其弊將不可勝言矣書以自責用戒後此硃筆之愼也予更思之稽古固出於典謨但稽者考也

稽在人而古在古猶有彼此之分焉至積則聚也稽而聚古於心施於言行播爲政治而非徒資博雅之爲不亦宜乎諸士子並未言及此是以申而論之然總類飾非文過之辭益重吾過而已耳五月初四日軍機大臣

阿桂等奏遵

旨恭繕

御製筆誤識過文交新進士閱看據潘世恩等僉稱我皇上熙績釐工惠疇亮采合洪纖而無間實中外所共聞

凡繫乎民生關乎政治豈有毫髮未致其精詳者  
乃協中既審於萬幾而識過並嚴於一字蓋

慎之又慎彌昭翼翼之小心雖微乎其微亦寓煌煌之大  
誠況稽于古訓何如積于厥躬

闡義入神竭臣等愚蒙而莫能索解因文見道經

聖人指示而頓覺貫通臣等雖誦迴環曷勝欽服慙悚之

至謹奏九月乞假歸娶偕吳玉松雲蔡生甫之定

戴金谿敦元三同年程孝廉文同同行汪澣雲同



年梅鼎為予寫秋帆歸興圖諸名公題詠甚夥十

月抵家謝夫人靈匱權厝感德菴

五十九年甲寅二十六歲

正月繼室汪夫人來歸

候選知府諱為仁兩邨公女

三月至新

安進主祭祖晤曹文敏公

文埴

時告養在籍遂游

西湖靈隱諸名勝還為黃太夫人預祝五十壽

四月挈眷由水路北上光祿公及紅珊叔送至

維揚游平山堂至洪園觀芍藥入都寓魏染胡同

充八旗通志纂修妹氏于歸謝景莊 奕楷 怡堂公

子十二月移寓果子巷四眼井是年樹庭兄南闈

中式

六十年乙卯二十七歲

充 武英殿纂修 國史館協修三月散館理齋

兄成進士 殿試一甲三名 授職編修是冬赴

東陵恭繕

孝儀皇后神牌八旗通志書成議敘加一級紀錄三次

嘉慶元年丙辰二十八歲

太上皇帝授受禮成恭進詩冊入選蒙

賞大緞恭遇

覃恩

誥封父爲承德郎翰林院修撰加一級

誥封母爲安人樹庭兄入都應禮部試理齋兄散館改戶

部主事

二年丁巳二十九歲

正月初二日二女生仲父畏堂公假歸賦呈七律

四首偕葉琴柯紹榘李春湖宗瀚陳花農琪諸同

年作詩課

三年戊午三十歲

正月二十八日三女生二月二十七日

御試翰詹題目擬徐階并鮒賦以題為韻賦世恩名列

得春雨如膏得訛字征邪教疏

等第二蒙

恩升侍讀九月充武英殿提調十月升詹事府左春坊

左庶子署 日講起居注官

四年己未三十一歲

正月初三日

太上皇帝龍馭上賓

仁宗睿皇帝親政以講學缺遲至半年未進

特命吏部具本請簡是月蒙

恩升侍講學士移寓賈家胡同三月充會試同考官得覺

羅桂芳等十一人桂芳詩有早知溫室樹終待鳳

鸞聲之句闡中決爲偉器榜發果知名士不數年

閒由翰林躋卿貳入 南齋直 樞廷衡文大省

惜享年不永然身後加尙書銜諡文敏亦異數也

入詞林者五人榜眼蘇兆登吳榮光張鱗盧敏肅

坤桂文敏芳辛酉入詞林者一人黃任萬分部二

人林東垣徐旭會縣令黃翼堂歸班二人孫鵬越

羅世材樹庭兄迴避捐內閣中書是月轉侍讀學

士充 咸安宮總裁本衙門撰文子曾獻生後二

歲殤四月初七日恭上

尊諡

覃恩加一級

誥贈祖爲中憲大夫 祖母爲恭人

誥封父爲中憲大夫 母爲恭人充

實錄館纂修五月至

東陵恭繕

孝誠皇后

孝昭皇后

孝懿皇后

孝恭皇后神牌蒙

恩擢升詹事府少詹事充 日講起居注官六月升詹事

府詹事八月奉

命提督雲南學政

召見兩次訓勉倍至 光祿公寄諭曰汝蒙

聖主隆遇當盡心校閱遴拔真才近如錢南園尹楚珍諸



公皆卓然傑出勿謂邊徼無人迤南間有瘴氣宋  
劉器之處瘴鄉法惟在保身節欲則客感不能侵  
因手輯衛生寶鑑以賜九月挈眷起程行至湖南  
恭奉

恩綸補授內閣學士兼禮部侍郎銜十二月抵雲南學政  
任

五年庚申三十二歲

正月按試景東永昌大理楚雄諸郡接奉閣學謝

摺

硃批少年得晉崇階又係鼎甲宜愛惜聲名切勿恣志前程遠大莫貪小利秉此寸忱以匡朝政勉之慎之又到任摺

硃批滇省吏治民風及銅鹽利弊皆宜隨時密奏五月回

省試雲南府七月錄遺是科正考官爲門人蘇樸

園兆登揭曉後樸園率小門生謁見多予賞拔士

十月按試楚雄大理永昌景東滇省書役向無工

食惟取給於新生紅案銀子出示禁革念書吏等  
枵腹辦公因卽新生覆卷向由提調者改歸各學  
初覆再覆卷費各五錢書吏等作爲工食此外不  
得絲毫有所取咨明督撫存案嚴飭提調稽查士  
子甚爲悅服麗江縣額進十六名以八名撥府府  
學向有選拔縣學則無未免向隅因奏請府縣各  
拔一名得

旨允准是年恭遇

高宗純皇帝升祔禮成加級請封奏准以本身妻室封典

馳贈曾祖閑齋公爲通議大夫 曾祖母戴爲淑人

六年辛酉三十三歲

正月由楚雄回省恭遇

冊立

皇后

覃恩加級

誥贈曾祖

祖爲資政大夫

曾祖母

祖母爲夫人

誥封父為資政大夫 母為夫人二月試澂江廣西州臨

安曲靖於廣西州試院奉到

恩旨升任禮部右侍郎仍留學政四月科試雲南府七月

錄遺八月同制軍中丞會考選拔得李宗蓮等八

十四人九月會考優貢得寇倫廖敦行二人是科

選拔中式者六人自後每科中式數人入詞林者

劉榮黼楊本濬傅綬廖敦行同年葉琴柯典試來

滇於闡中奉雲南學政之

命十月交卸起程

七年壬戌三十四歲

正月過澧州韓桂船觀察對留宿一日河南道中  
奉兼署兵部右侍郎之

旨保定道中奉兼署兵部左侍郎之

旨二月到京復

命五月

派閱新進士覆試卷七月扈

蹕熱河調補兵部右侍郎兼署戶部左侍郎八月隨

駕進哨蒙

賞平苗戰圖二十幅

八年癸亥三十五歲

正月蒙

派同樂園茶宴聯句恭和

御製七律二首

派考試騰錄閱卷官得李

振鏞

等二百人七月充教習庶

吉士九月十一日四女生

九年甲子三十六歲

正月 重華宮茶宴恭和

御製毓慶宮聯句復得七律二首元韻

賞如意荷包元人靈雛兆喜圖三清茶碗歛硯二月

上幸翰林院

賜宴以東壁圖書府等字分韻賦詩世恩分得和字恭和  
御製柏梁體聯句復得七律二首元韻



賞味餘書室全集九家注杜詩大緞二疋端硯宣紙龍井

茶等件扈

蹕至盤山游天成寺千相寺登李衛公舞劍臺

派閱考差卷六月轉補左侍郎仍兼署戶部左侍郎是月

蒙

恩典浙江試廬南石祠部

蔭溥

副焉請

訓時奏明有本宗由商籍入學應試者奉

旨宜令應試之人迴避並奏懇試竣過蘇給假省親仰蒙

恩准並

諭汝係江南人浙江就是第一省了須認真閱看落卷亦須搜閱無使遺珠現在江南大水路上恐阻滯五日卽行沿途被災光景辦賑情形據實密奏欽此二十一日出京七月二十四日至胥江樹庭兄來次日光祿公至舟中曾沂隨至十年睽侍半日承歡欣喜之餘益增悵惘光祿公諭曰兩浙人文淵藪汝膺重任公正自不待言尤宜矢以虛心吾七試棘

聞知勤苦自好負才能之士固有鐵硯磨穿皓首  
不得一第者歐陽氏求其生而不得數語雖論治  
獄衡文者亦當存此心冀無愧耳三十日抵武林  
初六日入闈監臨爲阮芸臺中丞元芸臺中丞擬  
試院煎茶詩二首予與南石和之監試同考諸君  
皆有和作初十日得

旨調補戶部左侍郎十五日得

旨放浙江學政九月十三日榜發得沈學瑛等九十四人

副榜張鑑等十八人是日接印十八日迎養 兩

大人至署

賞臨幸翰林院詩二冊奉到接印謝摺

硃批實心勉力整頓士習汝係大員不應緘默兩浙吏治  
民風洋匪情形俱應隨時密奏又奉到調補戶部謝摺  
硃批實心勉力校士一切要務隨時密奏十二月初五日

內子至署 光祿公於甲申歲補杭庠博士弟子

員不到武林四十年矣湖山勝處暇輒登臨署有

小園園中補竹樹軒再到亭定香亭諸勝花木森  
秀魚鳥親人校閱之暇無日不追隨杖履也

十年乙丑三十七歲

二月按試甯波三月試台州試畢洪太守

其紳招

游巾子山飲斗母閣閣在山之腰有亭曰不浪舟  
枕出對江四面峰巒環繞土人請題額以延爽軒  
三字應之二十二日至天台二十三日游國清寺  
望赤城未及上至高明寺游圓通洞宿方廣寺觀

石梁飛瀑二十四日至萬年寺寺僧贈天台山方  
外志及藤杖寺中牡丹盛開游清涼寺二十七日  
試紹興四月十六日試竣登臥龍山觀海亭謁禹  
陵至南鎮廟十八日回省二十五日試杭州府五  
月十一日試竣是月爲黃太夫人六十壽辰樹  
庭兄謝景莊妹婿至署捧觴稱祝舞綵承歡慈顏  
悅豫長夏侍光祿公至淨慈寺避暑間游西湖  
南北山至靈隱坐冷泉亭游飛來峰至補梅軒聽

偶然和尚彈琴由竹逕上韜光觀董香光心經墨  
迹至松靄山房觀朱竹垞手卷謁于忠肅錢武肅  
陸宣公祠秋濤宮觀潮閏六月

賞御製勤政殿記墨刻七月十二日試湖州府二十七日  
竣事疴作回省八月

聖駕東巡盛京祇謁

祖陵恭遞賀摺並進詩冊九月試嘉興十月渡錢塘江過  
桐廬上嚴子陵釣臺試金華十一月試衢州奉到

頒賞味餘書室定本

御製詩初集各一部謁孔氏家廟試嚴州

十一年丙寅三十八歲

二月按試處州溫州奉到

頒賞

太宗文皇帝松山之戰書事

御製文一函二郡歲科並考試畢游江心寺至雁岩觀瀑

謁劉青田祠訪青田讀書處科試台甯紹二府五



月五日偕同人游蘭亭諸勝回省得

旨調補吏部右侍郎旋轉補左侍郎仍畱任奉到

頒賞御製文初集一部八月試杭州九月試湖州嘉興游

烟雨樓汪堦

學源

來就婚爲候補內閣中書

翼鎬

湘舟子彌月偕大女旋里試金華衢州畢回省奉

到

頒賞御製文初集袖珍板一部

十二年丁卯三十九歲

正月奉到

頒賞清愛堂石刻

御製詠左傳詩全函隨侍 兩大人至半山觀桃花三月

試嚴州六月考遺才八月偕門人費丙章戚人鏡

侍 光祿公至六和塔游雲棲還至理安寺宿是

科門人吳荷屋榮光來典試榜發率小門生謁見

同中丞會考優貢得方楸朝凌銓黃安濤姚樟趙

存洵來學醇黃安濤中式易以方廷瑚後凌銓黃

安濤姚樟趙存洵來學醇俱入詞林二方中乙榜

前此未有也劉金門少宰鳳誥來代得

旨署戶部右侍郎充教習庶吉士九月堂上先歸偕張

蒔塘吉安戚蓉臺徐雪廬熊飛蔣蔣村炯徐芸峴

金鏡子曾沂至西溪交蘆菴觀蘆花游天竺靈隱

十月抵家至光福跨塘善人橋埽墓至感德菴侍

光祿公游虎阜白公祠是月挈眷北上登金山

至岱廟十一月抵京復

命充續辦 四庫館總裁旋充 文穎館總裁

十三年戊辰四十歲

三月偕盧南石先生招甲子及門江亭小集南石  
先生詩先成予爲和之繪江亭雅集圖署翰林院  
掌院學士四月

派新進士覆試閱卷官磨勘大臣充

殿試讀卷官

朝考閱卷官

派閱考差卷六月署刑部左侍郎兼署戶部右侍郎兼管

錢法堂事務八月奉

命典順天鄉試偕曹儷笙尙書

振鏞

榜發取中宗室瑞

林

等七人諸葛

光泰

等二百三十七人十一月初四

日子曾瑩生十二月署戶部右侍郎

十四年己巳四十一歲

正月

萬壽覃恩加一級

誥贈曾祖 祖爲榮祿大夫 曾祖母 祖母爲一品夫

人

誥封父爲榮祿大夫 母爲一品夫人以本身妻室封典  
馳贈外王父西樵公榮祿大夫 外王母氏沈一品夫人

二月署刑部右侍郎

派朝考閱卷官 文穎館書成加二級

派查三庫

派查通倉白糧七月

派閱滿教授卷取增禧等三名署戶部右侍郎

頒賞詞林典故

御製義利辨傲怠詩憫忠詩墨刻

十五年庚午四十二歲

五月初六日子曾綬生六月署戶部右侍郎兼管

錢法堂事務會沂娶婦嚴氏編修浙江杭州府知

府榮少峰女八月奉

命視學江西至熱河請

訓九月出京眷屬先由水路南歸十月至德州孫淵如觀

察星衍

招飲賞菊至鄒縣謁孟廟二十四日渡九

江望匡廬山桐城道中山容樹色峭蒨青葱如觀

宋元人小品幅幅可愛至廬山則如董巨山水氣

魄深厚轉折皆入妙境霜林點綴丹黃錯雜令人

應接不暇二十六日渡章江寓百花洲二十七日

接印

十六年辛未四十三歲



正月初三日眷屬到署二月按試瑞州試院東軒

蘇子由在筠州時有記翁覃谿前輩

方綱

書東軒

額集蘇句天下幾人學杜甫當時四海一子由作

楹帖試畢補種梧竹芭蕉桃李有東軒種樹記試

臨江登盧肇讀書臺三月試袁州又三月試吉安

四月回省試南昌七月試撫州建昌八月奏考竣

撫州建昌二府情形附片云再

臣

查江西省向有

擔匪糾夥結盟爲首者名爲頭肩最小善走者名

爲老滿頭用錢一文分爲兩半一邊交爲首之人  
收藏一邊交老滿頭收執以爲聚散通信之據取  
名邊錢會其意主於強討夥竊勒贖分贓被擾之  
家畏其報復往往隱忍不言如南昌府進賢縣之  
潤溪饒州府安仁縣之鄧家埠撫州府臨川縣之  
萬家山隆谷渡樂安縣之樂陂一帶界連數縣東  
驅西竄易於避匿厯經地方官查拏辦理總未能  
淨盡本年三月內撫臣先福密委撫州營千總蘇

兆熊拏獲爲首之擔匪蕭爛腳並據地方文武員  
弁續獲夥黨俱經奏明辦理臣路過進賢時畱心  
訪察知潤溪地方爲進賢東鄉餘干三縣連界該  
處間有餘匪潛藏臣至撫州聞該縣王泉之續獲  
擔匪胡二百五金夏俚等又千總蘇兆熊拏獲鄧  
家埠逸匪張均顯等解省辦理現在該二處正在  
議設員弁酌撥兵丁地方自可漸臻安謐惟此等  
無賴匪徒每遇查拏緊急四散逃逸或緝捕偶疎

仍復易於招聚總在地方官吏時刻畱心除惡務  
盡無稍疎縱庶幾良善可安而

聖主綏靖嘉師之意藉以稍慰矣又查南安贛州一帶界

連閩廣從前如天地會匪徒改名三點會及紅蓮

會名目輾轉傳授希圖煽惑自嘉慶十四年拏獲

廖善慶一案辦理之後尙爲安靜臣在省時聞廖

善慶案內要犯朱石崇已被廣東省拏獲不日遞

解到省從此根究夥黨自可盡絕根株再臣在建

昌考棚有甯都州知州黃永綸自省回任辦理提  
調考試事件接見時據云吉安府龍泉縣有徐溫  
兩姓械鬪致釀多命該處與廣東湖南接壤恐有  
會匪在內糾眾滋事等語其實在情形一時未能  
深悉臣現由甯都以次接試南贛一帶自當畱心  
偵訪儻有見聞隨時密奏以仰副

聖主委任所有遵

旨查訪緣由謹附片奏

聞九月試甯都瑞金童生招覆後丁母憂奏請照拔貢未  
彙考之例俟服闋後由提調申請補覆其有匿喪  
冒考捏稱考後丁憂者仍照例治以應得之罪奉  
硃批是又附片云再臣由吉安一路回省知龍泉一案業  
經辦理完竣沿途細訪實因縣民楊學貴強佔徐  
姓山場互毆致斃張得標溫台周二命溫張二姓  
內有會匪聲稱復仇並告知會首李魁升起意糾  
眾洩忿惟時該縣因公在省各邨士民均懷疑懼

各募壯丁防護並縛送會匪五十餘名旋經地方  
員弁拏獲李魁升解縣經撫臣臬司鎮道先後到  
彼查辦供認入會者一百餘名業經撫臣分別奏  
辦其未經供認者恐有狡賴及懷疑誤拏各情臣  
過吉安時該管道府尙在詳細研鞫分別辦理臣  
查會匪結盟傳徒受其誑騙半係愚民但黨羽既  
衆積久必至滋生事端擾累地方今因爭山械鬪  
一案將會匪大加懲創愚民等咸知儆戒閭閻俱

臻安謚合併奏

聞省署於重九日不戒於火奏請處分並奏於司庫項下  
先行動支修造將本任養廉分年扣繳奉

旨允准並免其處分十月由水路至贛州登岸試南安還  
試贛州奉到

御製喜雨賦墨刻十一月二十六日奏考竣南贛二府情  
形附片云再南贛一帶界連閩廣從前天地會匪  
改名三點會紅蓮會名目傳徒惑眾歷經辦理有



案<sup>臣</sup>考校之暇密加察訪近年以來尙稱安靜惟是此等匪徒每遇地方查拏緊急卽驚竄潛匿緝捕稍疎仍復輾轉傳授愚民希圖騙錢利己急難相扶每易受其誑惑總在親民官吏讀法之暇隨時剴切曉諭俾知儆惕而又力行保甲嚴切稽查有犯必懲無稍疎縱庶幾消患未萌地方益臻安謐合併附摺奏

聞二十三日回省寓百花洲十二月十六日試院落成進

署江玉亭表伯游幕多年祖姨丈姨母靈匱俱滯  
江西玉亭表伯七十無子又悼鼓盆子爲捐資俾  
扶匱歸里

十七年壬申四十四歲

二月試南康過瞻雲寺寺中有王右軍墨池三月

狄太守

尙綱

星子令門人鄭夢白

祖琛

同游廬山

至秀峰寺寺舊名開先

聖祖御筆改今名敬觀

御筆金書心經及唐人地獄變相圖觀龍潭瀑布至萬杉  
寺過三峽橋觀飛瀑又里許有玉淵澄澈可喜至  
栖賢寺觀元人畫羅漢相至白鹿洞謁先師及  
朱子像山長嚴孝廉謙浙江人贈海珊詩集試九  
江饒州廣信既竣事太守王簣山同年廣言招同  
吳蘭雪嵩梁飲皆山堂五月回省江西童試取進  
後有院試卷與縣府原卷筆迹不符者有覆試卷  
與正場卷不符者每棚覆試端坐堂皇另編堂號

起講稿完卽令謄眞呈閱與原卷符者仍令歸正  
場坐號文理不符者完卷時當堂訊明或鈔襲窗  
稿扣除免究其筆迹不符者取具供詞發提調嚴  
辦科試南昌查出南昌筆迹不符一名豐城二名  
本童扣除發審廩保斥革又進賢文理不符一名  
扣除另補自此次嚴辦後各棚間有文理不符無  
筆迹不對者是年屆選拔之期合歲科原覆卷並  
詩古卷比較拔取又恐覆試場規較寬難免倩代

試日在堂上監視起講謄真面交以杜弊端有正  
場詩古俱考前列而覆試起講文理不符者卽行  
沙汰雖較勞苦而所拔庶可得真才矣五月奉到

頒賞御製嗣統述

聖詩一函七月試撫州八月試建昌奉到

頒賞全史詩四套試甯都九月試南安贛州十月試吉安

袁州得家書知曾沂入泮十一月試臨江瑞州十

九日回省十二月二十四日得

旨補授工部尙書王定九同年鼎來代

十八年癸酉四十五歲

正月二十三日遣眷屬回蘇省親二十五日起程  
游東林寺觀李北海虞伯生王文成碑刻寺中有  
羅漢松相傳是六朝時物又步至西林寺至九江  
方茶山太守體招游煙水寺至署中庾樓小飲二  
月二十九日抵京三月初一日復

命

派閱考差卷

頒賞御製詩二集

賞人濫六兩

賞春雨山房記墨刻七月二十五日孫女韞之生曾沂出

九月十五日午刻有賊闖入

禁城旋即拏獲首逆林清餘匪搜捕淨盡調補戶部尚

書仍兼署工部旋署吏部尚書十二月二女于歸

平陽汪

嘉森

候選同知庠生

詒翼

香巖子充 經

筵講官二十六日進 乾清宮

賞福字時門人吳荷屋官刑部員外郎予告之曰刑部愈  
精愈刻一從刻則犯法者多矣荷屋深以予言爲  
然

十九年甲戌四十六歲

正月初一日

賞如意 重華宮茶宴恭和

御製三友軒聯句復得七律二首元韻



賞如意荷包端硯三清茶碗王翬畫卷煙壺十五日 正

大光明殿筵宴二月初二日

經筵直講署 武英殿總裁又二月唐文告成加二

級三月署吏部尙書四月

派閱散館卷

賞人濫六兩

派閱新進士覆試卷

殿試讀卷官五月充 國史館正總裁六月二十日接

光祿公手諭驚聞 黃太夫人於是月初四日見  
背呼天搶地痛不欲生憶自丁卯浙江試竣拜別  
慈闈已隔七載本擬於月之下旬請假南旋慶祝  
雙壽而釁深罪積罹此鞠凶自恨知識昏迷既不  
能於江西升任時紆道歸省又不及早請假以致  
不克親視含殮抱恨終天當卽星馳就道於七月  
下旬到家幸椿庭康健如常而北堂永逝不獲再  
奉慈顏矣九月二十日五女生十一月隨侍 光

祿公至婁門外相視塋地定於元和縣二十三都  
四圖貴字圩新阡

二十年乙亥四十七歲

曾沂補廩九月仲父畏堂公去世初七日孫女衛  
之生曾沂出十一月奉黃太夫人靈匱安葬新  
阡並祔葬謝夫人

二十一年丙子四十八歲

侍光祿公游西山曾沂中式十九名舉人具摺

陳情乞養世恩於本年九月服闋竊念 光祿公  
年已七十有二精力迥不如前一兄早經出繼分  
居曾沂又將計偕北上曾瑩曾綬年近十齡未諳  
溫清不得已冒昧陳情未及親自進京咎戾滋重  
仰荷

恩旨降補侍郎准其終養舉家感戴惶悚難名謹專摺叩  
謝

天恩奉

殊批忠孝二字不可歧視知所先後則近道矣跪讀

聖訓感激涕零自是剝下承歡得少盡烏烏私情皆出自  
聖人之賜也十一月二十日孫女篆之生曾沂出

二十二年丁丑四十九歲

曾彥曾琦兩姪入泮

二十三年戊寅五十歲

七月二十七日孫庭誥生曾沂出後七歲殤

聖駕至盛京恭謁

祖陵恭進詩冊十二月三十日子曾瑋生

二十四年己卯五十一歲

八月十六日進京恭祝

萬壽九月十九日抵都次日遞摺

召見垂詢臣父年歲飲食並陳臣父感激下情代進貢品

二九蒙

賞收九件

恩賞父親如意一柄天青八絲緞褂料一件寶藍八絲緞

袍料一件春綢一疋紡綢一疋大荷包一對小荷包四箇銅鑪一對二十六日具摺謝

恩二十八日遞回貢九件

賞收如意端硯無量壽佛一尊十月初六日朝賀

賞如意一柄初七日跪

安初九日啓行十一月十四日恭齋

恩賞到家臣父率兒孫輩道旁跪接望 闕謝

恩一時里黨傳爲盛事

二十五年庚辰五十一歲

八月初十日驚聞

仁宗睿皇帝龍馭上賓

仁宗睿皇帝自丙辰

親政兢兢業業勤政愛民二十五年如一日薄海臣民同

深哀慕十六日起身進京九月十四日至 永思

殿遞摺

召見



諭於大祭後卽歸侍養十七日 中正殿

召見跪

安二十二日出都十月十五日抵家曾沂援例捐內閣中

書

道光元年辛巳五十三歲

二月領到正一品

誥命四軸三月曾沂挈眷入都到閣行走十月三女于歸

平陽汪榘贈太常寺博士 貤贈員外郎加二級

庠生 諡德 容齋子

二年壬午五十四歲

正月大雪得二尺有餘近年未有也石琢堂前輩

韞玉

招同吳棣華觀察

廷琛

吳藹人學士

信中

集

鶴壽山堂時藹人侍養在籍棣華由浙入都適與  
此會棣華與予鄉試同年壬戌入翰林予忝大教  
習藹人鄉榜出門人桂香東尚書門下予詩有敢  
向同年說同館喜從門下見門生之句琢堂亦得

二律棣華藹人皆有和作黃蕘圃主政丕烈以為

梓鄉盛事彙刻一卷曰四元倡和詩世父榕皋公

重賦鹿鳴

恩賞員外郎銜曾沂充 國史館分校

三年癸未五十五歲

自嘉慶己巳 光祿公移居城東鈕家巷即臨頓

里相傳為皮陸所居有鳳池園顧中丞沂故宅邱

壑深窈林木翳如 光祿公於靜攝之暇散步游

覽予輒奉杖以從洗竹澆花致饒樂事每值春初  
鄧尉梅花盛放 光祿公坐籃輿徧游青芝銅井  
諸勝由米堆山至錢家礮望湖中漁洋法華諸山  
或游支硎厯石室寒泉中峰放鶴亭南至天平山  
遠公亭萬笏林過寒山別墅千尺雪法螺庵坐苑  
轉橋宿白雲寺偶率子姪輩泛舟虎阜游玉蘭精  
舍坐可中亭生公講臺至鶴壽山房觀元僧善繼  
血書華嚴經小步山塘載花而歸吳俗向嗜嬉游

鐙舫連檣笙歌徹夜 光祿公性耽清靜非所好  
也嘗諭世恩曰汝蒙

聖恩高厚宜補讀有用書爲異日報稱地因輯讀史鏡古  
編爲目六十有四每一則脫藁呈 光祿公訂正  
凡成三十二卷又以宋元明諸儒書皆表章聖經  
顧其書太繁則末學不能徧覽語太奧則淺學不  
能驟明命輯諸儒要語之切於日用者以便朝夕  
省覽因博採宋元明諸儒自周子至李二曲先生

四十三家之言擇其易知簡能近而可思之語彙  
成正學一編 光祿公親爲點定付梓作潘氏支  
譜序是年自六月大雨至八月不止江海驟漲蘇  
松兩府低田皆沒大吏入告奉

旨蠲賑並施十一月四女適汪

嘉梓

候選同知庠生香巖

子

四年甲申五十六歲

三月曾沂假歸爲 光祿公預祝八旬正壽是年

光祿公重游泮宮京外諸同人及門下士皆以

詩文相投贈汪壻

學源

以孝廉方正引

見以知縣用十月十五日

光祿公偶感風寒體覺微倦

曾瑩曾綬以詩文呈閱猶親爲指示更餘忽痰厥

不語少頃神思卽清惟氣息漸微延至十七日申

刻端坐而逝嗚呼痛哉世恩自甲戌歸里朝夕侍

奉竊幸承歡鄰下愛日方長何天不假年遽遭大

故此皆世恩侍奉無狀懼此鞠凶不可爲人不可

爲子尙何言哉

五年乙酉五十七歲

十一月奉 光祿公靈匱安葬貴字圩新阡

六年丙戌五十八歲

正月樹庭兄去世九月同理齋兄攜子姪崑山應

試訪王椒畦孝廉 學浩 於易畫軒琴書錯陳山翠

環繞煮茗清談灑然塵外椒畦以所畫山水便面

見贈十月姪遵祁希甫子曾瑩同入吳庠十二月



十四日孫儀鳳生曾沂出

七年丁亥五十九歲

正月服闋曾瑩娶陸氏光祿寺典簿禮香浦女曾

綬娶汪氏贈太常寺博士 馳贈員外郎加二級

庠生容齋女四月初一日挈眷進京五月初三日

抵都初四日遞摺

召見是日奉

旨署工部左侍郎旋補吏部左侍郎 國史館副總裁十

月升都察院左都御史寓板章胡同

八年戊子六十歲

上年回疆用兵正月二十二日戌刻八百里報到  
生擒逆裔張格爾二十六日恭遞賀摺二月十七  
日孫女鴛繡生曾綬出後以痘殤

賞貂皮

賞人蕩自是每歲屢蒙是

賞

派閱考差卷四月初七日孫女祖芬生曾瑩出五月

賞荷包扇袋等件自是每歲午節咸與是

賞十一日獻俘

太廟及

社稷壇十二日

上御午門受俘侍儀蒙

恩加一級十五日恭進賀表

賞午門受俘墨刻移寓米市胡同七月 正大光明殿凱

旋筵宴署吏部尙書九月署翰林院掌院學士曾  
瑩應順天鄉試挑取臚錄十月充武鄉試正考官  
龔季思閣學守正副焉得崔繩庵等一百六十四  
人署禮部尙書十一月初八日恭進

皇太后冊寶初九日

升殿頒

詔恭捧至天安門樓十六日

天壇侍儀大雪蒙

賞紀錄二次十二月署 經筵講官

賞

仁宗睿皇帝聖訓二十函二十七日

賞福字二十九日

賞荷包自是歲終咸與是

賞

九年己丑六十一歲

元旦朝賀

賞如意自是歲首咸邀是

賞世父榕皋公重宴瓊林

賞加四品卿銜並蒙

恩旨以年逾八十免其進京仍照例給賞時子兼署禮部

尚書親奉

綸音具摺陳謝有云臣伯父重登蕊榜百五人之選尚有一存我

一存我

聖朝再宴瓊林二百年以來於斯六見吳下耆英傳爲佳

話十五日 正大光明殿筵宴二月初五日

經筵直講十二日孫女雙鴛生曾綬出後以痘殤三

月初五日

藉田從耕

派閱新進士覆試卷

派殿試讀卷官

派閱朝考卷

派考翰林院孔目閱卷官取王吉士一名六月十二日孫

祖同生曾瑩出詩以志喜同人皆以詩來賀七月  
領到

誥命四軸以本身妻室封典  貽封世父榕皋公爲光祿

大夫  貽贈伯母史爲一品夫人八月初三日

派祭文昌署翰林院掌院學士十月署禮部尙書十一月

接家書知理齋兄於十月初一日去世

恩賞紫禁城騎馬十二月充  經筵講官

十年庚寅六十二歲



二月

賞御製巡幸盛京詩

賞御製詩初集二卷接家書知世父榕皋公於正月十七

日去世九月

恩授工部尚書兼署左都御史十月初一日 坤寧宮喫

肉後每歲咸與焉初六日孫祖蔭生曾綬出詩以

紀事十二月三十日孫祖福生曾瑩出後四歲殤

十一年辛卯六十三歲

三月十二日曾瑩回南四月

派閱考差卷

派抖晾

實錄五月調補吏部尙書

派同托相國

津

博公

啓圖

估計

萬年吉地工程錢糧六月十四日至大紅門敬成恭謁

東陵詩八韻恭謁

昌陵詩十韻至

龍泉峪隨帶司員吉年鄭開禧及內閣戶部諸君俱至按

清單尺寸丈量觀圖樣畢回寓十九日復

命

賞康熙字典

御製文初集房師德州盧海門先生八十壽詩以寄祝九

月奏

萬年吉地後段做法錢糧江南大水鄉試改期曾瑩未及

試即行十月十四日曾瑩到京奏

萬年吉地前段錢糧十二月奏估計

吉地錢糧完竣兒輩以予所著有真意齋文集付刊

十二年壬辰六十四歲

正月十六日 正大光明殿小宴廷臣恭和

御製上元後一日 正大光明殿錫宴廷臣卽事元韻七

律一首

賞賚有差自是每歲咸與焉署工部尙書二月初二日

經筵直講署翰林院掌院學士三月蒙

恩充會試正總裁戴金谿尙書穆崔舫尙書彰阿朱詠齋

尙書士彥副焉取中宗室常祿等三人馬學易等

二百三人四月孫女韞之于歸韓文和刑部尙書

桂齡孫候補道範小齡子諭令曾沂捐田二百畝

為貧族子弟讀書公產歸入松鱗莊家祠五月初

七日湖南六百里加緊報到逆裔趙金隴殲斃軍

務告竣六月十八日

上親製祝文

地壇禱雨陪祀八月初二日

派祭文昌署工部尙書曾瑩應順天鄉試挑取臚錄

派覆勘鄉試中卷

派覆閱武貢士馬步技勇十月

派充教習庶吉士

派承修

地壇望鐙杆工程

派查營房工程

十三年癸巳六十五歲

二月會綬南旋

派修

秦陵工程二十四日恭謁

西陵宿梁格莊每日赴工十一年江北水災各紳士捐辦

畱養災民會沂蒙

恩議敘光祿寺署正職銜四月初九日奉

上諭阮元甫經簡任協辦大學士資格較新潘世恩學問

素優辦事尙屬認真現係吏部尙書著補授大學士管  
理戶部事務俟承修

秦陵寶城工程完竣後再行來京供職等因欽此世恩猥

以庸愚仰荷

天恩越次

超擢並承

諭旨褒獎寶深感悚十四日得

旨充 國史館正總裁二十三日得



旨著爲體仁閣大學士二十七日抵京二十八日遞摺請  
安叩謝

天恩二十九日

大行皇后崩逝五月十四日奏

大行皇后尊諡

硃筆圈慎字二十七日管理兵部事務六月

派閱朝考卷

派教習庶吉士七月會沂來京省視

派閱大考卷

派查三庫八月

派國子監行禮查收營房工程十七日孫祖喜生曾瑩出

二十四日曾沂出京十一月孫女衛之適汪廷標

壻學源子篆之適蔣鎔經雲南州吏目兆鼎寔甫

子十二月充文淵閣領閣事二十六日立春

賞福字箋十方宣紙十張各色箋二十張各色絹箋二十

張湖筆二十枝提筆十枝

十四年甲午六十六歲

正月二十一日蒙

恩在軍機大臣上行走向例初入 樞廷學習行走一二

年後奉

旨實授亦有行走年久未經實授者世恩未經學習遽荷  
特恩感悚交集二十三日

賞給海澱娘娘廟官房一所向來 內廷諸大臣

賜城內官房往往而有從未有

賞給圓明園官房者亦異數也

賞庫緞袍褂料二月

派國子監行禮初四日

經筵直講

派傳心殿行禮初六日移居

賜第十八日至易州續估

萬年吉地工程三月初八日隨扈

西陵

賞蘋果蜜棗各一桶

賞克食自是每逢隨扈俱邀

頒賞十二日

上謁

昌陵隨進

陵寢門行禮曾綬抵京

派閱考差卷

賞端硯一方歛硯一方五月奏續估

萬年吉地工程

賞屯絹戰裙料一套八月初八日 同樂園聽戲初十日

萬壽行禮後 同樂園聽戲

賞賚有差自是每歲得與九月初七日曾瑩中式二十四

名舉人孫堦韓 文和 江南鄉試中式十月

賞灰鼠四開衩袍一件初十日

皇太后萬壽至 綺春園隨同行禮 同樂園聽戲

賞賚有差自是每歲得與十八日

上御太和殿冊立

皇后持節授正使大學士 長齡 十九日

頒詔同長相國展表二十日至

慈寧宮同文協揆 孚 捧賀書

賞大卷緞二疋江綢二疋荷包三對二十一日捧

寶

賞大緞二疋江綢二疋荷包三對二十一日 太和殿捧

詔

賞天馬皮褂十一月

賞燕窩大呢羽毛各一板十二月

賞紅絨結頂貂帽大緞三卷歛硯二十七日

賞福字加

賞壽字二十九日

賞荷包四對小荷包一箇花爆大小二十五箇大除夕

賞荷包一對手巾二條又荷包一箇內銀鏤十八箇自入

樞廷後歲終咸與是



賞是年復蒙

賞奶餅各種芽茶普洱茶木瓜佛手蜜羅柑榆次瓜柿餅  
喇嘛糖皮糖風豬自是每逢呈進方物俱蒙

頒賞

十五年乙未六十七歲

元旦

上親解荷囊以賜自是歲首咸邀是

賞進春帖子詞

賜福字絹箋紙筆硃墨後每歲皆如之充翰林院掌院學

士稽察欽奉

上諭事件處充 日講起居注官十三日孫祖瀛生後改

名祖保曾瑩出五女于歸平陽汪德英候補道士

鍾朗源子二月管理工部事務奉

命充東閣大學士三月扈

蹕南苑

派閱宗室會試覆試卷

派閱新進士覆試卷

派殿試讀卷官

派朝考閱卷官五月

賞四開衩紗袍紗襪各一件

派閱考差卷七月

賞江綢袍套一副管理戶部事務領到

誥命四軸以本身妻室封典 貤贈仲父畏堂公爲光祿

大夫伯母吳爲一品夫人隨扈

西陵姪希甫南闈中式九月初一日至

吉地收工初二日

昌陵站班隨進

陵寢門行禮初三日

孝穆皇后

孝愼皇后梓宮奉安 饗殿曾綬應順天鄉試挑取謄錄

派閱舉人覆試卷查對中式原卷十月初一日同長相國

恭捧

冊寶

賞大緞四疋荷包三對

賞御用貂冠四頂鞞二雙十一月

賞燕窩狐皮

十六年丙申六十八歲

正月

派充上書房總師傅

派閱各省中式覆試卷二十日隨扈

東陵二十三日

裕陵站班隨進

陵寢門行禮三月蒙

恩充會試正總裁王定九協揆吳梅梁侍郎傑王曉林閣

學植副焉取中宗室榮棻等二人夏子齡等一百

七十四人

賞端硯一方

派閱朝考卷五月

賞屯絹袍褂料一副六月議覆漕運總督恩特亨額請飭

天津鎮道搜查糧船水手軍器一摺略云據該漕

督奏稱每年督押三進糧船北行約計首進回空

彼時漕臣尙在山東牯河一帶相距較遠勢難親

督總運幫弁搜拏請

飭令天津鎮總兵天津道就近督屬認真搜查臣等伏查

道光十一年間臣王鼎前在直隸總督任內會議

稽察回空糧船夾帶私鹽章程奉有

諭旨派天津分司暨天津府等員實力巡防堵截回販此  
項各省幫船由天津回空時有無藏匿軍器若責  
令該漕督督屬搜括未免鞭長莫及轉致有名無  
實應如所請

飭令直隸總督轉飭天津鎮道督率地方文武運委員弁  
於搜查各船私鹽之便統於該處就近河面寬闊  
處所認真查辦倘各幫船內仍有私藏刀械烏槍  
等器一經查出立即從嚴究辦有犯必懲如有差



役兵目人等得規徇庇卽行從重治罪派出各員  
有不實力搜查者該管上司指名叅處庶聲勢聯  
絡以專責成而肅漕政

賞織染局袍套八月領到

誥命四軸九月二十六日亥刻 圓明園殿廷不戒於火  
進 內撲救二十八日

賞加三級十月

賞黃面貂褂十一月揀選宗人府主事刑部堂主事奉天

州縣

賞烏雲豹皮十二月十九日吳荷屋招同卓海帆尙書秉

恬程春海侍郎恩澤爲東坡作生日

十七年丁酉六十九歲

元旦蒙

恩晉太子太保向例

賞加宮銜由太子少保遞晉世恩仰荷

特恩遽加太子太保渥膺

殊遇慙感交并十七日議覆黑龍江將軍哈豐阿等奏查  
明地方情形酌量調劑添設屯丁開墾納糧一摺  
略曰該將軍哈豐阿等請於齊齊哈爾舊設官屯  
三十處外添設六屯呼蘭舊設官屯五十一處外  
添設十九屯係於舊屯人丁內揀選力能耕作者  
俾令開墾並非另行招募其額交糧石折給修葺  
房屋置立碾磨農具籽種糧石酌給買補倒斃牛  
支各項均係循照舊章其于呼蘭屯丁請添給牛

支亦係比照齊齊哈爾舊章其請添齊齊哈爾領  
催一名呼蘭領催二名係因該處添設官屯不得  
不添設領催該將軍等均係體察情形酌量調劑  
自應准其照議辦理惟都爾博特所屬各地方該  
將軍等所請可添六屯之處未將有礙游牧與否  
詳晰聲敘臣等查理藩院例載私募開墾地畝分  
別加重治罪及禁止出邊開墾地畝各有專條例  
禁綦嚴該將軍等請於都爾博特所屬各地方開

墾六屯應毋庸議至出借牛銀及動用錢糧應請  
旨飭令該將軍等揀派妥員認真經理仍將用過數目詳

細報部以歸覈實二十一日內子汪夫人率曾綬

曾璋回南爲曾璋娶婦汪氏候選鹽運司運同

祥

芝  
紫仙女二十二日奉

硃諭加恩交部議敘

賞織染局宮綢袍褂

賞玉件二月揀選貴州知府知縣十三日扈

蹕髮髻山

賞線綉袍套二副十四日奉

旨寶華峪銅管扇現已運送到京著軍機大臣親往查明  
據實具奏欽此二十九日親往內務府鑄鑪處查看解  
到銅管扇九根內有鑿孔露鐵一處檢查原錢糧  
冊內每根均以鐵主信斷節安用並覈對原冊內  
開載尺寸及咨取銅斤等項各彙均屬相符此項  
拆卸管扇照原冊覈計用正銅六萬餘斤當卽據

實覆奏並請將此項管扇仍交造辦處備存遇有鑄造等件以便抵用三月議覆奕灝等豫籌派員  
共同請領官兵俸餉一摺略云臣等公同商酌東三省每年豫領官兵俸餉等銀至一百數十萬兩需用車輛爲數甚多若僅責成奉天派出之協領等二員沿途照料旣恐難周設遇有患病事故僅剩一員尤不足以資彈壓該將軍等所奏係爲慎重帑項起見惟查吉林黑龍江每年各派協領等

官五六員前赴奉天守候領銀若令其全行赴京關領於中途護解固昭慎重而人數過多沿途恐滋紛擾且易啟推諉之漸應請嗣後每年東三省應領俸餉等銀於吉林黑龍江派出領員到奉天時由該將軍等覈計各該省應領銀若干兩卽在該二省派出委員內酌撥數員支給行糧隨同奉天委員赴都領取照數分撥清楚公同防護其未經派出之員仍照舊章在



盛京守候統俟領解到奉天後會同解回本省備用  
如此量爲變通卽委員偶有事故旣不至照料乏  
人而防範益昭慎密議覆山東巡撫經額布奏沿  
海各處情形酌議章程一摺略云臣等公閱摺內  
所議章程六條一沿海汊港及島峙居民宜編查  
保甲以防通盜銷贓一商漁船隻宜令將姓名標  
書桅篷以便識認一出產柴薪淡水之區宜嚴加  
防範以防偷取接濟一巡洋弁兵宜責成水師總

兵揀派叅游大員親督巡緝以稽勤惰一商漁船  
隻進口宜嚴加盤查一海口兵役宜令守口員弁  
親身督查以杜賄放臣等查該撫所議章程六條  
綜計沿海汊港島嶼實在情形已屬周密自應准  
照所議辦理惟立法不患不詳而守法恆恐不力  
山東濱海各地方如果大員認真督率巡洋守口  
弁兵實力奉行奸匪自無從遁迹倘日久玩生徒  
法不能自行亦屬有名無實應請

敕下山東巡撫嚴飭所屬文武員弁不時委查力求整頓  
務將章程所列各條恪守遵行遇有始勤終怠之  
員立即嚴叅懲處庶立法可行久遠洋面日益肅  
清矣四月

派閱考差卷七月議駁給事中孫善寶請將山東鹽課改  
歸地丁輸納一摺略云臣等伏查山東鹽務行銷  
山東全省及河南省之歸德府江南省之徐州府  
安徽省鳳陽府之宿州內除安邱等十八州縣課

歸地丁攤徵外其餘各引地皆係商運商銷遵行  
已久所有每年應徵正雜各課其銀二十四萬餘  
兩加價共銀十五萬餘兩帑利共銀十六萬七千  
餘兩均係按年應徵之款內帑利項下計帑本銀  
一百四十四萬餘兩此外並有拔繳帑本連利共  
銀一百四十萬餘兩前經奏准自道光二十年  
起分限十五年完繳又新舊積欠共銀六百餘萬兩  
亦經奏准自道光十九年起以歸商加價一款接

續彌補各在案今據該給事中奏稱山東行鹽各商倒累過多商累則引懸引懸則課絀查河東鹽務現在商辦而乾隆年間曾歸地丁輸納且山東濱海州縣本有鹽課加入地丁完納者似可做照行之停止商運歸於民運民銷將鹽課亦歸地丁完納等語查各省鹽務如有因時制宜之處自當酌量變通惟必須杜絕弊端方可行之久遠今該給事中請將東省鹽課援照河東成案改歸地丁

完納但查河東鹽務自乾隆五十七年改歸地丁  
之後旋於嘉慶十一年仍卽復歸商運詳稽原案  
河東之復歸商運者係因潞私浸灌淮綱急籌轉  
計竊思晉省鹽地並非密邇江南引地尙虞侵越  
今山東附近場竈各州縣半皆毗連淮境一歸地  
丁聽民自運自銷官私漫無稽覈則浸灌必更甚  
於河東於淮綱引課大有關礙卽該給事中所稱  
東省州縣本有課歸地丁完納者查安邱等十八

州縣前因地處海濱無庸設商辦運與腹地情形不同亦難倣照辦理又所稱鹽課亦猶當日之丁課一節查從前地丁兩項原係各納各課自康熙年間業已丁歸於地此時未便再徵鹽課以致賦額有加况歲時豐歉無常豐年尙可催科倘遇歉收卽應隨同地丁錢糧一律蠲免鹽課轉歸無著亦不可不預爲計及至所稱帑利生息等款在於產鹽處所與運鹽要路設立廠卡酌定稅則查山

東行鹽地界四至遼闊如議抽納稅銀無論場鹽經過之區礙難徧設卡巡且恐徒滋紛擾况試行之初某廠抽稅若干亦難懸定倘徵不足額則經費所關不敷抵補勢必有誤要需即使帑利足敷抵補而帑本二百數十萬兩及每年加價十五萬餘兩並歷年積欠六百餘萬兩全歸烏有內積欠一款雖據奏稱分別追賠豁免查此項銀兩係實欠在商均經奏明彌補斷難請豁而一經民運則



商無引地更恐無可追賠於欠款仍無著落臣等  
逐層覆覈該給事中所奏雖爲鹽務疲敝起見究  
屬窒礙難行應毋庸議

賞線縐袍褂料二件八月

賞澄泥硯二方雕漆合一對戰圖水法圖各一匣九月

賞宋景文集涑水紀聞西臺集文定集融堂書解

御製擬白居易新樂府考古質疑歲寒堂詩話春秋辨疑

帝範五經算術夏侯陽算經三國志辨誤文子續

義學林月令輯要

御選唐詩困學紀聞象山集平苗戰圖鑲玉掛屏四對插  
屏二對綠沈泥硯一方宮扇一柄又

賞書廚一對佩文韻府全部

派閱鄉試中式覆試卷十月二十四日汪夫人攜兒媳輩

抵京

賞紅呢一板

賞快雪堂帖提筆一匣姪遵邴得選拔

十八年戊戌七十歲

二月揀選分發貴州知縣

派閱舉人補覆試卷三月十六日隨扈

西陵

派閱宗室覆試卷

派閱新進士覆試卷

派殿試讀卷官

派閱朝考卷閏五月蒙

恩充武英殿大學士

派閱拔貢覆試卷揀選東河從九十二員未入二十四員  
理藩院司庫三員九月奉

旨前因善英叅奏桓格揀選佐領不擬正陪據桓格奏稱  
考驗勒爾經額等弓馬軟弱當降旨飭令該員等來京  
候旨茲據值年旗具奏該處防禦五員除慶玉業經在  
途病故其穆精額勒爾經額定興貴順等四員已遵旨  
來京著派潘世恩奕紀文慶將該四員弓馬覈實考驗

秉公覆奏卽傳到桓格善英在旁看視欽此當於初四日會同前赴鑲藍旗教場並傳到桓格善英令其在旁看視將該防禦穆精額勒爾經額定興貴順四員詳加考驗內惟穆精額步箭較優貴順騎射稍輒其餘各員弓馬雖不出色亦尙不致生疎據實覆奏旋傳訊杭州將軍桓格於考驗勒爾經額等弓馬輒弱不卽照例叅奏飭令具呈告病副都統善英接到桓格飭令勒爾經額等告退咨文明

知與例不符並不咨駁迨桓格咨催辦理又不立  
卽回覆率具摺彙奏後始行咨商倒填年月該二  
員各遞親供前來於初六日具奏請將禮格交部  
議處善英交部嚴加議處防禦穆精額等四員應  
令卽回原省當差十月武傳臚捧榜十一月

賞黃面貂褂狐頰一百隻十二月揀選吉林巡檢二十一  
日世恩七十生辰蒙

恩賜壽先期

欽差署武備院卿英誠捧到

賞件

御筆熙載延祺扁弼亮宣猷襄密勿靖共介福錫康疆楹  
帖福壽字各一方梵銅無量壽佛一尊紫檀嵌玉  
如意一柄黃碧玳瑁朝珠一盤玉瓷銅陳設十件  
緙絲蟒袍面二件大卷八絲緞十疋小卷江綢十  
件小卷線縐八件春綢八件庭中預設氈桌香案  
至大門跪接 欽使鼓樂宮鐙前導隨入立案前

欽使手遞

御賜如意朝珠向上行三跪九叩禮畢延 欽使入座款  
宴酒半勞贈儀物 欽使起如前導送於門外二  
十一日遞摺謝

恩先

召見免冠謝出復偕同僚入備蒙

獎諭

手白玉管花翎以賜世恩復免冠謝敬奉以出是日奉



上諭大學士潘世恩在內廷宣力有年端方勤慎遇事細  
心現屆七旬精神彊固著加恩賞戴花翎以示優眷欽  
此蒲柳衰年毫無報稱仰荷

榮施逾格

錫賚便蕃惟有益勵駑駘矢勤矢慎冀稍竭涓埃之報耳

刻熙朝宰輔錄二卷

十九年己亥七十一歲

正月初八日孫女瑞鑫生曾瑋出二月初一日

派國子監行禮二十日

派同肅王惠王奕太宰

經

留京辦事三月初四日肅王領

合符至 文華門公同開看合符信牌共二匣十

五日卯正交合符至紅橋接

駕

賞琉球圍屏一架

派閱考差卷

賞杭緯二匣六月

賞庫紗四開衩袍一件七月

上命書對一直幅一

賞織染局屯絹袍褂八月蒙

恩充順天鄉試正考官何仙槎尙書

凌漢

恩小山侍郎

桂

徐辛庵侍郎 士芬 副焉取中宗室和潤等四人沈

際清等二百四十三人三媳於九月初九日去世

爲作小傳二十六日得南信知外孫汪廷枏中式

十月

賞織染局緞袍綢褂料一副揀選湖北知縣福建知府曾  
瑩考取國子監學正學錄第三名由吏部帶領引  
見奉

旨潘會瑩記名以國子監學正學錄用欽此

賞吉祥豹五百張

賞天馬皮袍一件十二月會沂挈孫儀鳳來京省視歲杪

回南

二十年庚子七十二歲

元日同王定九相國

太和殿展表十一日

大行皇后崩逝十七日上

皇后尊諡

上親定爲孝全二十六日奉

硃諭潘世恩加恩交部議敘二月曾瑩引

見奉

旨國子監學正著潘曾瑩補授欽此

賞棉袍一件曾瑩充 國史館分校三月蒙

恩充會試正總裁隆雲章尙書文龔季思尙書守正王藕

堂侍郎瑋慶副焉取中宗室秀平等二人吳敬義

等一百八十三人編闈中唱和詩一卷爲春闈疊

唱四月

派閱新進士覆試卷

派閱考差卷

派殿試讀卷官

賞織染局屯絹袍料馬褂料各一件

派閱宗室鄉試覆試卷曾綬中式舉人二十六名九月十

六日

派同穆相國至

龍泉峪敬視掃青十一月至秋瀾接

駕

昌陵站班隨進

陵寢門行禮

賞青狐頰六百箇刻消暑隨筆四卷

二十一年辛丑七十三歲

正月曾綬考取中書第十九名由吏部帶領引

見奉

旨潘曾綬著記名以內閣中書用欽此二十六日

派同莊王惠王王相國奕太宰畱京辦事

派閱宗室覆試卷二月曾綬充 國史館分校四月曾瑩

會試中式第五十八名貢士覆試第二名 殿試



二甲十五名 朝考入選第九名改翰林院庶吉

士充 國史館協修作紀

恩詩即用庚子春闈韻同人和者甚多刻登瀛壖唱一卷

派閱散館卷掌院向不開列世恩奉

硃筆添派

賞鄭千里羅漢手卷祝京兆字卷沈石田有竹居畫冊又

山水一冊鮮于伯機字卷文待詔臨蘭亭冊懷素

墨蹟明人書札黃山谷墨蹟冊文待詔山水王石

谷萬松積翠一軸又

賞大墨三匣箋紙二卷大小硯各一方五月

派查倉大臣曾綬充 方略館分校本衙門撰文八月初

六日

派國子監行禮九月

賞花糕得南信知汪壻

嘉森

去世十月初三日孫祖楨生

曾瑩出十一月揀選貴州知縣

二十二年壬寅七十四歲

元日至

太和殿同穆相國展表曾綬充內閣協辦侍讀二月初六日孫祖謙生曾瑋出四月爲曾綬續娶陸氏香浦典簿女

文廟春秋丁祭向例先期開列大學士一人至國子監行禮是年奉

旨嗣後大學士尙書一體開列請

派

二十三年癸卯七十五歲

正月二十日奉

命至 正大光明殿閱看廣東所進夷船式樣二十二日  
奉

硃諭潘世恩交部議敘二月十五日奉

上諭大學士潘世恩年逾七旬嗣後朕御門辦事著加恩  
免其入班其該管衙門應行帶領引見之日亦著免其  
帶領以示體恤耆臣至意欽此次日具摺謝

恩夾片請假五日二十一日銷假嗣後同祁淳甫尚書篤

藻何雨人侍郎汝霖每五日輪班到署四月吏部

奏庫案蒙

恩改革職畱任二十七日孫祖均生曾瑋出七月初二日

奉

上諭潘世恩毋庸到署欽此初四日二媳去世八月二十

六日奉

上諭大學士潘世恩年逾七旬襄贊綸扉精神彊固十年

以來夙夜趨公宣勤佐治朕心嘉悅之至允宜特沛殊恩以節勞勩著加恩在紫禁城乘轎用示朕優禮耆臣至意欽此謹查道光十四年元旦奉

旨長齡曹振鏞富俊在紫禁城內乘坐車轎時文襄年七十七文正年八十文誠年八十六或勤宣中外懋著宏勳或久直樞廷年臻大耋今世恩涓埃未效年僅七十有五迺蒙

慈懷曲體

異數優頒感激悚惶莫知所措九月戶部奏庫項全完蒙  
恩開復處分初十日姪遵祁順天鄉試中式子明年重游

泮宮同案吳鑑庵封翁

廷瓚

書來索詩作七律二

首寄鑑庵並寄阮芸臺相國有試向江南望江北  
巍然更有魯靈光之句蓋當時同入泮者惟芸臺  
鑑庵及予三人尙在耳吏部奏失察處分奉

旨加恩改爲降三級畱任不准抵銷十一日發出成親王

書養正四箴

御跋交上書房師傅各錄一幅懸掛書房十二月曾綬補

授內閣中書

二十四年甲辰七十六歲

正月

賞犀角一對花氈一條二月奉

恩諭嗣後每逢經筵世恩於謝講行禮後卽散毋庸至文

淵閣

派同肅王惠王恩太宰畱京辦事同定王怡王僧王見面



奉

旨此次恭謁

東陵著阿哥恭代欽此

派閱考差卷曾瑩散館一等十二名

授翰林院編修

派殿試讀卷官五月充教習庶吉士七月

賞九老圖董文恪畫黃鉞畫八月十六日曾綬攜孫祖蔭

送兩媳匱由水路回南九月曾瑩蒙

召見

派閱宗室鄉試覆試卷曾瑩蒙

派本科鄉試磨勘官復蒙

欽點武殿試受卷官

二十五年乙巳七十七歲

正月初二日奉

諭嗣後 坤寧宮喫肉世恩毋庸入坐仍

賞胙肉一盤二月十八日曾綬及孫祖蔭到京四月姪遵

祁會試中式改翰林院庶吉士七月大女同汪壻

學源到京八月回南曾綬管理

誥敕房事務十月初六日

上至綺春園恭進

冊寶蒙

賞大緞二連江綢二連大荷包一對小荷包四箇十一月

曾綬補內閣中書孫儀鳳娶婦胡氏吳庠侑生清

黻黼卿女十二月十四日

召見至 養心殿上階失足傷脣齒蒙

恩賞假不拘時日並

命軍機大臣派章京二員連日至寓看視復

奏又

命進班大臣閣學載增副憲和淳兩次看視當卽繕摺恭

謝旋於二十六日請

安銷假先期

上命總管內監傳知 南書房太監世恩入朝時著一人

扶掖

天恩高厚體恤逾恆益深兢惕

二十六年丙午七十八歲

正月二十三日奉

殊諭潘世恩加恩交部議敘孫女祖芬于歸外孫汪克昌

汪壻榘子二月

賞肉桂三月初八日

啓鑾

命至南海子接

駕隨扈當於十五日至新衙門跪

安

召見蒙

恩旨賞穿黃馬褂懇辭不允當卽泥首謝

恩恭查 本朝文職漢大臣

特恩賞穿黃馬褂自乾隆四十一年大學士于敏中始繼

此則五十一年陝甘總督畢沅嘉慶五年南河總

督吳敬七年直隸總督顏檢十三年直隸總督溫

承惠二十三年直隸總督方受疇皆蒙

特賞或以軍功告葳或因畿輔宣勤世恩一介庸愚毫無

報稱

鴻慈逾格鵜翼滋慙感愧之餘益增悚惕二十日孫祖疇

生曾瑋出五月曾瑩充功臣館纂修曾綬充國

史館總校曾瑋補太常寺博士二十七日感冒未

入直二十八日軍機章京來奉

旨不必亟亟養好再進來毋庸遞摺閏五月初二日曾瑩

奉

命爲雲南正考官張太史煒副焉

派閱宗室鄉試覆試卷孫祖蔭應順天鄉試挑取謄錄九

月二十八日請假奉

旨令於十月初三日到園十二日領到

誥命四軸曾綬充

玉牒館總校十一月初九日請假十日十八日銷假面奉



諭旨毋庸日日進內或隔一二日或三四日均可謹叩謝  
天恩得南信知大女於十月十七日去世十二月初一日

曾瑩抵京

賞黃面貂褂

賞御書龍字一幅

二十七年丁未七十九歲

二月曾瑩率滇中小門生謁見詩以紀事三月蒙

恩充會試正總裁杜芝農尙書

受田

福元修侍郎

濟

朱桐

軒閣學 鳳標 副焉取中宗室載鏗等二人許彭壽

等二百二十一入十三日孫祖同娶婦查氏御史

元備

又山孫女孝廉

紹錢

玉彭女四月姪遵祁畱

館五月初一日

大考翰詹曾瑩蒙

欽取一等第四名奉

旨以庶子升用欽此十月十六日孫女瑞華生曾瑋出十

二月翰林院奏充 文淵閣檢閱蒙

硃筆圈出潘曾綬欽此曾瑩充本衙門撰文 起居注協

修

二十八年戊申八十歲

正月初二日蒙

恩晉加太傅

賞用紫韁懇辭不允當卽叩首謝

恩恭查

本朝滿漢大學士 贈太傅者八人加太傅者范文程金

之俊鄂爾泰曹振鏞阮元暨世恩而六曾瑩充

國史館纂修教習庶吉士三月初二日

玉牒告成曾綬奉

旨加侍讀銜十月二十六日曾瑩補詹事府右春坊右庶

子孫壻汪克昌得選拔十二月初一日京察拆

封曾綬列一等曾瑩充日講起居注官二十一

日八十生辰蒙

恩賜壽先期

欽差署奉宸苑卿興保捧到

賞件

御筆二朝耆碩扁望重三公資燮理祥開八艷衍期頤楹

帖壽字一幅玉佛一尊佛像一軸紫檀鑲玉如意

一柄珊瑚頂花翎貂帽一頂皮蟒袍補服一襲松

石朝珠一盤玉瓷銅陳設十二件大卷江綢十疋

小卷八絲緞十件小卷江綢十件小卷線縐十件

同日奉

上諭大學士潘世恩由乾隆年間供職詞垣嘉慶年間游  
擢尙書經朕簡任大學士軍機大臣充上書房總師傅  
襄贊綸扉宣勤日懋現在年登八秩精神彊固朕心嘉  
悅實深允宜特沛恩施以昭優眷伊孫潘祖蔭著加恩  
賞給舉人准其一體會試用示朕篤祐耆臣有加無已  
之至意欽此世恩備員 禁近未補涓埃茲以八十生  
辰仰荷

九重錫賚

鴻施逾格方切慙惶復蒙

溫旨榮褒

賞延再世信

生成之獨厚非夢想所敢期謹賦七律八章以志榮幸二  
十三日孫祖頤生曾璋出有詩紀事刻思補齋筆

記八卷

二十九年己酉八十一歲

正月二十二日奉

硃諭激揚大典覈實爲先滿漢諸臣有能精勤任事不顧  
嫌怨者允宜甄敘大學士穆彰阿潘世恩戶部尙書賽  
尙阿祁篤藻刑部侍郎陳孚恩贊襄庶政矢勤矢慎而  
潘世恩年逾八旬精神彊固尤屬罕遇朕甚嘉焉著加  
恩交部議敘等因欽此二月以保舉不慎鐫級畱任罷  
上書房總師傅曾瑩轉補左春坊左庶子三月  
初九日孫祖蔭祖均回南四月十九日奉

硃筆本日又獲甘霖地面一定溼滑潘世恩可毋庸進慎



德堂雖有扶掖之資難紓眷念之意諸卿等於登下扁舟亦當在意欽此閏四月曾瑩補翰林院侍講學士五月十七日以腰脅作痛請假二十日奉

上諭潘世恩年逾八旬精神彊固向無疾病茲因上焦火盛腰脅作痛奏請賞假二十日若照常給假轉慮調理未能從容殊非所以示體恤潘世恩著毋庸定以給假日期俾得安心頤攝俟病體全愈再行銷假入直以示朕眷念耆臣至意欽此六月初八日曾孫女寶蓮生儀

鳳出二十六日奏請開缺奉

旨毋庸開缺仍賞假兩箇月八月二十一日復陳請開缺

蒙

恩再賞假兩箇月孫祖蔭娶婦汪氏壻榘女九月十五日

曾瑩

召見仰蒙

垂詢病體感悚殊深十月二十日奏請開缺奉

上諭本日據大學士潘世恩瀝情奏請開缺朕思軍機大

臣夙夜在公勤勞較甚實非高年所宜潘世恩年逾八旬公勤素著若仍令其入直不足以示體恤著俟來歲春融赴閣辦事毋庸開缺以示朕逾格篤眷耆臣至意  
欽此恭誦之下感激涕零十一月初十日曾瑩

召見荷蒙

垂詢近體並

諭以靜養勿多服藥曾瑩退直歸恭述

聖諭

眷注之隆合家感戴孫祖蔭孫婦到京二十一日得南信

知外孫汪培中式十二月十一日

皇太后仙馭升遐

三十年庚戌八十二歲

正月十四日

宣宗成皇帝龍馭上賓世恩自直 樞廷親見

宣宗成皇帝孜孜求治敬

天法

祖勤政愛民三十年如一日世恩猥以衰孱仰蒙

眷注逾格毫無報稱哀慕尤深十六日令曾瑩等扶掖進

內遞摺恭慰

皇上孝思蒙

恩召對仰荷

溫諭諄諄垂詢病體感激涕零曾綬俸滿截取引

見奉

旨內用二十六日

皇上已刻登極

覃恩加一級二月初十日曾瑩赴園祇領

宣宗成皇帝遺念世恩叩頭泣領敬謹珍藏十一日奏請

開缺蒙

恩再賞假兩月三月遵

旨保奏人才恭遞封奏一件曾瑩奉

命分校禮闈曾瑩未與考差仰蒙

特簡感悚靡涯四月初八日奏請開缺蒙

恩再賞假兩箇月曾瑩率分校中式小門生謁見詩以  
紀事得南信知五女以時疫去世二十日恭繳

御筆因八十生辰蒙

恩賞楹帖詩章上有

御名謹繕摺繳進奉

旨著仍賞還欽此六月初三日復瀝情具摺奏請開缺  
奉

上諭本日據大學士潘世恩因病久未痊具摺籲請開

缺潘世恩

四朝舊臣敷歷有年經

皇考宣宗成皇帝擢任綸扉夙夜勤勞益昭敬慎復

命充上書房總師傅前年壽躋八旬精神彊固蒙

皇考恩賚便蕃

命朕撰製詩章用申祝慶上年元旦

加恩耆舊諸臣特錫用紫韁晉銜太傅乃因夏間腰脅作

痛漸形衰病懇請解退職任疊經



溫語慰留並寬予假期解其樞務曲示體恤朕卽位後召對見其體氣尙未復元諭令安心靜攝仍兩次給假俾得從容調養復奏稱病體日久醫治未能速效力懇退休情詞肫切若不允所請轉無以安其心潘世恩著准其開缺以大學士致仕加恩賞給支食全俸用示朕篤念耆臣恩禮碩輔之至意欽此世恩自通籍以來仰荷

四朝知遇至優極渥圖報維艱茲復仰奉

恩俞並蒙

褒諭渥叨厚精益愧素餐感悚之餘彌深眷戀八月二十一日曾瑩蒙

召見

垂問世恩起居飲食體恤備至自後曾瑩每蒙

召對屢荷

垂詢竊念世恩病體衰頹涓埃未效仰蒙

眷注疊荷

溫綸有加無已惟有勉勛子孫盡心供職努力讀書冀

稍酬

高厚於萬一耳九月孫祖蔭考取國子監學正學錄二

十四名由吏部帶領引

見奉

旨潘祖蔭著記名以國子監學正學錄用欽此十八日

奉移

宣宗成皇帝梓宮

慕陵饗殿曾瑩奉

命隨扈十二月吏部題請

恩廕孫儀鳳得一品廕生祖同得四品廕生蒙

頒賞

宣宗成皇帝御製詩文餘集兒輩以予所著思補齋詩集

付刊

咸豐元年辛亥八十三歲

正月曾綬升內閣侍讀二月曾瑩蒙

硃筆圈出撰擬講義孫祖同考試廕生一等第五名曾

瑩充 咸安宮總裁六月十五日孫女瑞全生曾

瑋出一歲殤八月初六日蒙

賞御製御門聽政述志示在廷諸臣詩石刻孫祖同應

順天鄉試挑取謄錄曾瑩蒙

派本科鄉試磨勘官爲孫祖喜娶婦吳氏御史若準次

平女曾瑩充教習庶吉士十二月 京察拆封曾

綬曾瑋列一等

二年壬子八十四歲

正月曾瑩蒙

派內閣協同批本曾綬曾璋 京察一等引

見奉

旨准其一等加一級三月曾璋俸滿截取引

見奉

旨記名外用十二日曾孫女壬春生儀鳳出四月十一

日

皇上親詣

慕陵行釋服禮曾瑩蒙

派陪祀孫祖蔭會試中式第九名 殿試一甲三名以  
出風疹先向禮部具呈臚唱未到 朝考一等第  
四名授職編修本年重赴鹿鳴時曾瑩官翰林院  
侍講學士由翰林院咨順天府具奏奉

上諭順天府奏致仕大學士重遇鹿鳴請就近與順天  
府筵宴一摺致仕大學士潘世恩歷事

四朝游登揆席嘉謨碩學望重綸扉前於道光三十年間  
因老壘次乞休朕俯允所請賞食全俸令其在京就  
養現在年逾八袞重遇鹿鳴洵爲熙朝人瑞允宜寵  
眷優加潘世恩著准其就近在順天府重與鹿鳴筵  
宴伊子太常寺博士潘曾瑋並著加恩以六部員外  
郎用以示朕篤眷耆臣有加無已至意欽此五月十  
二日奉

旨大考翰詹曾瑩列二等十七名引



見奉

上諭潘曾瑩著記名遇缺題奏並

賞大卷緞袍料一疋小卷緞袍褂料各一件曾瑩署理  
國子監祭酒二十六日曾瑩轉補侍讀學士充教  
習庶吉士六月曾瑩補光祿寺卿七月曾瑩署理  
兵部右侍郎八月初九日曾瑩蒙

派稽查左翼宗學十三日曾瑩蒙

派充覆核朝審大臣九月曾瑩蒙

派隨扈

東陵孫壻汪克昌江南鄉試中式十月戶部奏王公大臣  
官員捐備軍餉世恩捐銀二千兩奉

上諭交軍機處存記十一月曾瑩升內閣學士兼禮部  
侍郎銜明年癸丑科重宴瓊林曾瑩官光祿寺卿  
時由光祿寺咨禮部具奏奉

上諭禮部奏明年癸丑科會試予告大學士潘世恩例  
得重與恩榮筵宴請旨遵辦一摺潘世恩著准其重

與恩榮筵宴以光盛典並先頒給御書扁額一面俟  
明年與宴時再由禮部具奏候朕施恩欽此十二月  
曾瑋補刑部奉天司員外郎次日曾瑋蒙

特旨召見十三日

欽派和碩額駙恩醇齋到

御書瓊林人瑞扁額一面當卽叩頭祇領恭設香案望  
闕謝

恩敬謹懸掛曾瑋派四川司主稿

三年癸丑八十五歲

正月內閣奏派稽察中書科事務奉

硃筆圈出潘曾瑩欽此十四日曾瑩蒙

派

慕陵陪祀得家書知曾沂於十二月二十日去世二月曾

瑩署理工部左侍郎

孝和睿皇后梓宮永遠奉安曾瑩蒙

派陪祀並蒙

派恭送

神牌還京三月禮部奏派會試正副考官奉

硃筆遣徐澤醇爲正考官邵燦潘曾瑩爲副考官欽此

時軍務未竣籌餉孔殷世恩桑榆暮景每愧素餐  
日夜籌思殊深焦灼因捐銀三千兩並呈請停止

賞食全俸及子孫俸銀俸米奉

上諭予告大學士潘世恩現捐銀兩復呈請停止賞食  
全俸及伊子伊孫俸銀俸米除潘曾瑩係現任二品

大員業經部議暫停俸銀外餘均著加恩毋庸停止  
等因欽此四月初十日榜發曾瑩率小門生進謁  
向來登榜後甲子一周得與後進敘同年禮故予  
重宴瓊林詩有笑指新陰桃李盛小門生認老同  
年之句一時以爲佳話二十日禮部遵

旨具奏世恩重宴瓊林一摺奉

上諭禮部奏潘世恩重與恩榮筵宴一摺予告大學士  
潘世恩由乾隆癸丑科一甲一名進士歷事

四朝游登揆席年逾八表望重士林洵爲熙朝人瑞茲屆  
咸豐癸丑科殿試之期例得重與恩榮筵宴業經朕  
親書瓊林人瑞四字扁額先期頒賜以示寵榮茲據  
禮部遵旨具奏朕心深爲嘉慰潘世恩之孫潘祖同  
著加恩賞給舉人准其一體會試以示朕篤眷耆臣  
有加無已至意欽此二十二日孫祖蔭畱館曾瑩蒙  
派朝考閱卷官七月孫祖同考取國子監學正學錄第  
四名由吏部帶領引

見奉

旨潘祖同記名以國子監學正學錄用欽此二十八日  
孫祖同由吏部帶領引

見奉

旨國子監學錄著潘祖同補授欽此祖同充 國史館  
分校十一月曾瑩署理刑部左侍郎十七日曾孫  
成穀生孫祖喜出曾瑋派管理督催所事十二月  
曾瑋題升刑部福建司郎中曾瑩補授吏部右侍



郎仍兼署刑部左侍郎旋署工部右侍郎兼管錢  
法堂事務二十八日奉

上諭王大臣等歷次捐備軍餉予告大學士潘世恩著  
交部從優議敘等因欽此曾瑋派管理司務廳事

四年甲寅八十六歲

二月曾瑋派總辦秋審處三月曾瑩轉補吏部左  
侍郎

先大夫文恭公自訂年譜一卷始乾隆三十四年  
己丑一歲至咸豐四年甲寅夏四月止時年八十  
有六 公服官五十餘載年登大耋氣體彊固解  
組後雖步履蹇澀而神明不衰今歲春杪偶感風  
寒飲食停滯亟進清解之劑兼以培補縣畱旬日  
竟於四月二十日午時棄養嗚呼痛哉 公於乾  
隆五十八年成一甲一名進士授職修撰由大考  
歷升庶子時某相聲勢烜赫有勸 公往謁者

公曰翰詹爲侍從之官當以立品爲要豈容稍自  
貶損致玷清班乎卒不往

仁宗睿皇帝親政以講學缺遲至半年未進

特命吏部具本請簡卽蒙升授侍講學士一年內

擢至內閣學士蓋公植品端嚴廉隅自矢已在

聖明洞鑒中矣由是敷歷六曹持正秉公益資

倚畀旣而丁先大母黃太夫人艱終制後以先大父

光祿公春秋高一疏陳情十年絜養服闋補官蒙

宣宗成皇帝知遇之隆不數年游登揆席入直樞垣公  
益勵靖共精白一心門無私謁道光二十九年因  
腰脅作痛奏請解職屢蒙

溫語慰畱今

上御極顛懇再三得

旨予告

綸褒稠疊眷注逾恆

不孝曾瑩

每蒙

召對必

垂詢飲食起居體恤備至歸述

聖諭感激涕零惟勛子孫等勤慎供職努力讀書以冀  
仰酬萬一時值粵匪滋擾籌餉孔殷 公憂形於  
色手疏薦林文忠公及姚公瑩皆蒙

擢用後兩公相繼殂謝 公傷悼之餘倍深焦灼日夜

籌思遂至精神恍惚寢食幾廢而 公之病自此

深矣曾自撰輓聯云鄉夢久無憑那有閒情問松

菊 主恩曾未報尙畱餘悃付兒孫 先公忠


蓋之忱始終匪懈不於此可見乎 公自入樞禁  
小心謹慎退直後焚香默坐時手一編以自娛從  
無一語及

內廷事故密勿論思 不孝 等無由知而載之顧念

公生平服官居家凡立身行政諸大端皆足備史  
冊而垂家乘謹卽自敘年譜覆加校錄刊行 不孝

等藉得以時省覽且冀有道君子文之以不朽焉  
不孝孤子曾瑩曾綬曾瑋承重孫儀鳳百拜謹識

吳門湯晉苑局刊



恩福堂年譜



英和姓索綽絡氏字樹琴號煦齋先世起於混同江東北弗  
阿哈之地譯言舊阜也

國朝定鼎初

高高祖諱布舒庫從入北京隸鑲白旗隨將軍親藩征西有  
功後歸內務府世為內務府正白旗人

高祖諱都圖為

御前親隨

聖祖仁皇帝嘉其身健如石



賜姓石氏

曾祖諱石琦因石為族

祖諱明憲以先文莊公貴

封贈三世如其官

高祖母康氏

曾祖母齊氏

祖母卓佳氏

封贈一品夫人

父諱德保由乾隆丁巳科進士歷官禮部尚書

誥授光祿大夫追諡文莊 國史有傳

母傅察氏

誥封一品夫人

生母經氏

誥封一品太夫人

乾隆三十六年辛卯 先公官廣東巡撫以是年四月十四  
日辰時生子於撫署後堂時 先大父春秋高望孫甚切傅  
察太夫人於庚寅歲赴粵道經杭州禱於靈隱寺至是予生  
予幼名石桐以生於粵別號粵溪生云

三十七年壬辰二歲

三十八年癸巳三歲

三十九年甲午遵川運例捐監生筆帖式

四十年乙未始識之無

四十一年丙申春 先大父卒隨侍 先公奔喪回京始入

塾受業於直隸孝廉劉先生坤 冬復隨侍 先公赴漕運總

督任

四十二年丁酉受業於安徽進士程先生在嶸 並從駐防兵

李鐸 習清文弓矢

四十三年戊戌仍受業於程先生夏隨侍 先公赴福建巡

撫任冬 先公擢禮部尚書隨侍回京

四十四年己亥受業於直隸孝廉李先生陽林 並從故侍御

札爾杭阿習清語弓矢

四十五年庚子受業於江蘇進士任子田先生大椿 初學詩

四十六年辛丑受業於江西孝廉劉先生肇虞 夏結婚於薩

克達氏故漕運總督阿莊恪公思哈 第四女秋伯姊適簡恪

親王第五子鎮國將軍伊鏗額

四十七年壬寅受業於山東進士董先生猷定 始學舉業

四十八年癸卯受業於安徽拔貢生侯先生

坤

是年秋薩克

達夫人來歸予每夜讀夫人理針黹以佐時吳興孫勉亭爲

寫秋燈伴讀圖其後黃左田又重寫夜燈清課圖皆紀實也

四十九年甲辰侯先生仍館於家又從故太守

額魯禮

習清

語是年三月補內務府會計司筆帖式旋在堂上行走

五十年乙巳侯先生仍館於家三月大臣子弟挑侍衛拜唐

阿名已入選奉

高宗純皇帝特旨英和年紀尙小著令其讀書不必帶領引見欽此

七月丁 傅察太夫人憂是年遵

恩詔加一級爲 經太夫人及本身妻室請

封

五十一年丙子受業於浙江優貢生盧先生 登俊

五十二年丁未受業於安徽進士後官湖北按察使方茶山

先生 體 正月長女生旋殤

五十三年戊申受業於湖南孝廉蕭雲巢先生 大經 七月錄

科旋以 先公主順天鄉試遵例迴避十一月次女生旋殤

五十四年己酉正月丁 先公憂撰次行狀丐無錫嵇文恭

公銘墓石韓城王文端公書丹富陽董文恭公篆蓋三月與

傅察太夫人合葬於長營是年受業於湖南進士後官陝

西布政使唐陶山先生仲冕先生尋以憂歸又受業於湖南

進士羅先生廷彥

五十五年庚戌侯先生復館於家三月長子奎照生是年

先公樂賢堂詩集刊成

五十六年辛亥受業於江蘇孝廉李靜菴先生深源二月次

子奎耀生

五十七年壬子李靜菴先生仍館於家七月錄科八月應順

天鄉試九月揭曉中式第五十五名舉人房師為戶部主事

後官江南河庫道浙江談韜華先生祖綬座師爲吏部尙書

後官大學士山東劉文清公壻刑部侍郎江蘇王蘭泉先生

和國子監祭酒後官吏部尙書滿洲瑚和菴先生圖禮十月

覆試於

乾清宮十二月三子奎文生旋殤

編庚子至是年古今體詩爲蠟術集

五十八年癸丑李靜菴先生仍館於家三月應會試四月揭

曉中式第八十二名貢士房師爲左春坊左中允後官翰林

院侍講余秋室先生集座師爲禮部侍郎後官禮部尙書滿



洲鐵冶亭先生保工部侍郎後官左副都御史江蘇吳白華

先生省欽正總裁則仍出劉文清公門下

殿試二甲第二十五名

朝考

欽取第十五名引

見改庶吉士七月充

武英殿協修旋補纂修十月三女生旋殤

五十九年甲寅十二月四女生後五歲殤

六十年乙卯三月散館二等第二名授編修十二月五女生

編館課詩賦爲恩福堂賦鈔一卷試帖鈔一卷

仁宗膺皇帝嘉慶元年丙辰恭逢

授

受禮成進頌冊蒙

賜大緞八月協辦院事十月授侍講引

見時蒙

高宗純皇帝溫旨垂詢並以

聖製觀麥七言古詩一章

命和十一月充

日講 起居注官十二月充

玉牒館纂修官是年遵

恩詔加一級爲 經太夫人及本身妻室請

封

二年丁巳正月六女生旋殤五月轉侍讀恭隨

仁宗睿皇帝奉

高宗純皇帝聖駕啟蹕幸

避暑山莊蒙

高宗純皇帝召對論及詩古文

諭曰朕之著作甚富而儒生嗜好不同汝喜朕何詩何文不妨直對  
因敬陳如某詩某文皆古人所未經道天縱非人力也又  
諭曰朕不待汝頌揚然汝頗有見解獎勵再三

賜文綺復

命和

聖製詩九月回京十一月充

文淵閣校理

三年戊午二月

廷試翰詹

欽取二等第五名升翰林院侍讀學士十月充順天武鄉試正考官

副為翰林學士後官吏部尚書山東劉文恭公環之十二月

升少詹事是月

玉牒館書成議敘加二級並

賜銀緞

四年己未正月初三日

高宗純皇帝升遐時應

詔言事奏曰伏以

今日廣開言路下采芻蕘臣曷敢安於緘默現在善政次第舉行

臣敬思民維邦本則庶政尤以民事爲先州縣爲親民之官知府有表率之責誠使府州縣人人稱職天下自無不治然羣吏各修其職要在大吏先得其人近督撫中如某某者聲譽平常恐負

委任兩司中如某某者辦事認真亦知自愛若寄以封圻重任似可有爲大吏果能整躬率屬舉一賢而凡可舉者咸知所勸劾一不肖而凡應劾者咸知所懲舉劾公明自必澤及黎庶我皇上於大臣之賄賂公行者法有必加由是慎選乃僚廩卹民隱薄賦稅絕貢獻損上益下藏富於民更以次釐剔各省錢漕積

弊

聖治蒸蒸日上矣是月充

實錄館纂修官二月充

文淵閣直閣事稽查左翼覺羅學三月四子生未命名旋殤是

月充會試同考官上年考試試差以親老未與試至是蒙

特簡四月揭曉得蔡鑾揚等十一人五月十四日升詹事二十三日

授內閣學士兼禮部侍郎銜先公在翰林學士任僅九日

晉內閣學士予在詹事亦僅十日晉閣學實異數云蒙

召對

諭曰汝家事朕皆深悉惟當日和珅如何欲與汝締婚汝父何言以

謝其直陳無隱對曰臣年八歲時和珅初為侍郎至臣家適遇臣

於門外但問臣年幾何別無他語及臣十一歲一日臣父退

直謂臣母云白髮夫妻日增老境當早為兒授室今日在公

所見八旗秀女中有原任漕督阿思哈之女薩克達氏未經

記名可即通媒妁併定於十三歲來歸此外別無所聞迨臣

父亡後大學士公阿桂向臣言當日和珅倩內務府大臣金

簡為和珅之女作伐臣父婉辭阿桂稔知其事

仁廟嗟歎久之諭曰汝父生前受和珅之謗多矣因泣對曰不獨生



前受謗身後遺摺尙為遏抑次日蒙

特恩賜

先公諡文莊並追諡前禮部尙書先世父觀

保

文恭九月

恭隨

聖駕送

高宗純皇帝梓宮奉安

裕陵禮成加隨帶一級授鑲藍旗漢軍副都統是月

高宗純皇帝升祔

太廟加一級稽查中書科事務十月充武

殿試讀卷官

此後如 派閱蔭生等卷及驗看 月官挑選文武等官不能備載

十一月

命錄舊作進呈

高宗純皇帝升配

南郊紀錄二次十二月奉

命往朝鮮頒

詔歲除蒙

賞麇鹿自後除夕

賞咸與焉是年遵

恩詔加一級爲 經太夫人及本身妻室請

封

五年庚申三月自朝鮮回京四月驗看右翼軍政閏四月閱

考試試差卷時

廷試卿僚以母老未與試越三日

仁廟垂詢卽以實對

諭曰此次不可無汝文應補之因請試它題又

諭曰卽以前題散直在家爲之翌日呈進七月

命錄朝鮮紀行詩造呈是月升禮部右侍郎管右翼幼官學八月順

天鄉試以吏部尙書後官大學士湖南劉雲房先生權之爲

正考官予及副都御史浙江陳春淑先生嗣龍副之九月揭

曉得張葆等二百三十人是月轉禮部左侍郎十月閱考試

滿教習卷十一月署正藍旗漢軍副都統是月五子奎光生

後一歲殤

編癸丑至是年七月古今體詩爲瀛洲集

六年辛酉正月授總管內務府大臣調正紅旗滿洲副都統

充

經筵講官是月因雪中侍班

賜蟒袍一襲二月管造辦處事務署工部侍郎充

壇

廟對引大臣

命恭送

穎貴太妃金棺詣

裕陵安奉

諭曰此事命汝前往者因妃衙門有汝姊瑞貴人墓非藉此差無由  
展謁也三月署翰林院掌院學士

命大挑舉人時一日獨對

仁廟謂曰宵旰籌軍憂勤備至何以天意尙不欲奏功耶對曰此正

天心仁愛欲吾

皇知爲君難耳

仁廟曰豈天知三省教匪平定後朕意將有所放乎對曰  
皇上數年來兢兢業業天早鑒之惟父母愛子之心要萬年如一日  
也

仁廟爲之動容是日扈

蹕詣

裕陵行釋服禮自正月調正紅旗副都統後奉差絡繹未赴該旗衙  
門四月經儀親王叅奏奉

旨革去副都統五月教習庶吉士端陽節蒙

賜荷囊自是節

賞咸與焉六月署理藩院左侍郎充江南鄉試正考官以戶部員外

郎後官江安糧道江西湯价人潘為副時大雨匝月永定河

決自新城乘舟抵德州始登陸屆期入闈九月揭曉得崔錫

華等一百十四人闈中拜署吏部左侍郎

命旋調戶部左侍郎十月回京復

命

諭曰江南試題首為卑宮室一句是紀本年直隸水患孟子題放勳

曰至如此與順天題同汝應出有末句即此可見同心同德隨即

頭謝

命錄進江南一路紀行詩詩中有秋風淡淡路迢迢句

聖諭淡淡似春風應改蕩蕩人臣私著上蒙

筆削實爲藝林佳話故事以歲首及仲春孟冬朔日記

神於

坤寧宮王大臣入食胙至是予始與後每歲與焉

聖節日

召入

同樂園觀劇



賞賚有差自是亦每歲得與十一月

園丘大祀時朔風甚厲對引如儀蒙

恩賞戴花翎十二月授正白旗漢軍副都統是年遵

恩詔加一級爲 經太夫人暨本身妻室請

封

編庚申至是年九月古今體詩爲容臺集

七年壬戌元旦侍班

仁宗親解荷囊以賜自是歲首咸邀是

賞

命入

同樂園觀劇上元後一日

正大光明殿小宴廷臣

命入座

賞賚有差自是每歲咸與焉是月

召直

南書房二月

經筵進講爲政以德書義

聖駕謁

西陵

命署護軍統領四月閱新進士覆試卷

命磨勘會試試卷充

殿試讀卷官閱

朝考卷

命管理

咸安宮官學六月閱拔貢

朝考卷七月扈

臨幸

避暑山莊調正藍旗滿洲副都統抵熱河因辦

行宮貼落

賞蟒袍一襲是月六子

奎燾

生後一歲殤八月

賜食於

如意洲中秋

命觀劇均

賞賚有差

賜

御鎗所中鹿肉自是凡扈從灤陽皆如之

恩福堂手譜

三

駕幸木蘭

命佐榮恪郡王管理行圍事向例管圍者不許從禽

特命射牲旋獲鹿以獻

賞穿黃馬褂九月回京十月閱考試繕本筆帖式卷十一月授翰林

院掌院學士以原銜充

日講起居注官署鑲藍旗漢軍副都統是月

賜貂裘一襲十二月平定三省邪匪報捷

命入

重華宮觀劇和

詩

賞賚有差次年餘孽全平

同樂園宴亦與焉除夕

乾清宮

親賜御書福字侍郎叨此蓋異數也自是歲終咸膺是

賞進春帖子詞

賜紙筆後每歲皆如之

八年癸亥二月恭隨

聖駕謁

東陵禮成

駐蹕盤山退直遊千相寺及古中盤小飲寺中怪石奇松盡收座下  
又至東竺庵舍肩輿乘騎至雲罩寺登定光塔蒼茫四望身  
在天半誠大觀也蒙

賜食於

天巖雲秀

賞賚有差自是凡扈

蹕盤山皆如之五月熱河圍場副都統韋

陀保

叅奏總管董椿等砍

伐木植以近報遠希圖冒銷

命往訊十一日自京起程十四日抵熱河韋陀保帶同承辦木植之

防禦齊達塞亦於是日至熱河隨質訊董椿等緣嘉慶七年

奏准圍場伐木地方五處曰都呼岱曰英格川曰努呼岱曰

長林子曰固爾班拜努呼岱在南都呼岱在北欲到都呼岱

必由努呼岱此次初奏在都呼岱伐木二萬六千七百三十

株因經過努呼岱故先伐木一萬九千餘株不足者再於都

呼岱揀伐仍由努呼岱拉運道途順便於錢糧可節省並無

弊竇奏明結案二十日旋程二十五日還京六月充續纂四

庫全書總裁七月



命總理

孝淑睿皇后奉安禮儀是月恭隨

聖駕幸

避暑山莊署

行在理藩院侍郎八月停園中秋前一日宴越南使臣於

萬樹園大幄次侍臣咸與

賞賚有差署茶膳房事務管理

奉宸苑

御鎗處事務十月復隨

駕謁

西陵奉安

孝淑睿皇后梓宮禮成加一級十二月

賜海龍褂一襲

九年甲子二月初三日恭逢

聖駕幸翰林院先期蒙

恩加太子少保銜

賜一品補服屆期迎

駕於署外

上詣

文廟行禮至清秘堂少坐諸臣各歸坐次隨奏請

陞座入宴至座前進酒畢蒙

賜酒復位又蒙

召至

御案前

賜酒禮成

聖駕仍至清秘堂諸臣於署外跽送是日分韻得見字並和

御製七律二首

賞資有差旋於私第跽迎

御書清華勵品額恭進頌冊是月恭隨

聖駕謁

東陵駐盤山由湯山至明陵六月授軍機大臣開內務府大臣等缺

七月

御製詩初集刊成恭進

賜黃辯珊瑚朝珠一盤綽紗蟒袍一襲恭隨

聖駕幸

避暑山莊調鑲黃旗滿洲副都統

賞穿綠皮押縫靴是歲仍停圍九月回京十月

命在

紫禁城騎馬故事大臣官至一品年逾六旬方

賜朝馬予時任侍郎年三十四得有代步

寵榮極矣長子

奎照

聘故侍郎伊公

齡阿

孫女故員外郎昌公

儀

女

是月為之授室時面奉

諭旨檢查巡幸五臺典禮具摺奏言

臣

維古聖垂巡狩之典

列聖奉行維謹且以為民祈福初非徒事游盤我

皇上所以有將詣五臺之舉也然事有重輕時有先後

臣

竊以三省

甫定民氣未蘇

警蹕所臨雖事事輕減而長途供億不能不借資民力

臣愚敢懇

聖明緩降

諭旨俟逾數歲後年穀順成民樂其業再遵

舊典則

屬車莅止遐邇臚歡

錫闔敷祺蒼生幸甚

仁廟嘉納之十一月

賞貂裘一襲十二月

西陵贊禮郎清安泰控告內務府大臣公盛住朔望拈香遣人行禮

於私宅前演戲點放烟火又於永福寺西北禁地開打石塊

等款初十日

命偕刑部侍郎戴公

均元

往易州查辦十三日馳抵梁各莊又據清

安泰續呈虛開在工廩餼及徇私保題主事二款隨親赴永

福寺後山地名樹兒坡小魏家溝勘得山脚有開挖石塘數

處復繞至沿山安設紅樁白樁地面較量道里所開石塘在

白樁以外青樁以內恭查

陵寢舊制紅樁以外留火道二十丈火道以內禁止樵採嗣於火道

二十丈之外添立白椿乾隆二十五年又奏定距白椿十里  
安設青椿在青椿以內均不得取土取石設窑燒炭放火燒  
山盛住祇知原奏有嚴禁設窑燒炭字樣誤以為取石不在  
例禁之中遂准商人開採餘款亦鞫實奏入奉

旨交軍機大臣會同刑部定擬盛住戊烏魯木齊餘皆降罰有差十  
九日回京除夕因進次年

### 重華宮聯句詩

賞蟒袍一襲後凡進聯句詩皆如之

十年乙丑正月與



重華宮茶宴聯句

賞賚有差自是每歲咸與焉二月

經筵進講君子以自強不息經義二月會試以大學士大興朱

文正公珪為正總裁戶部尙書後官大學士江西戴文端公

衛亨吏部侍郎恩雨堂先生普及和副之先進呈宗室卷得

崇弼德選二人四月揭曉得胡敬等二百三十三人閱散館

卷午日

命至

福海觀競渡並至

同樂園觀劇後每歲皆如之管理西洋堂事務閏六月因回叅

協辦大學士尙書劉

權之

瞻徇司員袁

煦

措詞不當奉

旨降爲太僕寺卿仍兼管西洋堂事務並稽察左翼覺羅學劉亦降

編修九月充

實錄館總纂官旋改總校官復授內閣學士

聖駕東巡祇謁

祖陵恭進頌冊是月翰林院進詞林典故奉

旨議敘加一級紀錄三次十二月復充

經筵講官署理藩院侍郎

命往平泉州審民人劉發旺糾眾戕官一案順赴喀喇沁質訊塔布  
囊固山額駙佈里訥錫不法各款

編辛酉至是年閏六月古今體詩爲民部集

十一年丙寅正月初四日出京初八日出喜峯口初九日抵

平泉州會同熱河副都統慶傑詢明劉發旺山東人在喜峯

口外種地與蒙古駙站章京拉什因索債爭鬪刃傷拉什其

時在場者係拉勸之人並非糾眾而章京非本管官亦非戕

官論擬如律十二日行文提蒙古人證來平泉審辦從前少

司寇貢某副都統富某審辦喀拉沁之案皆調至八溝即平泉

蓋不欲擾累蒙古地方也十八日審訊佈里訥錫衆證確鑿  
概不承認逐日研鞫至二十三日始畫供過堂定爰書遣戍  
伊犁二十六日啟行是月授理藩院左侍郎署吏部右侍郎  
旋調工部左侍郎管火藥局事兼正紅旗漢軍副都統旋調  
鑲黃旗滿洲副都統二月初二日回京充

實錄館副總裁

命偕內閣學士初公

彭齡

往甘肅審訊已革正寧縣知縣徐振鵬呈

控被叅負屈一案二十日出京三月初四日抵清風店奉

廷寄交審莊浪馬甲伊經額呈控副都統成

明

家人楊三得贓

濫押一案是時陝甘總督倭什布奏言吉蘭泰鹽池自上年

馬君選被控提省審辦該處積鹽無多致悞民食現已飛移

阿拉善王迅速派人經理

諭曰向來晉省池鹽由商行運蒙古鹽斤入口本有例禁嗣經分定地界行銷迨河東鹽課改歸地丁聽民間自行販運遂無一定口岸蒙古鹽斤因此侵越晉省而且侵越淮綱因查拏馬君選之後一年以來並未撈鹽發運是奸商拏辦阿拉善遂無經理之人正是極好機會現派英和初彭齡赴甘省查辦事件路經晉省與向興熟商籌辦或仍改歸商運之處妥議候旨施行途次接奉

諭旨於十六日與初公

彭齡

馳抵平陽府會同同公

興

奏言非禁水

運不能限制口鹽非設官商不能杜絕私販查山西歸綏道屬五廳及沿邊之大同朔平兩府向准就近買食蒙古鹽斤至太原汾州等屬四十四州縣則例食本地土鹽仍納河東池鹽引課內惟岢嵐等十一州縣因土鹽不敷亦准兼食蒙古鹽以土販過多乾隆二十八年經前撫臣明德奏令土販持引赴口採買四十五年禁蒙古鹽斤不許運入內地有礙官引四十七年前撫臣農起以口鹽不通則土鹽價貴致妨民食又請弛禁聽民自運並聲明只許肩挑驢馱零星買運

於口岸不得用大船木筏由黃河運至保德州臨縣等處四  
出私售五十一年阿拉善親王旺親班巴爾以陸運所銷無  
幾懇請水運經撫臣伊桑阿議准以臨縣之磧口鎮爲界其  
磧口以下毋許侵越此蒙古鹽斤水運之始而河東商人各  
有引界不特口鹽不能四出售賣卽潞鹽亦不能侵越於淮  
蘆之間也迨五十七年河東池鹽課歸地丁任民自運蒙古  
鹽斤亦籌辦總無良法現在蒙古鹽斤積存無幾若責令照  
舊水運亦必仍借內地民人代爲經理不特蒙古徒受奸民  
愚弄卽內地官引反虞私梟浸灌自應停其水運照舊例准

其在河口村地方積貯由陸路行銷於例食蒙古鹽之州縣仍責成歸綏道督同該通判就近嚴查毋許偷漏至河東池鹽任販運銷漫無稽查其侵越勢不能遏且征鹽課於有糧之民而錫美利於無引之販以致淮南商連年困乏池鹽私販日見充盈本非經久無弊之法自當仍改商運以循舊章第簽商既恐不公而招商亦須慎選又河東池鹽弛禁已久現辦復商章程匪易事關三省節目繁多容<sub>臣</sub>等逐款核辦又奏阿拉善親王瑪哈巴拉請獻吉蘭泰鹽池歸公

上允之二十日自平陽啟行四月初八日抵慶陽府審訊徐振鵬一



案正寧縣有民婦馬萬氏因姦爲其夫弟馬廷御所殺以加功致死者爲馬萬氏之子馬香案關逆倫褻點傷痕作爲自抹身死知縣徐振鵬聽許財物相驗時刪減屍傷經總督叅革振鵬自謂負屈遣弟振鶴赴京翻控鞫得實情論如律二十日啟程五月初三日抵蘭州府先是倭公什布奏莊浪滿營馬甲伊經額訴涼州副都統成明因騎都尉順寧告病聽其家人楊三受賄又知蘇和臣欲舉發繫之於門監奉

旨交訊審得楊三受賄出於花亮之撞騙蘇和臣被押由於另案之唆訟成明應如挾私故勘律革職又訊刑部奏交正寧縣民

人劉啟印訐告典史王閻芝得賄屈斷刑房衙役串通受賄

各款悉屬虛誣應依驀越赴京告重事不實例發邊遠充軍

奏入皆

諭刑部議奏十九日自蘭州東歸二十三日抵會寧縣翟家所

交審文水縣一案六月初四日抵西安府奉

旨議鹽法事曰爲今之計莫若將蒙古池鹽河東池鹽一併招商承

辦此事關繫重大頭緒亦復紛繁英和曾任軍機大臣初彭齡曾

任巡撫心地亦皆明白公正著會同倭什布方維甸同興將山陝

甘三省鹽務通盤籌畫妥議具奏當經奏明容俟抵太原時再行

熟商請

旨又奉

廷寄以前擅發驛遞

交部議處十一日啟行二十三日抵太原府提審文水縣監生韓震  
控案震之父歲貢生繡邦恃符滋事招引無賴市人名其居  
爲英雄館與王徵書有爭賣舖房之嫌主使李得富等毆之  
成廢事發被繫令震捏告王徵書包占孀婦又牽涉官吏受  
賕赴京翻控鞠官吏事皆誣孀婦亦有夫張九昌在論震父  
子罪皆軍又與初公彭齡倭公什布方公維甸同公與會議

籌辦三省鹽務奏曰<sup>臣</sup>等會議得河東鹽務扼要首在招商而民人所以不願充商與官吏得以藉端勒索者皆緣充商易於賠累使殷戶不以充商爲累則官吏自無所用其勒索<sup>臣</sup>等查晉省商人所以易於賠累者實緣從前原議以賤價定爲長額一層緣河東鹽務情形與他省不同他省產鹽由於煎熬是以每歲有實額河東則由於澆曬每視天日之陰晴以別鹽收之豐歉其買本旣已懸殊他省行鹽半由水運是以腳價有常規河東則多由陸運夏暑雨而馱載維艱冬祁寒而牽挽不易其運本又多異致所以從前河東鹽務因

地制宜從未有價定長額惟以池產之豐歉與腳價之輕重聽其按照成本長落隨時不復限以定制立法最爲允協商民皆稱兩便維時河東鹽商無力者自退有力者自充並無勒派富戶之事自乾隆八年鹽政吉慶改變舊章倡議定價而鹽法始壞乾隆十年鹽政衆神保定議就彼時現行賤價作爲長額不問豐歉不准增減而商人始困嗣於乾隆二十二十六等年經鹽政薩哈岱兩次奏准增價而原議未協續增無補迨後衆商紛紛告退無人投充鹽政薩哈岱不得已而爲舉報富戶之計自是數十年來人始視爲畏途矣厥

後歷任鹽政或復請增價或更議換商非不屢經調劑而辦理總無良法遂致河東鹽務一壞而不可挽自改歸地丁後各省民販自行營運無論歲歉歲豐價貴價賤皆計足成本脚價之外務獲贏餘方肯出售並未經官限制而百姓久無食貴之事伏思立法必監成憲而除弊必探本原河東鹽可定價則古法詎肯稍疎乃自一變成規而流弊卽難悉數茲百度維貞之始臣等合無仰懇

聖恩仍照乾隆十年以前成例准三省通商按每年鹽收豐歉成本重輕聽其自定賣價不復限以定額倘有一商抬價居奇則

先虞他商必越境侵賣如有口岸毗連而價懸殊者仍令該商將所以賣價不同之故據實呈明運司衙門詳明鹽政歲底將三省鹽價造冊報部查核如此率由舊章庶可以經久無累實於鹽法有裨所有從前舊商共五十八家迄今家道尙可復充者不過一半而河東舊行引地一百一十九處無可更張現據舊商僉請加招新商分認引地以免一人承充數處致有顧此失彼之弊等語亦屬實在情形似應俯順商情准舊商再保新商分認承辦以爲衆擎易舉之計其口岸有暢滯不一者准於五家互保夥辦中將口岸均勻搭配俾

得挹注哀益互相調劑以免偏枯至吉蘭泰鹽務<sub>臣</sub>等前擬將坐商運商皆在山西招募今查撈鹽必熟習地利方知辦理情形尤必素識土人方免匪徒混跡若人地生疎諸多未便是坐商自應在甘肅就近募充至運商止須家道殷實不虧引課者皆可承充則山西尙可招募惟吉蘭泰鹽斤向用船隻由黃河運至山西省北一帶行銷現准陝甘總督<sub>臣</sub>咨商亦擬令運商自行購買木植造船行銷等語查購買木植係甘肅木商承辦之事從前馬君選係甘肅回民素諳辦理木商情形是以易於請票購買今旣擬在山西另招鹽商專



辦鹽務則鹽商不能兼充木商以致貽誤行銷所有鹽船木植應由甘肅另派木商照舊例在該管衙門請票購買修造以供運商之用所有造船大小丈尺及每隻可裝鹽若干需工料銀若干均由甘肅核定令運商納銀領船裝鹽運至山西行銷後准其將船隻變價以歸商本緣黃河水勢溜急鹽船到晉不能數千里覓人夫將空船挽回磴口也又查從前阿拉善王辦理鹽務之時每歲撈運各夫在內地買補口糧地有定數今鹽池既經入官招商承辦卽與內地鹽場無異其運商口糧應照內地鹽場聽民自便無庸額定口糧數目

報官驗放以杜土棍壟斷把持吏胥藉端需索之弊至甘肅地方經臣倭什布查明向無行銷吉蘭泰鹽斤之處所有向來山西兼食吉蘭泰鹽斤之口外五廳大同朔平兩府并陽曲等四十三州縣應卽定爲吉蘭泰行鹽引地惟各屬均產土鹽自應分別查明除向不需吉蘭泰鹽斤接濟地方仍令照舊完納鹽稅不派引張外餘俱照從前食土鹽外實銷吉蘭泰鹽按數派額試行二三年察看情形再行核定其鹽斤仍照河東每引重二百四十斤并照每引納課銀三錢九分八釐零之數以歸畫一其課卽在寧夏運司衙門征收報解

所有從前民納鹽稅散歸地丁者除所食土鹽之稅仍核實酌留外餘悉撥出歸商完納以免重征至陝西鳳翔府屬一州七縣并邠州屬之長武縣九處舊食花馬池鹽而納河東引課今寧夏既設運司所有該九處引課應撥歸寧夏運司衙門管理又陝西沿河之府谷神木葭州吳堡綏德清澗延川延長宜川等八州縣均濱臨黃河與對岸山西新定之吉蘭泰引地接壤向俱完納稅課聽民自便買食蒙古鹽及鍋鹽花馬大小池鹽不等今吉蘭泰鹽池產鹽較旺且均可由水運順流直下應併改爲吉蘭泰池鹽引地至吉蘭泰爲撈

鹽之地磴口爲發鹽之所托克托城之河口鎮係引鹽入晉  
鹽船停泊轉運要區皆應設官彈壓又吉蘭泰池鹽旣經商  
辦派引行銷自無侵越之虞所有鹽船應請仍准運至磴口  
等處以省脚費沿河所經之河曲州保德州與縣臨縣永和  
大寧吉州等處均對岸與陝西接壤往往有鄂爾多斯鹽斤  
侵越且磴口至龍王辿以下卽吉蘭泰鹽引之地亦應設官  
稽查奏入奉

旨大學士九卿議奏七月初六日啟行翌日抵壽陽縣

命審平遙縣民人張丙乙控該縣尸書白光玢等浮收匿災一案十

一日仍返太原府提訊張丙乙鄉愚誤控與白光玠分別杖徒結案又奉

廷寄以御史涂以軻條奏河東鹽務一摺

發交核議當與初公

彭齡

同公

興

共同商酌原奏簽商宜資熟手籌

運宜擇便途格礙難行皆毋庸議其設官宜歸簡易給引宜為變通二條與現行章程適合覆奏報

聞二十三日啟行授左翼總兵兼總理工務處事務八月初五日抵都寓朝陽門外東嶽廟時

聖駕駐蹕

避暑山莊翌日由京啟行初十日詣

行在

召見命卽歸十三日入城

命往盧溝橋演礮九月復授總管內務府大臣兼管理

咸安宮官學十月

命往天津審南皮縣民婦穆曹氏控捕役陳玉受賄誣伊子穆六爲

竊拷打致死一案初七日由京啟行初十日至天津府會同

署總督秦公承恩鹽政李公如枚前往船屋查看

安福艦並詣

行宮閱工十二日至西沽乘船泝流至王家場查勘板房地盤  
向時東西長六十丈南北長三十丈中有隔淀疊道長三十  
六里以分淀河子牙河今二河合爲一疊道露出者約十里  
餘則水冒地盤上深至尺餘均已成冰對面韓家樹村皆民  
居土屋甚狹隘不能駐劄大營詢之土人言水勢浩瀚取土  
極遠加以雨雪施工尤非易易也皆以情形奏

聞十三日審訊穆曹氏案又

交審天津民人田科案因奏明派隨帶司員岳

安燮張

赴南皮縣檢

驗和留天津自訊田科田科者天津蠹役也乾隆末以故殺

人不承地方官遂以鬪殺論次年卽遇赦鄰有御車者張起妻趙氏頗少艾嘉慶十年冬張外出遺趙在家科乘間起意圖姦遣同院居住之張守亮先往通信入夜科往欲行強趙氏持剪相拒反爲所奪亂扎殆斃令守亮以繩縛項拖入海河冰窟中以滅其跡守亮以冰堅難斃復拖回科張皇歸其兄會姪得祥見其身有血跡問得實科賄囑營兵地方匿報適起回赴縣呈明科忽認忽翻不能成讞會乘機救弟誣指起弟發殺嫂赴京呈控和奉

旨審辦而科日夜茹刑堅不吐實其家屬又逃匿嚴飭緝拏到案各



悉前情質之會俯首無詞但稱救弟情切從而加功之守亮  
供認如繪仍熬審至六晝夜之久科始輸服取筆自書名押  
於供詞之末犯之狡至此極矣南皮縣檢驗亦得陳玉傷死  
穆六狀惟受賄爲誣論皆如律十一月初五日啟行初九日  
至薊州恭謁

昭西陵查看應修工程敬勘

景陵大碑樓復至

裕陵行禮又勘

詣陵歲修工程十四日回京

命充會典館總裁官專看清字正本是月

賞還花翎

編乙丑九月至是年正月古今體詩爲西館集

十二年丁卯二月

經筵進講君子所其無逸經義恭隨

聖駕謁

東陵

駐蹕盤山

命策騎游山分體賦詩

恩福堂手譜

音

高宗純皇帝實錄告成

賜銀緞鞍馬復

命照料歸架時兩江總督鐵公保奏請河工料物加價

命偕工部侍郎蔣爰亭子蒲赴南河查訪價值四月朔由京啟行初

十日至長清縣境遊五峯山十一日行至第三墩舖北卽分  
路數里許見石坊題曰靈巖勝境再行十里許入寺門徧遊  
佛殿撫舊碑登寶塔然後飯香積飯後乘山櫟至

行宮惜有傾圮復拾級而上白雲洞小憩積翠峯題名石上啜  
茗洞中喜翠柏之攢山覽岱宗而在目到此身心俱遠矣返

僧舍摩挲鐵袈裟行過石坊半里分路越小嶺至灣德歸大道抵長城驛仍是長清境十二日至泰安府出北門先至王母池蓬萊閣漸入山境關帝廟換山輿前逢遇佳處便流覽最心醉者五大夫松下飛瀑清泉聲清心松濤振耳因題十六字於石上曰松吹成籟泉咽似琴人間仙境空外奇音望南天門兩山壁立千仞瘦石崢嶸天風泠然有下臨無地之勢拾級緩登入門約二里許卽碧霞元君廟峯頂爲玉皇廟東則東嶽廟日觀峯西則青帝宮元君後宮文廟一一拜謁遂宿於元君廟之東偏石上題識頗多大觀爲唐開元磨崖

碑古蹟爲秦時無字碑題名於磨崖碑之左紀勝遊也十三  
日夜風未定陰氣甚寒黎明造峯頂浴日養雲閣時忽霽得  
觀日出雖不如雨後之清明然亦壯觀矣下山至岱廟歸驛  
次十四日住羊祜店祜訛爲祐土音讀祐如肉遂改爲羊流  
店又作楊柳十七日抵紅花埠仍是郟城境過此則入江南  
境二十一日至王家營渡河地名毛家嘴距王營三里許水  
勢少緩隨至張家馬頭寓於青江浦觀音寺巷二十二日往  
河口減壩高堰等處查看並派司員分赴徐揚密訪物價初  
九日

交審丹陽縣民李陳聯控勒折浮收一案十四日與蔣公具摺奏曰  
臣等於四月初一日自京起程經過沿河地方卽將物料價  
值留心訪問四月二十一日抵清江浦隨派員外郎多麟代  
主事朱淥前往徐屬之豐蕭銅沛邳睢桃宿各等廳主事錦  
明陳啟文前往揚屬之山安揚河並常鎮屬之江防揚糧各  
等廳不令其假手河員分投採訪據該司員等查得各項價  
值內惟鐵器煤炭等物價值尙不甚昂磚石灰汁土方等項  
尙可量爲節省其稽料柴料麻斤草柳等項均較該督等請  
加之價有增無減臣等以現在料價正當新陳不接之時又

甫經興辦各工價值自昂未便援爲比例復經移取該河督等歷年批准時價原案詳加查核所有歷年批准之價與現在請加之價均屬相等<sub>臣</sub>等逐一檢查謹按原奏分款酌擬開列清單恭呈

御覽伏候

欽定至物價之低昂視年歲之豐歉工程之多寡與夫地方遠近不同時價互異原難概定近年料價增昂實由大工疊興收成歉薄所致將來年豐工減物料日平應責成該督撫並河<sub>臣</sub>等隨時確查據實奏減不得仍前開報致啟工員虛冒之端

卽遇收成少薄非實係興辦大工歲收過歉萬難辦理者不得率請加增庶足以昭限制而杜浮冒再臣等抵浦以來將河工利弊博加採訪從前之弊在於辦工之不實現在之弊又在備料之不豫每年額備歲料例於七八月間卽行給價採買近因籌撥較難未能及時購辦每遇汛期工險臨時急購料戶旣得居奇而其中不肖工員又或借急購爲詞虛抬價值種種弊端由此起設使於新料登場之際將歲料全數購辦並將另案所需寬爲籌備分貯要工處所則遲早祇爭數月而節省不啻倍蓰且遇緊要工程得以立時搶護所



關尤鉅其預辦料物查明實貯在工卽以用去之料核其所辦之工廳汛各員無從隱匿虛報裨益實非淺鮮應請

旨飭下督

臣

河臣將每年實需歲料若干應行寬備若干酌需動撥

若干內可節省若干並如何預爲籌備之處詳細妥議請

旨辦理至河道工程欲其確核錢糧首在嚴查工段從前所辦各工多以例價不敷通融冊報現在核議各價倘蒙

恩准則各項工需俱係實用實銷不得再有藉口設加價之後而所報丈尺仍有未盡確實之處則糜費錢糧較前更甚應責成督臣河臣等切實稽查於報險之初確勘情形辦工之際嚴

查做法事竣之後確核工段並於每年水落歸槽之後派委  
不兼河務之司道大員將一年辦過各工通勘結報河臣等  
仍親身分投嚴勘如稍有浮冒情弊卽將承辦工員並扶同  
出結之司道一併嚴行叅辦庶工歸實用弊可漸除帑項亦  
不致虛糜矣又片奏臣等在清江查訪物料價值時有籍隸  
淮安之捐職通判張如璧具呈高堰山盱石工堤工近年積  
弊內稱估辦並不乘時廳員營員袁德輝劉志剛鄭善寶程  
啟泰等一味瞞混辦工先不照估築壩車水見底忽生一摸  
砌之法將石塊約畧安放椿木全行偷減侵蝕又向來興辦

土石工程估用土方係分遠近實價該廳員亦不照例取土  
 等情前來臣等伏查堰圩堤工係淮揚保障豈容該廳員等  
 任意偷減草率滋弊是否屬實當即移咨督臣河臣詳細確  
 查並面詢該職員張如璧從未在該督衙門具呈無所用其  
 迴護相應請

旨飭交督臣鐵保會同河臣戴均元徐端徹底根究嚴行查辦奏入  
 諭曰著將原單發交工部按其所列各款先查明例價若干鐵保等  
 原奏加價若干此次英和等酌擬價值若干再統將三項比較英  
 和等核擬之價較之例價數目計多若干較之鐵保等所開數目

又復增減若干逐一核對分晰計算開單進呈再降諭旨又奉

旨會同河臣查辦河員偷工減料一案覆奏曰查向來石堤工程凡  
遇拆修到底之工估築越壩車水清底簽釘馬牙梅花椿木  
照例鋪底丁順間砌後槽土按一尺二寸爲一層夯礮堅實  
此辦理石工之舊章程也所謂摸砌者大水漲發之際不行  
築壩岸水僱用水摸夫匠於水中摸准部位排砌釘石後槽  
土用葦柴鑲襯再壓重土以期閉氣臣等詳詰袁德輝等僉  
稱嘉慶十二年並無摸砌工段惟嘉慶十年四月水長至一  
丈三尺四五寸十一年五月長至一丈八尺三寸實爲非常

異漲所築越壩一遇風浪土卸椿漂勢不能築壩清底而隄身殘塌危在呼吸祇得不惜重價僱用水摸夫匠於水中摸準部位丁石排砌仍於水落後另行拆做現已拆砌多段開單呈驗<sub>臣</sub>等率同司員道員前赴堰盱履勘查得通判鄭善寶承修十一年石工十二段內有摸砌工四段今已改砌三段通判袁德輝十年分石工八段內有摸砌工二段尙未改修十一年分石工十二段內有摸砌工十段今已改砌四段守備劉志剛十年分石工九段內有摸砌工三段今已改砌二段十一年分石工十二段內有摸砌工五段今已改砌三

段守備程啟泰則並無摸砌惟摸砌既係救急權宜則水落歸槽之後自應作速拆修以資鞏固何至今尙有未改工段實屬遲延袁德輝劉志剛應革職鄭善寶應革去頂戴勒限改修其所控偷挖二堤土方一節查係各員所帶人夫貪近取土亦責令該上司另行派員補修至張如璧控告之由起於索詐均應各科各罪問擬杖徒旋提訊李陳聯據其所控銀匠甘泳春每交條銀一兩索錢一千四百八十文之外加錢一百文漕總卜九成每交米一石浮加九升及一斗二三升不等質之甘泳春實有索詐得贓之事發近邊充軍卜九

成已身故無庸議其餘所控該縣班館非刑及知縣二子捐官於蘇州置產復牽涉鹽當糟棧錢莊詢皆虛捏應於軍罪上量減一等杖一百徒三年奏入報

聞是月得家書知

奎照奎耀

同入泮二十日北歸七月初七日赴園

覆

命詢曰汝之自愛稔知之此次地方供頓當不致過費對曰雖僑居兩月地方所費恐不免盈千累萬

上詫曰汝僕御幾人何費用如此之多對曰臣之僕御及馬夫不過八人蔣子蒲亦同司員四人又各遞減然公館中不能無應

役者加以巡捕兵丁書役人等逐日聽候所有飯食皆地方供應其費安得不多懇求嗣後除督撫被揭被控不能不用欽差此外悉交督撫審辦若不能辦

朝廷安用此大吏倘審辦不公難免復控自有典刑在誰能逃之

上以爲然次日

命重直

南書房十六日

召同軍機大臣進見奉



命與托少司農

津

卽日起身赴熱河審辦前副都統慶

傑

一案帶同

軍機章京押解慶公自海甸行十八日至遙亭遇現任熱河

副都統福

長安

同托公傳

旨問本案情由福公卽原奏人也十九日至常山峪遇熱河總管穆

騰額  
遵

旨令與慶公質對取親供後行是日抵熱河調齊人證查訊慶

傑縱

令伊妻入廟燒香又與弁兵各出食物同吃公東收受弁兵

些微食物並將幫貼銀兩移作僱車公費皆輕罪不議外惟

伊子物故收受所部財物僅照例擬流不足示懲應請

旨將慶傑發往烏魯木齊効力贖罪奏入報

聞二十三日寅刻自熱河行至卯刻到喀喇和屯巳刻與托少司農  
至卡倫門外恭候

聖駕跪

安後隨行仰蒙

召見二十四日隨

駕至熱河

賜果品食物二十五日

賜蜜食一瓶

命至

文廟查看匾對二十八日至小南門伺候

賜食於

如意洲

賞荷囊二十九日

賜御鎗所中鹿肉八月初四日

命帶同御醫視趙少司農 秉冲 病旋覆奏初五日授左翼稅務監督

初九日

命在二道河放馬至十三日始畢共三千一百二十二匹先期奉

特旨命射鵠十二日

聖駕御宮門隨衆射僅中二矢

賞還黃馬褂十九日隨

駕抵阿穆固郎圖

召見問兩兒名爲看題名錄也九月初一日

駕出大營西門至阿濟格鳩行圍初五日隨行至崖口遵

旨看碑

駕御宮門宴外藩侍班

賞荷囊初八日侍班於

烈福堂下普

惠迪吉門

駕至奉

旨仍為對引大臣

賜佛手花糕十三日抵喀喇和屯到報知

次子奎耀

中式順天鄉試

第九十七名舉人十四日抵常山峪遞摺泥首

天顏甚霽十六日抵遙亭

賜小菜食物十七日抵密雲

賜克食十九日回京十月

命偕托公

津

德公

文

李公

鈞簡

赴通州查看温榆河上遊河道奏言

臣等自通州北關外西浮橋至馬家莊查閱溫榆河舊形尙有積水溯尋至果渠村水勢東會潮白河下注致石壩前來源中斷僅憑下游流水溝一帶倒灌之水引至壩前濟運易於留聚泥沙是以歲修乏工日增運務之累仍不能免茲據直隸總督臣溫承惠等奏請於果渠村開河一道引之向南細察地勢北高南下於地方墳墓廬舍全無干礙卽河身所佔並非膏腴之地嘉慶四年八年前倉場劉秉恬等奏請於石壩對面及左近酌開引河俱係兼引潮白河之水其質本濁挾沙而行每多停滯又自東而西其勢橫行未免逆水之

性均經覆勘大臣等議駁今專通溫榆河上游水質最清可免淤阻又自上而下其勢順行無衝礙民居之患且潮白溫榆本係二河一經疏通照舊分而爲二使石壩水有來源不藉倒漾可免逐段停沙於起卸漕糧大有裨益惟事關運務不厭周詳必得逐段丈量俾全河一律深通毫無滯礙方臻妥善實非數日所能奏功該督原估之淺深高下尺寸仍應逐細斟酌其果渠東南築攔水壩一道亦應加增寬厚務期堅實使水勢暢注新開之河至石壩以下流水溝郝家舖一帶均宜通籌妥爲疏濬不致倒仰庶爲一勞永逸恭請

勅下直隸督臣温承惠選派精熟河務之員會同原估各員覆加詳

勘將上下游開挑做法詳悉奏明請

旨奏入報

聞次子奎耀聘前湖南巡撫高公杞女是月為之授室十一月管

御茶膳房事務署掌院學士

賜貂裘一襲十二月充文頴館副總裁

十三年戊辰二月五女備選

賜翠鈿綵緞并

命先出以免懸望三月恭隨



聖駕謁

東陵由南海子

幸天津

賜食於柳墅

行宮

賞賚有差閱

召試卷

命大挑舉人四月閱新進士覆試卷

朝考卷署掌院學士是月

廷試卿僚翌日

諭曰汝未及巳刻卽交卷向取汝第一此次急就章應抑置第二五月充

武英殿總裁

文淵閣提舉閣事署戶部左侍郎軍機大臣六月調戶部右侍郎管理錢法堂

奉宸苑事務七月署武備院事

聖駕秋獮和未扈從

命往

孝淑皇后陵寢查勘工程具摺附報恭遞摺至適值

簡命順天鄉試主考和名在內因扣除不另易滿員是科僅曹文正

公 振鏞 潘芝軒 世恩 入闈九月揭曉長子 奎照 中式第四十

二名舉人迨迎

鑾於兩間房併謝子中式

恩蒙

召對行殿

諭曰朕豈不憶及汝應查工復令汝充主考乎特簡用乏人耳及闈  
汝摺因思乾隆年間每有專用漢員之時故但除汝名不復添派

孰知是汝子應中耶和免冠稱謝十月長孫女生奎照出旋殤署

刑部侍郎十一月以內務府大臣廣興扣減

宮中衣料奉

旨拔去花翎降為三品頂戴十二月因查抄廣興家產認真蒙

恩賞還頂戴旋又

賞還花翎

賜貂裘一襲

編丙寅至是年五月古今體詩為水部集

十四年己巳是歲恭遇

仁宗睿皇帝五旬萬壽元旦日午刻

錫宴於

太和殿凡與宴者咸朝服因內務府有執事服蟒袍侍班二月

經筵進講刑期于無刑經義署護軍統領三月舉行

恩科會試以大學士浙江費文恪公淳為正總裁禮部尚書安徽王

文僖公懿修并和及貴賓西閣學慶副之先進宗室卷得崇

碩瑞林惟勤三人四月揭曉得孔傳綸等三百四十一人六

月

命往通州辦理查抄花戶高添鳳事件七月復署護軍統領并上駟

院事務九月恭進

萬壽頌冊進

膳

賜蟒袍大緞各一長孫

錫嘏

生奎耀

出後五歲殤十一月次孫

錫祉

生奎照

出十二月因工部書吏私雕假印冒領銀兩奉

旨拔去花翎降三品頂戴管

清漪園等處事務是年遵

恩詔加一級為經太夫人及本身妻室請

封

十五年庚午轉戶部左侍郎四月因承辦

萬壽典禮

賞還頂戴六月七子 奎顯 生旋殤

命偕候補四品京堂初公 彭齡 赴

盛京查辦參務二十日自京啟行二十六日出山海關登澄海

樓二十八日抵高橋沿途望海心目一爽中後所之東二臺

子望海店不若三義廟塔山高橋西嶺上之真且近也望海

店所見者海之分流隔一小山乃是大海過杏山松山二十

九日渡小凌河抵大凌河七月初三日過胡家窩棚地向以

難行著名初四日至巨流河凡三過渡始登岸田禾盡在水  
中河與地幾不能分每渡止小舟一葉僅容一車數馬初五  
日至永安橋適有民人宋剛旗人郎文舉呈控參務隨面訊  
取供是日抵奉天省城與初公

奏言

臣

等行近奉天省城有本處開燒鍋之民人宋剛等四十

五家呈控閻錫棟傅應蘭等名爲包門各立參園徧種秧參  
固結局員把持參務復將本年自京駁回秧參勒令各燒鍋  
分領臣等卽馳抵該省提訊閻錫棟等供稱始設欄子於邊  
門內繼移營子於邊門外皆係栽養秧參查種養秧參八千



例禁若謂積年採挖漸多參苗不能豐旺何以奉天尙能留  
養刨夫不下萬人之多是山參本爲豐旺而以所種秧參交  
官謂非走漏其誰信之至於局員捏稱不能分別山參秧參  
尤爲狡賴卽如閻錫棟供內有前任局員尙奎認參眼力最  
高之語可見各局員無不洞悉情形其刨夫費用有燒鍋出  
銀又有般規幫貼現據各供有局員協領阿爾嵩阿吉勒杭  
阿佐領吉齡阿劉傑知情不究前任局員協領札布札那曾  
索修廟銀兩是各該地方官員有通同舞弊情事請將局員  
先行摘去頂戴解任質審奏入奉

旨革札布札那職阿爾嵩阿吉勒杭阿吉齡阿劉傑俱解任尋以阿爾嵩阿等堅不吐供札布札那畏罪自縊其生前字跡有控

貴慶需索事奏奉

諭旨貴慶解任候質阿爾嵩阿等均革審七月與初公

奏言據閩錫棟等供在八家子尙家河等處栽養秧參每年將參枝大者在邊外當年做好所得細小秧苗用樹皮桶裝就帶至邊內連桶埋在園中用布棚遮蓋不令見日到得次年出土如有大枝可做者於春間仍連桶帶出邊外交刨夫蒸做攪入參包內進邊其交參入局送參到京各攬頭均有餽

送銀兩應論如律至貴慶惟收受監督水禮并無需索之事

奏入報

聞又與初公會同將軍富文誠公<sub>俊</sub>等奏定參務章程奉

硃批軍機大臣議奏十八日恭謁

福陵十九日恭謁

昭陵三十日啟程秋風颯爽乘款段馬賦歸渡巨流河非復來時水

勢浩瀚八月初一日抵二道境接

行在刑部公文

交審遼陽正黃旗喇嘛壯丁尤俊控告香火地逼交差銀一案翌日

返轡初二日復至瀋陽會同

盛京刑部侍郎崇公祿奉天府府尹繼公善提案傳人審得原

告並無虛捏惟侯尤俊解到卽行定讞正在商酌間於十二日崇繼二公接奉

諭旨以和與初公業經起身此案卽交二公勘訊予遂與初公將取具供狀移交二公接辦於十三日啟行十七日至中安堡紆道進廣寧縣東門出西門至北鎮廟小憩乘馬登山飯於觀音閣山石幽峭長松翠森對之銜杯心目一暢復登望仙亭遠眺石洞流連賦咏至夕言歸宿於常興店二十二日至山

海關奉

諭曰朕於十六日自熱河啟蹕巡幸木蘭本日已駐蹕阿圭圖大營英和等前來須在哨門外祇候初彭齡著毋庸馳赴行在於何處接奉諭旨卽取道先行回京英和本係派出隨扈之員著緩程來至張三營候朕出哨時隨從回京二十三日初公先歸余自關行二十七日至三河縣由城向西北行過馬房傅家莊由兔兒山西腳下再向北行宿於沙嶺郝善人宜山堂老人家二十八日路指西北過茶棚循山轉向東北涉水入密雲縣城過九松山抵石匣城二十九日過青石梁奉

諭曰英和於抵哨門後毋庸在彼等候接駕卽著迎至行在復命扈  
蹕並毋庸向圍後繞道行走三十日抵熱河九月初三日進哨門  
紅樹青山應接不暇至六道河大營遞摺復前進約十里路  
旁迎駕

### 召對行殿

賜小刀火鏹佛手一盤麕一隻十七日歸至園寓十二月房山涿州  
放賑遲延民婦霍靳氏於

阿哥經過半壁店跪道求賑致叛

阿哥馬韉

命偕刑部尙書勒公保鴻臚少卿盧文肅公蔭溥查訊論霍斯氏如

律涿州知州趙宜霖房山縣知縣沈一仁皆遣戍

十六年辛未三月恭隨

聖駕謁

西陵幸五臺

賜食於臺懷

行宮

賞賚有差閱

召試卷閏三月次子奎耀中式一百五十二名貢士

蹕路至直隸省城拏獲冒差人犯

賞還花翎并黃馬褂三孫

錫淳生 奎耀

出四月

殿試 奎耀 名在三甲五十六名

朝考閱卷日桂文敏公 芳 至園居和接見云今日散直較晚何

尙枉顧答云非過談也奉

旨來為告知公子名已入選俾先得聞為快也當即向上免冠頓首

五月朔 奎耀 改席吉士七月女字學士法公 式善 子本科進

士內閣中書 桂馨 署上駟院事務十月初五日聞 經太夫

人有微疾下直急歸 太夫人問因何回寓以有公事對始



不見責罪進藥餌至子正棄養呼搶無及治喪如儀謹次行

狀於十一月初四日合葬於長營祖塋昭穴 文莊公傳

察夫人之次十二月四日孫錫瓚生奎照出後六歲殤

十七年壬申正月十五日釋縞素自居憂後屢蒙

仁廟番問傳

旨英和百日釋服恰值上元令節應穿蟒服著侯二十三日忌辰之

期再出供職遵於是日恭請

聖安三月恭隨

聖駕謁

東陵幸盤山及南海子二十日晾鷹臺

大閱恭進頌冊先期

命領左翼翼隊至是躬擐甲胄佩橐鞬入隊禮成

賞賚有差又

特賜蟒袍大緞玉珮玉玦四月五孫

錫田生奎耀

出旋殤五月校刊

高宗純皇帝聖訓擡頭錯誤三處降為候補三品京堂留左翼總兵

任仍在

南書房行走管理

清漪園等處事務時

忍菴堂下譜

奇

清漪園無盡意軒失去紅氍如意六月究出竊賊吳幅太

賞還總兵頂戴旋補正紅旗漢軍副都統七月扈

蹕灤陽途中授總管內務府大臣管理

奉宸苑事務十一月調鑲藍旗滿洲副都統授內閣學士充

經筵講官

十八年癸酉二月

經筵進講君子體仁足以長人經義三月授禮部右侍郎時鐵

冶亭王春甫兩先生為大宗伯秀楚翹堃胡西庚長齡汪文

端公廷珍為少宗伯鐵出王門胡汪秀三公及余前後皆出

鐵門其時有春官六座六師生之諺余製聯留署云典禮奉  
寅清粉署重來愧說箕裘延世業同堂聚師弟薪傳遞衍始  
知桃李屬春官恭隨

聖駕謁

西陵幸潭柘及南海子五季父仁圃先生重赴鹿鳴宴五月順天府

循例入奏

上念爲文莊胞弟和之胞叔

特加三品卿銜七月恭隨

聖駕幸灤陽八月次孫女生

奎耀

出後十四歲殤暑

行在理藩院侍郎中秋後一日扈從

聖駕由灤陽幸木蘭舉行秋獮二十日入崖口

布克  
柵子

是夜雨直至二

十三日始止奉

旨減圍出哨九月十五日歸至髯髻山十六日寅初發至半途天始

明遇黃門曹進喜馳馬來問以故知京師有八百里告急報

又行遇戶部員外郎札爾杭阿主事奇昂縱馬直趨反轡同

馳得悉

禁城於望日午刻有賊入已爲王大臣督兵殄滅是日午刻

上得報至白瀾

召同軍機大臣進見

命攝執金吾事卽偕托司農津回京督辦一切並

諭看昨晚山東巡撫同興急遞奏章章內所敘逆犯張見木供稱收

北方是老劉爺伊從前是彌勒佛下界死過多年如今真性

轉生年四十餘歲名劉真空又名劉林號霜木卽雙木原係

單縣劉家莊人嗣緣事改姓黃逃出今或姓林或姓劉或姓

黃住京南二十八里大路旁沙河地方等語當卽遵

旨遣歸中道馬蹶易青驄復行三時許馳百四十餘里戍刻入朝陽

門至

神武門一帶查看兵衛森嚴市廛安堵候托公到並轡行鄙意

以王大臣所調健銳火器二營各五百名京師無所用擬請

喀爾喀親王固倫額駙拉

旺多爾濟

於次日帶赴烟郊恭迎

聖駕托公以爲然比至北署勒相令其子商以前事所見畧同是日

未刻據阜成汛營弁拏獲宛平縣宋家莊地保宋進榮訊係

探訪林清消息申正二刻由玉少農

麟

傳信云聞莊親王在

內獲賊供稱大頭目爲宋家莊林清旣與東撫所奏姓名暗合

又與宋進榮所供相符卽派番役頭目張吉番役高鐸徐永

祥帶宋進榮爲眼目會同永定汛把總田濤連夜前往查拏

一面草奏查辦軍情章疏一面派兵各處防守搜捕十七日  
凌晨入見

皇子並晤在京諸王大臣備悉勦賊情形

禁城已爲肅清惟搜擒藏匿餘匪午刻復同托公旋署商辦諸

務奕貝子紹突入出懷中紙列從逆各賊姓名內有太監名

亟寫出飛啟

皇子在內派人拏縛旋即一一就獲並起出逆監劉金等短刀鐵  
斧申刻張吉等擒林清至面稱本日黎明抵宋家莊適林清  
聞車馬聲誤認爲河南滑縣賊首李文成來援出門探望即



被擒獲置檻車中並擒其同居之安住董惘太二逆屬時莊  
內人聲四起勢將奪犯亟驅車奔伴呼接應者速前又伴呼  
由海子循牆走以疑誤追者車固入海子黃村門矣門舊闔  
因子管理海子事隨傳諭闔門放入門復闔取道大紅門進  
永定門押解到署而張吉等驚魂未定述前事猶色沮語吃  
也訊問林清供認大逆不諱其悖謬之語如前身姓劉又係  
金星轉世每於入定則金星斂光開眼則金星布采爲同教  
衆人所共見所習天理教經內有八月中秋中秋八月黃花  
滿地白陽出現語句本年應闔八月則九月十五日仍是閏

中秋故欲謀逆今事不成棄却臭皮囊以應劫數等語隨調兵二百名將該逆押送刑部卽令兵丁在部監衙門牆外週防差本衙門主事福珠隆阿筆帖式和綳額六百里馳赴烟郊奏報是夜城中訛傳有賊自城北越牆而進者有自城南越牆而進者舉城驚駭實無其事也取令箭派官持往彈壓毋許張皇將傳信之步甲二人插箭分翼游街示衆訛言始息十八日再行文催開

### 東華

西華門派兵四百名輿逆尸四十六具出咨刑部押解所獲活

賊數名認尸文行而終不報連接

廷寄知蒙

恩已授步軍統領並正藍旗漢軍都統

恩賜軍功加三級十九日

聖駕回京恭迎於朝陽門內隨入

乾清門散直仍寓於署二十一日請印信合符令箭歸舍授工

部尙書署正黃旗漢軍都統管理西洋堂事務十二月

賜紫禁城騎馬加 太子少保銜

十九年甲戌正月

諭曰前據侍郎吳璥請開捐例當交戶部核議具奏茲據潘世恩蘇  
楞額議請暫開捐例盧蔭溥桂芳趙秉冲議請將常例推廣加增  
托津因甫經回京二摺俱未列名推廣常例事多格礙難行暫開  
捐例能否於經費有裨或於此二議外別有良策可裕國用著派  
曹振鏞托津鐵保英和四人再行妥議具奏臣英和奏言臣受  
恩深重凡有所知無不罄竭血誠直達

天聽此事潘世恩等以常捐銀數行之已久未便議加盧蔭溥等以  
節次開捐有名無實持論各有所見臣等四人公同會議之  
時意見亦未必盡合臣若稍涉依違迹似和衷心同漠視恐



節次展限延至三年得銀六百餘萬今距土方例僅止二年恐尙不及此數徒有虛名竟無實濟且捐例自開卯訖截卯一年不能竣事加以展限約需二年近來人心機巧相率觀望不肯上兌又或一人報捐數項統俟截卯之日探明某項人少方肯上捐收呈人數雖多上兌實無此數臣曾任戶部侍郎知之最詳且須遲至二年之外方收二三百萬但觀歷次所收銀數卽知此次未必大效所謂人情踴躍等語不過紙上空談其實大捐之開漢官得以出結吏胥得以沾潤銀號得以通融而於

國家經費未見實有裨益現在雖當需用之際

國家庫藏可支何必圖二年後之二三百萬金致天下羣知

國用不足至於加增常例誠如

聖諭事多格礙難行此內如封典職銜富家藉圖榮耀加級紀錄外  
官糞抵處分酌加銀兩未必便致觀望然爲數無幾至貢監  
生一項有鄉民藉以支持門戶者亦有士子藉以入闈者若  
遽議加增不免物議沸騰且於經費未見有益臣查戶部原  
奏現有軍需善後並河工撫卹各事宜通盤籌計約需銀一  
千萬現在內庫存銀一千二百四十萬若少爲支用加以各

處商捐又前經奉

旨停止各處工程并暫停

巡幸每歲可節省銀百餘萬一時足敷辦理惟應於此時預籌萬年  
經久之道務使入浮於出歲有所餘則

國用常足不僅爲一時苟且之謀辦結一事卽爲塞責現在開捐  
無論不能得一千萬之數卽得一千萬之數將現在軍需河  
工撫卹各事辦結而歲入歲出

國家大計亦應預爲籌畫臣愚昧之見開捐不如節用開捐則暫  
時取給節用則歲有所餘



皇上至聖至明洞悉直隸辦差不無藉資民力特降

諭旨今歲暫停謁

陵中外臣民無不同深感戴臣伏讀

聖製宋孝宗論以天子之孝不同庶人

聖謨廣大萬世定論蓋天子之孝在愛民保國始為丕成先烈不比

士庶墳園密邇必藉春秋霜露克展孝思嗣後

皇上謁

陵之典或三年或五年始一舉行則民力益得寬舒至木蘭秋獮肄

武習勞聯絡外藩為

本朝家法然臣屢經進哨查看蒙古情形迥非昔比昔之蒙古馬匹衆多樂於從事今馬匹蕃庶不能如前每歲行圍不無賠累恭查

世宗憲皇帝時卽未舉行秋獮嗣後秋獮亦應請酌定年限間歲一行於肄武綏藩大典仍不致有曠廢無庸每歲前往如此則國家經費所省者歲不過數十萬而於直隸民力蒙古生計所全實大裕國之道先求裕民十年計之休養生息日加富庶矣各處工程奉旨停止每歲可省數十萬百餘萬不等我

皇上於節用之道業已講求但天下各項無名之費不一而足分計之則爲數無多統計之則所費甚鉅惟在承辦之人實心實力爲國爲民苟於

國體無傷卽不得避苛刻之名任其糜費卽如裁撤武官名糧添給養廉一事係乾隆四十六年奏准武官役使兵丁勢所不免其時建議者因庫藏充盈奏添武官養廉裁撤名糧在彼時原係覈實辦理但自裁撤之後未必能禁止天下武官不復役使兵丁而驟添此項養廉百餘萬初由耗羨項下給發繼因耗羨無存遂致動用地丁正項

國家經費有常因一時庫藏充盈不思久遠之計遽行添設一年百餘萬三十餘年計之卽三千餘萬臣聞其時阿桂卽有恐數十年後經費不支之奏可見老成謀國務期久遠應請

勅下部臣詳查一切正項經費之外歷年添出各款斟酌輕重可裁則裁可減則減務使歲入之數浮於歲出一時不見有餘積久行之

國計日臻充裕矣節流之道旣應講求開源之計不得以事涉言利概行斥駁夫損下益上謂之言利若取天下自然之利公之天下且可贍養人民取

朝廷舊有之利還之

朝廷不致侵吞官吏何爲不可伏查新疆地方自古未入版圖我朝平定之後歲支兵餉百數十萬內地頗受其累其地向有金礦銀礦恐聚集多人滋生事端久經封閉竊思天地生財原以供生人之用開之而礦苗旺盛裕課足民固屬全美卽或礦苗消乏不敷工本而工本自散在民間究竟天地間多此一項流通亦爲有益況新疆礦廠自開關以來未經發洩盛旺可知如辦理有效足敷該處兵餉則內地經費日見寬舒其他各省礦廠亦俱久經封閉棄同泥沙臣伏思天下大計東

南洋貨西北皮貨以貨易貨者固多而以銀易貨者亦不少兼之器皿首飾裝飾等消耗金銀之處不一而足中國金銀有日減無日增安得不致短絀則莫若取諸礦廠以補消耗之數應請毋庸封閉或官爲經理或任富商經理無論所得多少取之於天並非取之於民卽使官吏難保侵漁富商或飽囊橐總係取棄置之物以濟生民之用實屬有益無損且可贍養貧民雖聚多人而多人卽藉以謀生人有謀生之路卽無滋事之人慮其滋事不令謀生未免因噎廢食如蒙

俞允請

勅伊犁將軍並各直省詳查奏

聞辦理仍須

勅諭不得畏難苟安寬其罰賠俾有贏餘則人樂從上下交益又查  
戶部入官地畝一項乾隆年間入官者姑不具論卽以和珅  
福長安兩家而論入官地不下二三千頃此項地畝至今並  
未升科臣久任戶部侍郎與諸臣屢飭井田科司員行文查  
催無如直隸地方官奉行不力大約此項地租歷年盡飽胥  
吏之橐且風聞有以城薄抵換膏腴之弊應請

勅交戶部查明嚴催直隸總督作速升科無令隱匿侵漁抵換於

國用亦有裨益以上二事一則取天地自然之利一則取

朝廷自有之利並非取之於民雖爲數不能預定或亦開源之一

端我

皇上勵精圖治躬行節儉愛育黎元諸臣能仰體

聖意盡心盡力無玷厥官定可感召

天和年穀順成百物蕃昌

天府曰臻饒裕

臣

世受

國恩仰見我

皇上籌備軍需籌賑籌河



宵旰焦勞臣實不敢以取給大捐苟且塞責謹就見聞所及披瀝直

陳後議開捐例奏遂寢二月

經筵進講經正則庶民興書議調吏部尙書正藍旗滿洲都統

復管

咸安宮官學事務四月長子奎照中式第六十八名貢士

殿試二甲第十六名

朝考入選次子奎耀散館列一等十七名授檢討五月奎照改

庶吉士六月奎照充

武英殿協修七月奎耀充

文淵閣校理八月任崇文門正監督是月

聖駕恭謁

東陵留京辦事自是年至道光元年咸應是

命十一月

賜貂裘一襲

命暫在軍機大臣上行走兼署戶部尙書十二月六孫錫章生奎耀

出

二十年乙亥二月

經筵進講仁民而愛物書義七月

命查戶部三庫八月三孫女生

奎照

出九月

奎耀

轉補侍讀十月感

冒請假

命乾清門侍衛容

照

帶醫診視又派軍機章京秦

繩會

看視病勢

二十一年丙子二月

經筵進講善教得民心書義三月恭辦

御製文二集成

賞賚有差時臍間患癰力疾趨公經

聖明鑒及

諭請假調理

派御醫診視四月 奎耀 充

日講 起居注官五月患處破病勢減十一日

命工部尙書蘇公 楞額 傳

旨好爲調養著於六月初請安次日令 奎耀 遞摺謝

召見 奎耀

諭曰汝父患處初破必使新肌結實方可繫帶六月初間尙不可出  
著於六月二十日外請安其時內務府具奏王大臣侍衛等  
賞參告假人員不應與特蒙

硃筆點出照舊

頒賞六月十八日銷假

面諭尙應節勞不必每日下園和請假三月致厯

宸懷每見臣工殷殷

垂問

温諭展限至再至三雖竭血誠難以言報也閏六月

命稽察會同四譯館署工部尙書七月

聖駕幸灤陽因兼任過多請開繁要之缺得

旨解兼轄者數處旋署戶部尙書十月

賞海龍馬褂一件十二月復管總理工程處事務

二十二年丁丑署掌院學士並教習庶吉士時奎耀官侍讀

奎照在館肄業人稱佳話

命赴內閣與大學士輪閱本章

聖駕謁

東陵奎耀以講官隨扈

命奎耀途中恭繕

御詩四月閱新進士覆試卷奎照散館名列一等十名授編修五月

閱

朝考卷七月署鑲紅旗滿洲都統九月以督緝捕務奉有實屬

可嘉不愧步軍統領之

褒並蒙

恩開復降革處分共二十案是月

奎耀

越兩庶子授侍講學士實非

分之

榮也閱覆試武進士弓石馬步射十月

奎照

授侍講其缺卽

奎耀所

遺

命考試王貝勒子弟馬步射揀選下第武舉是月四孫女生

奎照

出

十一月因擎獲執旗應滑縣賊匪之逆犯屈名兒蒙

恩賞貂褂一件仍加一級紀錄二次十二月

奎照

充

日講 起居注官

二十三年戊寅正月繕進秘殿珠林石渠寶笈三編蒙

賜開復降留罰俸處分共三十案並

賜十二章金線蟒袍一襲大卷宮綢二連二月大考翰詹次日蒙

召入示曰汝子

奎照奎耀

試作

耀

當在二等

照

次之今日閱卷未嘗

宣露一字俟拆封後看若何及定等第耀居二等照列三等仍為

滿洲第二名越日

聖駕詣東嶽廟

命小黃門傳



諭云文章自有定評日昨所斷竟不爽當卽叩頭欽佩無地是月五

孫女生奎耀出五月重修明鑑

命充總裁官

派點驗八旗各營甲器六月恭刻

御製全韻詩成

賜綽紗蟒袍一襲庫紗二件七月署掌院學士正白旗滿洲都統九

月六孫女生奎照出十月

聖駕東巡迴鑾

賜染貂帽沿水獺皮錦州韉小刀火鑷叉

賜海龍褂一襲十一月奎耀授詹事

二十四年己卯為

仁宗睿皇帝六旬萬壽之年元旦蒙

恩開復罰俸處分共二十九案泥首於

神武門復蒙

親賜荷囊是日午刻侍班

太和殿如己巳之儀吏部進

京察本

交部議敘有辦事認真之

褒二月

經筵進講故為政在人取人以身書義

奎耀

授通政使三月署

正黃旗漢軍都統四月闈新進士覆試卷又闈

朝考卷闈四月閱庶吉士散館卷五月調鑲黃旗滿洲都統六

月奎照授少詹事七月署

御藥房太醫院武備院事務八月復任崇文門正監督鑲紅旗

滿洲都統九月在香山進

膳蒙

賞資有差十月

萬壽節宴於

正大光明殿

親賜御酒荷蒙

溫諭

賞玉如意及大小卷緞綢線縵是日崇文門進

膳又

賜蟒袍大緞十九日文穎館火帶領官兵撲救

交部議敘加一級又

賜貂裘一襲考試王貝勒子弟馬步射十一月

特賞黃纒長柄刀鎖子甲烏鎗靴頭刀劍奎耀稽察左翼覺羅學余

自己未

派是差至癸酉始卸事兒復繼之拜

恩非淺是年遵

恩詔請本身妻室

封

二十五年庚辰三月管理

武英殿

御書處事務奎耀每遇奏事之期即蒙

召對屢詢以汝父今年五十歲記是四月十四日生辰奎耀退直爲

和述之竊念

聖心垂注微臣恐馬齒加增疲於驅策耳至四月朔

賜對諭曰前問奎耀知汝今年五十歲欲

賜汝以詩汝當預備迎接使臣隨泥首對曰臣自問何人仰沐

生成至優極渥鞠躬盡瘁圖報維艱恐

主上恩深臣下福薄逾分之榮滿盈是戒請稍減天淵之澤庶勉傾

葵霍之忱令臣子奎照奎耀赴

闕祇領已足爲儒臣榮幸矣當蒙

俞允屆期率兩子至香山

靜宜園宮門恭候內使頒出

宸章扁額並壽佛玉玩陳設綢緞各九件命兩子率鼓樂導引至舍  
設香案叩頭供奉

御製詩曰積善多餘慶家聲定圃留材能肯堂構治足紹箕裘爲政  
誠無忝殫心實有猷香山壽星現大衍始添籌同列中未有以五  
十

賜壽者非常異數夢寐難安而

御詩中呼先臣以字而不名尤曠典也是月閱新進士覆試卷因審

辦兵部遺失行印案月餘未得實情奉

旨拔去花翎後九日案情得實

恩旨賜還闋新進士

朝考卷五月兼總理工程處事務七月呈進

御製詩三集樣本

賞伽楠香朝珠顧繡蟒袍

聖駕幸熱河

命署戶部三庫鑲白旗滿洲都統二十七日凌晨接

行在六百里驚聞



仁宗睿皇帝於二十五日戌刻

龍馭上賓呼天搶地痛哭稽顙遵

旨一面奏知

皇太后一面催送

梓宮起行並傳知在京王大臣官員即日成服二十九日齊集哭臨

嚴飭兩翼八旗五營十六門晝夜稽察添派官兵盤詰奸宄

司員筆帖式分駐各處彈壓本報到京知奎照蒙

恩擢授詹事是日起齋宿於北署旋蒙

皇上簡派恭理喪儀八月初八日

天安門外宣讀

遺詔王公文武百官紳士耆老咸傳集行禮舉哀二十日恭迎梓宮於蘭溝伏地呼號不能起立於

蘆殿行禮後入城次日再往清河晚復入城二十一日五鼓至清河恭迎

梓宮啟行由安定門入

東華門安奉於

乾清宮自是每日三奠如儀九月二十七日

皇上登極朝服行禮預飭所屬官兵屯於

禁門外

命充

實錄館總裁授軍機大臣兼稽察欽奉

上諭事件處授閱兵大臣初九日

賞

遺念染貂冠一頂皮袍褂一襲綿紗袍一領荷囊三玉玦一靴一雙

初十日恭送

梓宮安奉

觀德殿

上居

永思殿倚廬十六日大祭後

上還宮王大臣官員釋縞素歸私第十月調戶部尙書蒙

特賜黃面紫貂端罩一襲織染局元青素綢一連十一月初九日  
命入

內食昨是日

皇上初御

乾清宮聽政十二月初二日

派出恭捧

恭慈皇太后金寶禮成

皇太后賞大卷綢緞四及大小荷包是月

賞箋紙管理

御藥房太醫院事務先是九月間面陳直省陋規請清查定額

作為府廳以下辦公銀兩事交各省議茲兩江總督孫公玉

庭議為不可行事遂寢奉

旨不必兼軍機處行走兩奉

諭旨有人本明白性復敢言及才力可取辦事認真不避嫌怨之

褒是年遵

恩詔請本身妻室

封

今上御極元年辛巳元旦侍班

上親賜荷囊自是每歲咸邀是

賞正月

命入

內食胙是後咸與上年

覃恩次孫

錫祉

得五品廕生三孫

錫淳

六孫

錫章

得七品廕生至

是

題准三月

命署正白旗滿洲都統三庫三山錢法堂事務

仁宗睿皇帝梓宮奉安

昌陵禮成因恭理喪儀及任內務府大臣

賞隨帶加二級四月

粵祭

仁宗睿皇帝升配

南郊紀錄二次

命閱考試試差卷

命僧戴可亭先生均元至王佐村

孝穆皇后福地相度形勢

賞大卷實紗二連五月

賞織染局屯絹袍褂料各一六月奎照充順天鄉試監臨官七月

管總理工程處署戶部三庫

武英殿

御書處

御茶膳房事務

聖駕謁



昌陵二十日五鼓

命出城查看道路先是十八日亥刻大雨是時平地水深數尺馳

馬回至西安門

上已啓蹕奏明水勢

上還宮改期二十二日

聖駕駐黃新莊仍不得進二十四日

回鑾九月

命承辦

萬年吉地工程與莊親王綿

課

大學士戴可亭先生

均元

阿少司

空克當阿

同經理署吏部尙書喘疾發一日未入直

命內務府大臣常公

福

來視次日卽趨直

賞御用黃辮大小荷包各二對縹絲蟒袍一襲十月二日

皇上初御乾清門聽政授

奎照

內閣學士兼禮部侍郎銜管理

御茶膳房事務十四日赴馬蘭峪十八日卯時

萬年吉地開工

二十一日回京

賞織染局緞袍褂料各一十一月

賞緞綢有差十二月

賞磁器江綢

賜御書福字自是歲終咸膺是

賞歲除蒙

賞麕鹿自後咸與是年七孫

錫霖

生奎耀

出後十三歲殤

二年壬午正月二日退直喘疾發

賞假十日

命乾清門侍衛容

照

帶醫診視初八日疾再發內務府大臣常公

福傳

旨命多養時日大愈再出供職

賞織染局綢袍褂料各一吏部進

京察本奉

硃諭戶部尙書英和管理部旗內務府事務均臻妥善且於步軍  
統領衙門尤能不避嫌怨管轄嚴明著加恩交部議敘當具謝

摺令奎耀恭遞仰蒙

召見奎耀

恩諭有加二十八日銷假

召對賜坐舊制蒙

賜坐叩頭卽坐自嘉慶四年成哲親王始謝而不坐遂以爲例至

是面奉

諭旨仍循舊制

命管理

清漪園等處事務二月朔祀

神因管

御膳房例有執事不應入座

特賜膳桌胙肉其後皆如之初二日隨扈起程至燕郊

命偕文秋潭宗伯孚先赴

裕陵恭查

隆恩殿柱木情形初四日在隆福寺覆

命面諭回京充會試正總裁以山陽汪文端公廷珍蕭山湯敦甫

金釗

及門李芝齡宗昉

為副先進呈宗室卷得保極等四人

閏三月揭曉得呂

龍光

等二百二十三人

賞玉杯晶章等二十餘事恭赴

裕陵查看工程往返九日四月閱考試試差卷

御書處不戒於火帶領官兵撲救議敘加一級

賞庫紗葛紗織染局屯絹袍褂料六月署吏部尙書掌院學士管

理戶部三庫事務二十六日

面示

殊諭以戶部尚書協辦大學士伏地悚惶有不許辭謝之

旨次日曹儷筮相國振鏞傳

旨不必赴閣看本以管理事務較多也十月

賞碧霞玗朝珠一盤授掌院學士旋

命以原銜充

日講起居注官奎照署工部右侍郎十四日隨

駕恭赴

昌陵行釋服禮佩

行在刑部印鑰抵京前一日奎照授刑部右侍郎

賜御用馬鞍十一月初七日

命偕戴可亭相國恭題

孝穆皇后神主授內大臣

賜腰刀烏鎗等七事又織染局綢袍褂料十六日

冊封佟雅

皇后以長懋亭相國齡充正使和副之

皇后賞賚有差十七日王妃命婦應行慶賀禮薩克達夫人素有

足疾不能行六肅禮先期奉



諭旨徑詣

皇后宮行家庭禮

皇后賜食加以綵緞翠鈿是日早朝和偕妻同入東華門程春海

思澤

舉唐權文公與縣君同朝興慶宮故事取其詩句為作

比翼朝天圖二十二日

奎照

授鑲藍旗漢軍副都統此即予

己未年初任副都統之缺其時該旗印務叅領為何其惕今

其子何集亦任該旗印務叅領真奇緣也二十七日

命接受

恭慈康豫皇太后絹寶禮成

皇太后賞賚有差十二月

賞黑狐賺縹絲四開袂蟒袍一襲十二月十八日

重華宮

賜福字加

賞御書壽字自是歲以爲常二十一日

景祺閣

賜食觀劇

賞顧繡蟒袍一襲線縐袍褂料二端恭進

養正書屋詩文集樣本

賞緙絲蟒袍一襲寶藍洋呢一版二十三日

上臨小西廠蒙古包

賜外藩食蒙

賜膳品自後歲以爲常二十四日進春帖子詞

賞紙筆後每歲皆如之又

賞大卷江綢二匹是日亥刻內閣漢票簽處不戒于火帶領官兵

撲救議敘加一級

三年癸未元日

錫宴於

太和殿凡入宴者咸朝服因兼管宴大臣並茶膳房

命以蟒袍補服將事是日蒙

恩開復降一級留任處分

重華宮茶宴

賞賚有差後每歲皆如之十二日

上初幸

圓明園

命隨至

安佑宮行禮

命入

同樂園觀劇後每歲皆如之上元前夕

山高水長侍班

命御前侍衛傳

旨賜坐元夕又觀火戲上元後一日小宴廷臣

命入座

賞賚有差自是每歲皆與是夕

命至

含暉樓觀火戲應

制作上元觀燈賦

賞賚有差是月奎耀充會試知貢舉十三日

聖駕臨雍蒙

賜御論是日余以戶部尚書兼

經筵講官奎照任刑部侍郎奎耀任通政使錫祉以廢生在監

肄業三代恭聽

玉音二十二日恭赴

裕陵查看工程往返七日三月初七日隨

駕至

南苑屢

賞御鎗所中鹿肉喘疾發

賞假調養

賜嵌玉盆景兩對隨

駕自

香山回園

賜御花園新放牡丹四枝四月

奎照

充繙譯會試副總裁恭赴

寶華峪查看工程往返七日漢字黃綾本

實錄告成

賞賚有差五月朔日

命至

福海觀競渡

賞宮紗紈扇

澄虛榭北岸迎

御舟叩頭復至

同樂園觀劇午日又

命觀劇

賜御筆蘭花扇及香茶杯扇教習庶吉士六月



命赴馬蘭峪行至通州為水所阻得

旨回城七月二十五日

命隨至

安佑宮行禮

萬壽節

同樂園觀劇

賞賚有差自是每歲得與時貝子綿岫等參奏總管內務府大臣

嵩年挑缺不公又有偷伐橡樹者八月二十一日

命偕湯敦甫少司農赴馬蘭峪查辦詢由意見不合嵩年降級綿

帖  
等罰俸順道至

寶華峪查工往返凡十日九月署吏部尙書隨

駕至香山

命乘馬徧游韻琴齋玉華岫棲月崖超然堂正凝堂試泉悅性山

房諸勝十七日

聖駕恭謁

西陵 奎耀

派出扈從 奎照 調吏部右侍郎十月

皇太后萬壽

命入

同樂園觀劇

賞賚有差自是每歲咸與焉感寒未能入直

命乾清門侍衛桂翰視疾

賜白玉翎管及織染局綢袍褂料十一月

賜貂皮袍一襲時

孝全皇后封妃行冊封禮

命充正使

賞賚有差故事嘉平朔日

聖駕在

重華宮以康熙年間賜福蒼生筆書福十幅用以張貼宮庭從

不

頒賜臣下是年

上御此筆書福字一幅交總管梁寶傳

旨頒賞實出非常

恩遇是月

養正書屋全集刻成恭進

賞緙絲蟒袍一襲大卷綢緞各一連二十八日感寒未能入直

命乾清門侍衛寶齡視疾

四年甲申四月二十日

上受書禮成

特加 太子太保銜

恩命錫祉 俟十八歲時吏部帶領引

見遇缺卽補故事滿漢廕生皆以二十歲引

見此照宗室例以十八歲引

見實為

曠典是月因病請假得

旨開文淵閣提舉閣事稽察欽奉

上諭事件處管理奉宸苑之缺六月八孫

錫蕃

生奎耀

出七月奎

照調禮部右侍郎稽察右翼宗學

五年乙酉正月

奎照

充右翼稅務監督予綜計天儲十年後

或不繼百計籌之如倉存豆粒官用較少每歲所餘嘗有朽

變因思大小官員孰不豢養騾馬奏請於祿糈搭放豆石又

以親郡王等俸米歲支最多而各王公家向皆售于糧店奏

請每季支放折色是時聞濟陽河南粟米豐收先致書于將

軍巡撫商及採買得有覆音以其時市價賤于官價訪聞商

民樂于從事然後奏請兩處各辦四十萬石閩督孫平叔

兩

準聞之書來云是歲臺米亦豐收閩浙兩省足敷接濟十萬

石可浮海來當卽促其速運以時價售買商人踴躍而歸適

南河水路阻滯盤剝官糧粒米狼戾勢不得不行海運四月

初十日

奏言爲通籌漕河全局酌量變通應請暫雇海船以分滯運酌

折額漕以資治河爲一勞永逸久安長治之計仰祈

乾斷

勅議施行事竊查上年江南禦黃壩堵築稍遲致洪澤湖受漲決

口清水潰瀉新漕迫臨不得已而爲借黃濟運之計近日恭  
聆

天語渡黃之船僅一千七百餘隻黃水又復停淤後幫已多阻滯  
則全漕不能抵通勢所必致宋臣程顥云治道從事而言若  
救之則須變大變之大益小變之小益事至今日未有不當  
決然變計者矣然已渡黃之船如何催挽速令回空淺阻船  
隻及尾幫江廣漕糧如何設法改運高寶運河如何得以疏  
濬將來重運如何不致滯礙是宜預籌統計策出萬全甚非  
可以苟且目前致將來補苴無術也臣受



恩深重職司所關晝夜焦思不敢隱默謹就臣管見所及與成案可援似有裨於河漕者請爲

皇上陳之一已渡黃之船宜亟嚴飭催挽設法卸運速令回空也清水現旣淺弱黃水又值消落沙停淤厚運河旱阻者幾數十里若不及早回空則黃水愈灌愈淤勢難飛渡以一千七百餘隻停留不歸之船人衆食空必難安靜且黃河以北從無軍船經冬歷春之事此時頭進幫船已入東境應由山東巡撫嚴飭沿途文武員弁併力催攢不許片刻停泊並飭運河道宣洩湖水相機灌送一面飛飭有泉各州縣實力疏

濬源源貫注專委泉河廳親往履勘不任稍形短涸一俟出  
閒卽由直隸總督飛提到壩交卸回空然臣揣度情形猶恐  
緩不及待祇有沿途駁運回空較速查嘉慶十四年東豫二  
省回空漕船曾有再運截留北倉米石之案今年東豫二省  
漕船將次兌竣回空應令毋庸歸次卽令迎頭南下將北來  
頭進幫船米石裝載代運抵通其豫省本年應運採買米石  
應令暫緩歸運一併接運南糧又查山東閘河內外額設官  
剝船三百隻民剝船三百隻原備全漕撥用此時北上船僅  
一千七百餘隻撥用甚寬或可分出此項剝船若干隻於出

開後代撥運通又楊村剝船二千餘隻亦可分提至開口外  
接撥代運仍飭原運旗丁押通交兌其接兌之船應給行月  
折耗等項銀米均應按定裝載米數程途照例核給卽於截  
卸之船扣出銀米內撥給總期及早回空得以渡黃歸次爲  
準 一高寶一帶淺阻之船所載米石宜令迅速起剝儘數  
運通也查年年江蘇出運船二千數百隻浙江出運船約千  
餘隻江安出運船六百五十餘隻此時除已渡黃船一千七  
百餘隻在後各幫尙多如寶係早經進口滯擱淤淺之船抽  
退不出似舍剝運之外別無善策查乾隆嘉慶年間成案或

截撥近省平糶或截留淮揚各屬存貯或分給回空漕船責令來年帶交此時既已無須賑糶而州縣存貯易滋拋漏明歲漕運尙屬未定亦難仿照惟有剝運一策淮安一帶現經淤淺糧船所帶划船諒已剝運聞旱路三里水路二三十里至八九十里不等每米一石挑剝蓆片等費約銀二三錢淺阻等幫計船約千餘隻共米百餘萬石計需銀三四十萬兩所費尙不甚巨查黃河口額設剝船七百五十隻本年兩江總督奏留備用江西湖南代造直隸官剝船四百六十隻此項剝船儘可備撥如再不敷仍可就近雇船備用惟尋常官

剝民剝船隻受載不過二百餘石船小無篷僅恃蓆片遮蓋  
易於滲濕偷漏聞山東等省向有民間運糧船隻土名西河  
牛之類腹大受多樓篷俱備此種最宜雇用長運抑或卽用  
東豫二省接運頭進南糧之船俟交卸後再行接運十次務  
期酌量輪轉使淺阻之米儘數北來勿再稽遲惟雇用民船  
例價較減地方官向有賠累必致畏縮雇募不力應由該撫  
轉飭各州縣將雇用實價詳請開銷亦不得勒派民船致滋  
擾累所有各船交替換載應扣應給銀米等項應責成押運  
員弁隨時核定詳報免致日久輾轉再思高寶挑剝之時適

值伏夏南方暴雨不時籬篁肩挑小船分剝勢難躲避風雨米石稍沾潮濕則以後撥運換載必致發變無用此爲挑剝時第一緊要關係尤應嚴飭督辦各員妥爲設法籌備不令致有潮濕方爲盡善至跟接進口尙未淺擱之船無論何幫概行抽退轉由鎮江運赴黃浦併歸海運以省盤剝一江廣等幫及江口一帶未經淺擱之船徑宜雇用海船運津也海運行之元代六十餘年至明永樂間會通河成其法始廢而明臣邱濬猶謂會通河如人之咽喉一日食不下咽事卽可慮因有河海並運之議嘉慶九年給事中蕭芝奏請採買

海運案內浙江巡撫阮元覆奏亦稱如萬不得已而行祇可量分額漕改爲海運可見彼時亦議及此上年御史查元偁又有上海商船買米運京之請經該省督撫奏稱有妨民食遂置不議由臣今日論之竊謂全漕悉由海運則不可而商船未嘗不可分載也江蘇買米海運則不可而額漕未嘗不可暫賫也請言其四難更陳其四善

國家河運已數百年一旦改由海運無論一切章程難以驟議第以數百萬

天庾之重忽輕試于素不相習之風濤物議人情易滋惶慮此二

難也官運必置船置船必設官費既不貲船豈猝辦元代得  
習知海線之人因以委任現在旣難其人而大洋出沒又豈  
官府號令所能約束此二難也江河挽運風火等事在所不  
免沿途員弁星羅碁布而該丁等尙或假飾捏報海中島嶼  
繁多并風色不一旣難連幫何從稽察倘更有放洋之失誰  
執其咎此三難也圖海運之便捷河工必致疎懈挑挖疏濬  
勢必不力漸成淤塞百餘年之成功數千里之水利一旦失  
之後欲河運不復可得此四難也全漕似未可輕試海運屢  
有成議而臣竊以爲暫雇商船分運漕糧則不慮此聞上海



沙船有三千餘號大船可載三千石小船可載千五百石多  
係通州海門土著富民所造立有會館保載牙行運貨往來  
並不押載從無欺騙等情關東一歲數至沙線風信是所熟  
悉不致歧誤此一善也雇船海運無需置船之費若令分載  
米石應給脚價仍可卽於短運幫船之內劃出給與不需多  
費此二善也上海商船船以北行爲放空以南行爲正載海  
船帶南貨不能滿載往往取草泥石塊壓船今令赴津之船  
每船酌準七分裝糧三分帶貨給與脚價免征貨稅自必踴  
躍從事而暫行仍可卽止此三善也閩粵南洋或有海氛而

由吳淞口迤北北洋沙磧水淺南洋鳥船斷不能入從無他慮且該商等所得運費與貿易之利相等又經官取保結必無意外之失此四善也有是四善而無四難孰便於此而議者猶以風濤爲慮查江廣境內如洞庭湖鄱陽湖長江俱稱險阻歷年軍船多有漂溺情事不獨海洋爲險且海洋節年貿易之船何以不聞消失而上年臺灣米船又何以安穩抵津雖有數船遇風駛至吳淞口岸並非漂沒是其明証又以風信靡常守候不定爲詞向來海船由上海至天津風利七八日可到至遲不過旬日從無阻滯較之河運迅速倍蓰又

謂鹽水鹽風易致霉變上年所運臺米受溼者不及百分之一今已先行開放領米旗分咸以爲完潔況南糧堅實遠勝臺米且載運不過旬日爲時不久何至遽形蒸變應請由兩江總督江蘇巡撫轉飭上海道於上海口岸傳齊各商行諭知雇船出運每官糧漕斛一石應給運價若干並准折耗米若干取具互保甘結呈明存案陸續兌開江廣等幫共船九百八十餘隻米約一百萬石內外兩月之間計可兌竣卽令該商等出具領運米數清單承認交兌其抵津時應請於倉場侍郎二人中分一人前往督收嚴禁經紀人等不得稍有

需索等弊俾該商等不至苦累以肅政體再由楊村剝船撥  
運赴通其應給該商銀兩應先於上海給領一半其餘一半  
俟運津交兌後核明運米數目按照補給卽於江蘇直隸酌  
款墊給再由部撥歸款並嚴禁吏胥剋扣中飽等弊務令實  
數歸商不致該商裹足不前若該商等奉行妥速應請照上  
年臺商運米之案擇其尤爲出力者酌給職銜以示鼓勵至  
江廣幫船身重大恐未能由丹陽運河運至海口卽飭將江  
浙等幫已經截卸之船於出瓜洲口時交兌替運抑或雇船  
剝運總在該督撫察看情形妥協辦理如果行之有效將來

全漕運京時酌分百餘石交商代運未必非漕運中並行不悖之一策也 一明年請暫停河運將本年新征漕糧酌分海運餘悉徵收折色以資治河兼可治淮治湖而永利漕運也查利運必先治河而河漕則斷難兼治現在高寶運河亟須大加挑挖況洪澤湖屢經黃水灌入湖底逐漸淤高將來必不能多蓄清水刷黃濟運關係甚大卽山東微山等湖亦爲開河蓄洩要區近聞亦多淤墊雖每歲有冬挑之例而爲時甚暫疏濬仍淺所以每逢漕船進閘均需剝運是湖河俱宜預爲熟籌以資永利若非暫停河運寬以歲月斷不能專

心并力湖河通治爲一勞永逸之計是以康熙年間停運治河行之久有成效爲百世不易之理而今日在工諸臣未有以此申請者以未知京通倉貯情形則不敢議停河運以大工費用浩繁則不敢議通治湖河且現當河漕兩礙之際更不敢議置漕而治河也臣查京通各倉貯米石爲數有餘本年奉天河南碾買米石陸續可到加以新漕已渡黃者約一百二三十萬石其餘浙江江安江廣各幫或剝運或海運必令抵通豫東漕糧仍可照常征運則倉貯已屬充裕若干本年新糧內儘江蘇浙江附近海口各州縣徵收本色米一百

萬石或一百五十萬石交兌漕船運至黃浦仍由商船海運  
抵津撥運交倉則

天庾更屬充盈其餘江蘇各州縣及有漕各省概令折色約計不  
下七八百萬兩在百姓仍屬惟正之供未嘗少加而於工需  
大有裨益本年冬季即可開徵陸續起解亦無緩不濟急之  
虞在民間得存此項米石日食益裕惟州縣折征漕糧每米  
一石應征銀若干應俟秋成時由督撫察看糧價情形核定  
數目奏明辦理並由該藩司將奏定折色銀數出示通諭各  
地方暫行折徵並嚴飭各州縣照數通解司庫彙解工次如

有加征勒指等弊立即嚴叅懲辦至停運旗丁仍照減運年分津貼成案辦理其篙舵水手皆係無業之民道光二年江浙兩省係由各地方官查明籍貫每人酌給盤費制錢二三干文備文押遞回籍由本籍出具收管各結並曉諭暫令歸農辦有成案本年折徵省分卽於本年各幫歸次時應由該督撫轉飭查照辦理計一州縣應兌之船多者百餘隻少者數十隻每船十人以每名制錢三千計算每縣至多不過需銀三千餘兩冬漕既係折色各州縣卽將每年應給各幫兌運雜費以之安插此項人等尙有節省惟諭令各幫俟明歲



冬漕開兌時仍聽此項人等到次幫運不必另易生手致起  
爭端此一年中河運既停計節省運費各項銀七十二萬餘  
兩米二十二萬餘石足敷海運脚價而徵收折色銀兩即可  
全濟工需費用既足歲月亦寬不特江南湖河可治卽東省  
湖河均可一律疏濬應於本年漕船辦竣後由該河督等預  
籌湖河全局次第興工實力僱辦務使河漕並治永資利賴  
一酌雇海船裝運督辦高寶劄運催僱東境挽運宜

欽派大員督理也現在淮南一帶駐扎漕運總督一員南河總督  
一員兩江總督一員江督總理地方事件河督專司全河漕

務均係兼轄惟漕督職司漕務向來押運尾幫北上今既高  
寶阻滯黃河以北聲氣恐不能通其由江南東境直抵通州  
綿亘二千里雖有山東巡撫直隸總督而相距較遠實有  
鞭長莫及之慮且淮安夫挑船剝東境饋運交替以及上海  
籌辦商船載運均係權宜辦理尤須因時變通道府各員恐  
亦未敢專政應請

欽派公正通達大員協同該管督撫會議妥協於海口河道上下  
往來不時稽察庶責成專而策應靈矣以上各條不揣樛昧  
縷晰詳列恭候

聖明採擇

勅下各督撫速議施行以臣愚昧之見通盤核計如此辦理滯漕  
既可北來河道乃克專治減運費以爲海運之腳價而不致  
疲商折糧價以爲疏濬之工需而毋庸籌款目前得權宜之  
便將來有永賴之安今日之計似係不可緩者勢值萬難未  
可稍事拘泥必須破除成例酌量變通於事方克有濟若徒  
畏難苟安總以仰仗

聖主洪福遂畢乃事則其弊不至不可收拾而不止實非臣之所  
敢知也越十日又

奏言爲再陳雇商分運及折漕治河變通章程以期盡善無弊

仰祈

聖鑒事竊查本年河道淤塞漕運阻滯仰廑

聖懷宵旰焦勞無微不至臣受

恩深重具有天良竭慮殫思不敢隱默已將酌量變通漕河並治

湖河情形於前摺內縷陳仰蒙

聖明洞鑒惟暫雇商船及酌折額漕條內尙有未經備述者再爲

皇上陳之竊維臣前議暫雇商船海運者誠以河道旣阻重運中

停河漕不能兼顧惟有暫停河運以治河雇募海船以利運

雖一時之權宜實目前之急務舍此別無良策輿論亦屬僉同而任事諸臣初議未敢及此者固以風濤之險盜賊之虞在在可慮且旗丁運官等素未經歷海道恐其未能押運似屬難行以臣擬測其故皆不係此特以事屬創行萬有一失物論不能不歸咎於定議之人且事後恐有賠累辦理不善商情易致沸騰更懼身爲怨府臣思凡事有利卽有弊任事者但當與其利而杜弊不可恐有弊而廢事其間斟酌盡善惟在當事者之權衡安能因噎而廢食上年高堰決口淹溺村莊仰蒙

聖恩軫卹無非蘇民困惜民力休養生息俾元氣長此充周夫東南爲財賦之區頻年有歉薄本年清口過船多夫繯挽至今起剝尙有滯漕二百萬石船運車挽日需數萬人竣事尙須數月以後堤堰挑挖各工用力尙無底止固屬計工給價然以細民力作於寒暑風雨之中疾疫不時耕種或輟未得休息其所以勞民力者至矣亟當留其有餘紓其勞而帑費不省暫雇海船分運則民力逸而生氣益舒現據江省先後咨送本年二三月內覆奏各摺到部仰見

聖諭煌煌垂詢剴切而諸臣覆奏始終含混無一著實之語籌議

已及半年計仍不出剝運者其故有二一則慮商船到津難以交卸也素聞旗丁歷來運漕到通交卸時經紀等皆資其津貼而商情良懦向不習見官吏已多畏縮一旦聞令代運代交必增疑慮臣以為如明歲雇募商船海運應令兩江總督江蘇巡撫專委一二廉潔幹員先期於上海地方傳齊商行船戶剴切諭明每官糧一石給運腳銀若干淨照漕斛兌交無論正耗及二五耗米均按漕斛計數實兌即令該委員監兌按船給發各商實運米數執照仍照臣前議取具各商承運米數甘結并令存委員手嚴禁吏胥等不得與商船交

涉滋弊兌清後仍令該委員親身押運抵津時分出倉場侍郎一人並請

派臣

部堂官一人同赴天津按照官給執照米數漕斛兌收如有

經紀刁難勒指准該委員咨送倉場并分咨戶部衙門從嚴懲辦一切交代事宜由該委員一手承辦經紀人等不得向商船過問其應給商船脚價銀兩每漕糧一石需銀七錢向聞該處行用以制錢七十文爲一錢按折核計每石只需銀四錢一二分是海運之脚價甚輕斷不可稍有尅扣應亦由該委員具結承領親交該商等按數實收庶需索之弊可除



而商情踴躍偕來也一則海運旣行恐漕運員弁及旗丁水手難以安插也有漕省分辦漕各員各有所司而漕標尤其專職一旦暫停河運前項人等似屬無所事事不知商運旣行漕糧衙門差務自簡費用自節而例定養廉俸工等項仍可照常支給況當河湖通治大工需人孔多漕標員弁或可暫行酌揀數員撥歸河標聽候差委員弁旣不致閒散而工次亦可多收得人之助似屬兩有裨益且一俟湖河普治之後員弁等仍可照常河運永無阻滯以視現在之辦運喫力勞逸迥殊其津貼旗丁按照減歇之例辦理安插舵工水手

人等援照江浙成案給與盤費歸籍之處臣已於前摺內聲敘矣夫海運之說由來已久查有元一代全由海運初歲運四萬石後增至三百餘萬石其道里遠近載在元史甚悉明初河海並運永樂十年以後會通河成始由河運然猶三年海運一次宏治間邱濬奏請於無事時通海運故道與河漕並行一旦河漕少有滯塞此不來而彼至嘉靖間胡禎請通海運以佐河漕之急他如梁夢龍王鼎沐等疏述海道里數不一而足所言均班班可考我

朝雍正年間藍鼎元亦奏稱今之海道已爲坦途舟航安穩與

內河如一轍海運在今日確乎可行等語是彼時已有此論  
嘉慶年間諸臣疏請者更不乏人然猶需造船設官雇負熟  
悉海線之人故其時以為費巨勢難因輟其議此時雇商帶  
運為費既省仍可暫行即止而經歷海洋更如輕車熟路利  
運便捷莫過於此何不可行之有但臣更有請者海運雖無  
意外之虞而防禦尤須計出萬全應請當上海交兌時由該  
督撫先期咨照浙江提鎮水師營出哨招寶錢陳一帶地方  
江南提鎮水師營出哨大小洋山會於馬跡山東鎮臣出哨  
成山十島會于鷹遊門以資彈壓護送不獨海洋永靖即商

船偶有失風等事亦可藉以稽察似覺更爲周密至酌折額漕一節說者以爲百姓完糧日久似難遽行改折且此次改收折色亦恐百姓嗣後皆援案不肯完納本色多有窒碍查漕運全書內載凡漕糧題准改折將該府州縣應徵改折米數及酌定價值刊示曉諭不遵者指叅又漕糧遇有改折其隨漕輕賚席木贈截等項例應按數折徵又起運漕糧正米一石例有耗米并給軍行月贈耗等米如遇改折一例按照時價折徵又漕糧改折只許按價徵收如仍借兌漕爲名濫行科索者卽行叅處各等語載在冊籍各省皆知又查額漕

折色順治康熙雍正乾隆年間均經行之有案而江蘇之清河阜寧宿遷桃源海州沭陽贛榆嘉定寶山九州縣安徽之寧國太平旌德英山四縣江西之瀘溪一縣湖北之通山當陽通城三縣河南之祥符等州縣均因距水次寫遠奏准永遠徵收折色官爲採辦兌運久經遵行各在案其徵收折色銀兩乾隆年以前多係因災改折價多不逾二兩至各省永遠徵收折色者係按照月報糧價加以牙行運腳折耗等項其折價則自三兩數錢至四兩數錢不等悉歸民戶攤徵此係歷年報部成案並非創始且於惟正之供未曾加增臣伏

思明歲通治湖河不得不暫停河運故臣前議除豫東照常徵運外江浙漕糧暫雇商船海運一百萬石或一百五十萬石增益倉庾其餘各省應徵漕糧爲數孔多旣不應全緩帶征而各州縣倉廩無多亦未便令徵存暫貯惟有將此項米石按照時價暫收折色以濟工需毋庸另行籌款實爲目前一舉兩得之計惟在該上司善於奉行旣不病官又不累民以歸妥協至改收折色酌照市價由該督撫奏定藩司出示曉諭不許科索其折征期限應請稍寬蓋漕旣改折地方糧石充裕勢難尅期出糶易銀上兌若必令如限完銀未免迫

促所有此次征收折色應請本年十月起至次年四月止勒  
限埽數全完不准絲毫拖欠如此則限期既寬民力自裕工  
需亦可無誤其隨漕輕賚席木贈截等項亦應折征併數彙  
解協濟工需如各州縣仍借兌漕爲名濫行科征抑或於此  
次折征時欲豫留將來勒折地步於奏定折價之外加重科  
派該督撫立即從重叅處勿稍姑容以上二條總在各督撫  
實心實力勿計一己之利害而忘

國家緩急之要圖勿徇屬吏之私情而失當時權宜之至計應  
仍請

旨飭下各督撫速議施行奏入

上命與軍機大臣同對予又極言仰蒙

宸斷飭江蘇督撫等籌辦十月

奎照

署工部左侍郎

六年丙戌正月海運沙船攢泊江蘇黃浦計船一千五百六十二隻起運漕白正耗各米一百六十三萬三千餘石不爽時日悉抵天津八月十三日

諭曰本年試行海運係協辦大學士尙書英和首先陳奏詳查定議及沙船受兌開行風帆順利現已全數抵津迅速竣事英和著加恩賞用紫韉仍著交部議敘以爲實心辦事者勸是時西



陞有警又

奏言竊臣連日面奉

諭旨以回疆滋事

命將籌兵臣跪聆之下仰見

宵旰焦勞無時或釋臣受

恩深重夙夜思維不安寢食於公餘恭閱

欽定新疆識畧攷其山川道里及乾隆年間用兵事宜通盤籌畫

意見所及不揣冒昧敬爲我

皇上陳之查回疆地處天山之東南自喀喇沙爾西抵喀什噶爾

幅員寬廣繇歷四千餘里自乾隆二十四年

天戈撻伐歸入版圖分建八城官兵駐守原以因地制宜不求變俗  
使各城星羅碁布互爲聲援而回人懷德畏威數十年來納  
賦交糧與腹地編氓無異當時

廟謨深遠原可長治久安迨日久承平相習而玩又派往之辦事領  
隊及侍衛章京人等或意存見小子女玉帛嗜慾紛營又役  
使回人自恣威福往往激成事端數年前卡倫侍衛被戕後  
卽未振作去年永芹緝捕張格爾旣失之籌畫未善而巴彥  
巴圖貪功深入復殺戮汰劣克家屬又失之輕舉妄動以致

辱

國喪師一死不足以塞責現在外夷蠢動邊衅不清皆不肖官員有以啟之也目前之勢自非大加懲創不足以壯

國威而申

天討臣查新疆南北相通路除自烏魯木齊至土魯番係安設軍

臺大路可通車輛外其餘山僻小徑僅通馬行者其道有三  
一自伊犁正南踰木素爾嶺可至阿克蘇一自伊犁東南渡  
空吉斯河踰納喇特嶺可至喀喇沙爾一自伊犁西南渡納  
林河踰善塔斯嶺可至喀什噶爾近日伊犁調派之兵自由

正南前進東南一路係土爾扈特及霍碩特游牧現值軍興未便騷擾伊等地界其西南一路係布魯特游牧現在汰劣克尙未就擒未便入其巢穴而將來攻圍吃緊之時亦應從此堵禦以絕賊人之逃竄其地水艸是否足敷駐牧似宜預爲準備又溯查乾隆年間用兵惟葉爾羌一城勞師久駐其餘各城多半傳檄而定回人素性恇怯愚而易制今南路各城敢于聞風煽動者益以張格爾係伊等故主子孫素所崇奉究之人數衆多似難概予駢誅<sub>臣</sub>意大兵一面進剿一面諭知伊犁將軍長齡于伊犁回子伯克中擇其明白曉事素可

信任者許以重賞酬以官職派令前赴各城剴切曉諭以  
殲厥渠魁脅從罔治之意俾其照舊當差安堵無恐各城辦  
事大臣加意撫卹各城既定賊勢益孤然後專力於喀什噶  
爾一城以大兵由葉爾羌境或大河沿前往制其東進以勁  
卒由伊犁西南邊其歸路自不難一鼓就殲也用兵所急尤  
在後路之糧餉臣卷查戶部檔案新疆所存之糧儘足敷用  
卽所需餉銀除遵

旨于甘肅藩庫籌撥十萬兩解赴伊犁另摺具

奏外臣現酌擬於就近省分再撥若干陸續運交甘肅藩庫存

貯備用亦俟另摺公同具

奏似此源源接濟不至掣肘足以上慰

聖懷又查乾隆年間西路用兵內地督運糧餉歸陝甘總督辦理

關外督運糧餉歸哈密辦事大臣辦理此次撫臣鄂山現署

陝督呼應較靈而哈密辦事大臣恒敬歷任府廳司道曾在  
軍營出力長於折衝禦侮督理後路是其專責似可勝任前

蒙

訓示楊邁春作為後勁實佩

成算燭照幾先卽日武隆阿來京亦可面稟

聖謨授以方畧而頒發

欽差大臣關防時似可仿照前奉

諭旨提督以下受其節制之例將回疆各城自辦事大臣以下聽

其調遣而伊犁為新疆根本大學士長齡久歷戎行嫻于軍

旅深悉南北兩路情形足資鎮馭武隆阿督師回疆尤當與

伊犁將軍彼此照會使聲勢聯絡更可迅速奏功矣是年署

都察院左都御史次孫

錫祉

吏部帶領引

見以六部員外郎即用八月九孫

錫疇

生奎耀

出九月

奎照

調工

部左侍郎十二月因戶部接據民人呈請開採房山縣銀礦

奏交直隸總督查辦奉

旨調理藩院尙書不必在

內廷行走

編丙辰年至是年四月應

制詩爲賡揚集

七年丁亥五月奎照調兵部左侍郎六月因失察家人私議

增租爲佃戶所控奉

旨拔去花翎降爲二品頂戴補授熱河都統仍留內大臣之職七

月履任是月七孫女生奎照出九月



孝穆皇后奉安禮成

寶華峪工程鞏固奉

旨賞還一品頂戴並花翎仍交部從優議敘十二月薩克達夫人

卒是月年班回京是年刻恩福堂試帖詩鈔

八年戊子元旦

賜書帖

命赴南河查勘要工二月

奎耀

婦高佳氏卒三月回京仍赴熱河

七月授寧夏將軍到京喘疾復作奉

旨具摺請假開缺調理九月

孝穆皇后陵寢地宮內水浸革職併革奎照奎耀職同繫獄籍沒

家資爰書以

寶華峪動工時後山石中見有水滴因係廢槽其時僅面陳無

礙引應奏不奏例比擬大辟奉

旨改為發往黑龍江充當苦差

命二子隨行並革錫祉即補員外郎

選定自癸丑至是年七月古今體詩為恩福堂詩鈔十二卷

九年己丑二月到齊齊哈爾寓于木城北門外四月以薩克

達夫人柩尙在殯命錫祉等卜日葬於長營錫祉聘戶部郎

中恒文女十月寄書家婦為之授室是年作卜魁城賦更號

曰晉叟

十年庚寅九月長曾孫女萱格生錫祉出旋殤

十一年辛卯三月十四日

賜環二十七日攜奎照奎耀起程五月初八日到京在

圓明園道旁稽首老病疲癯二子扶掖以謝入城寓毛家灣養

疴二十一日奎照

賞翰林院編修奎耀

賞候補六部筆帖式次日錫祉

賞六部筆帖式六月二十日奎照授國子監司業七月

命奎照偕散秩大臣侯裕寬致祭青海扎薩克郡王沙克都爾為

奎耀聘額駙武勳王揚古利之五世女孫為繼室九月鄉試

揭曉錫社中式第一百六十五名舉人十月移居十剎海側

李廣橋新宅十二月奎照差竣回京是月次會孫女同格生

錫社出後三歲殤

編戊子十月至是年五月古今體詩為卜魁集

十二年壬辰二月奎照授理藩院右侍郎四月吏部照例

題准復還錫章正三品原蔭五月奎照教習庶吉士授正藍旗

蒙古副都統九月

奎照

調工部右侍郎旋調刑部右侍郎授

泰寧鎮總兵兼管內務府大臣十月十孫

錫綬

生奎照出旋

殤

十三年癸巳二月

錫章

廕生及歲以文職用籤掣太常寺典

簿上學習行走

奎耀

補戶部筆帖式四月

錫祉

補禮部筆帖

式十二月三孫女字武備院卿鍾

靈

之子太學生

宜振

為室

十四年甲午二月十一孫

錫第

生

奎照

出

奎耀

授詹事府右

贊善四月十二孫

錫爵

生

奎照

出後三歲殤十月

奎耀

授翰

林院侍講十二月

奎耀

轉侍讀

十五年乙未三月四孫女字慶豐司員外郎慶德之子太學

生錫疇為室四月會試揭曉錫祉中式第八十四名貢士

殿試二甲一百八名

朝考入選改庶吉士九月初二日

龍泉峪大工告成奎照在工彈壓

賞戴花翎是月鄉試揭曉錫章中式第五十九名舉人八孫女治

格生奎照出是年刻恩榮疊唱集九月作石氏受姓源流紀

畧勒之石

十六年丙申四月錫祉散館授職編修五月奎照調京營石

翼總兵六月署正黃旗漢軍副都統及門英侍郎瑞以刁公

岩園居贈是夏入山題所居曰觀頤山墅七月奎照授鑲紅

旗漢軍副都統八月錫祉授詹事府左贊善旋充

文淵閣校理九月三曾孫女洋格生錫祉出後三歲殤二十六

日夜

圓明園殿廷不戒於火奎照率兵撲救

賞加三級又授總管內務府大臣管理

清漪園等處事務十一月錫祉授詹事府右中允奎照授工部

右侍郎兼管錢法堂事務五孫女字熱河都統嵩溥第三子

候補筆帖式

昆聯

為室是年得翁覃溪先生自記家事為之

刊行

十七年丁酉五月

奎照

授都察院左都御史鑲紅旗漢軍都

統

錫祉

授國子監司業六月九孫女招格生

奎照

出七月

奎

照奉

旨著在軍機大臣上學習行走

賞還掛甲屯舊園改名承暉因移居焉十月六孫女字前兩湖總

督嵩

字

第四子候補筆帖式

昆載

為室十二月

奎耀

授詹事

府右庶子是年刻恩福堂筆記二卷制義一卷



十八年戊戌四月奎照管理咸安宮官學樂部充

武英殿總裁七月充崇文門副監督八月授禮部尙書管理太

常寺鴻臚寺事務錫章迴避籤掣光祿寺行走十一月奎照

充崇文門正監督是年刻何義門先生小集

十九年己亥正月二十日奎照奉

旨著無庸在軍機大臣上行走繳還園居子移居于家二月大考

翰詹奎耀改官員外郎籤掣刑部五月錫淳考中繙譯筆帖

式在內務府月官處行走

右 先公自爲年譜終于己亥之冬蓋自是年夏時抱小恙已倦筆札也庚子春漸得加餐客至清談無間四月開七表作詩遣興及門諸公復以詩文相投贈 先公意頗樂之適逢

孝全皇后之喪 奎照 奉

命總理喪儀

奎耀

以外弟德誠任刑部侍郎迴避改官兵部事會

蹉跎未得奉觴稱慶而入五月來飲食大減每日處分家事骨瘦神臞不能久坐至六月初八日已不食數日矣忽撰聯句書贈徐星伯儀部觀波磔之妙不異平時方謂神明未衰

真元可復孰知竟以是爲絕筆耶初十日巳午間啜茗飲少許命家人扶掖以興坐既定奄然而逝嗚呼慟哉事

聞

天子軫念舊勞

恩加三品卿生榮死哀庶幾不朽惟是先公受

三朝眷遇國家之事知無不爲而戒滿持盈不言温室卽燕間之際

亦從不露端倪故密勿論思

奎照

等無由知而載之祇以

國史例當立傳不敢無所敘述因檢此編以擬行狀至先公

翰墨久已流播藝林古今體詩自卜魁集後近年山居之作

名曰植杖集亦大半膾炙人口更無俟奎照等一一稱道

先公平生服膺蘇文忠公則是譜之傳豈僅與施元之王宗  
稷輩相頡頏已哉奎照奎耀稽首頓首恭記

門下士徐松填諱



皇清誥授光祿大夫 太子少保兵部尙書



右都御史兩廣總督頭品頂帶

賞戴雙眼花翎世襲一等輕車都尉世職

晉贈太子太師兵部尙書

諭賜祭葬

子謚敏肅顯考厚山府君年譜

府君姓盧氏諱坤字靜之號厚山先世居涑水

縣後徙涿州高祖諱

振裔

馳贈文林郎甘肅

莊浪縣知縣曾祖諱

大成

誥贈光祿大夫祖

諱秉健 誥贈光祿大夫父諱士瑚 誥贈光

祿大夫本生父諱士夔 賜贈光祿大夫曾祖

以下皆以府君貴晉贈如其官

乾隆三十七年壬辰

府君生府君兄弟二人皆本生祖母張太夫人

所出長為先伯父奉政公諱州庠生官至河

南下河同知次即府君以九月二十七日亥時

生於涿州里第時先大父光祿公無子賜贈公

篤於友愛即以府君為之嗣是年先曾叔祖莊

浪公諱

秉彝

由雄縣教諭保舉知縣選授甘肅

莊浪縣命本生祖貽贈公挈眷偕往因隨任至  
莊浪

乾隆三十八年癸巳

府君二歲是年莊浪公引疾歸先是甘省方有  
西監報賑之例當事者咸思漁獵貽贈公密言  
於莊浪公曰巨獄之興不旋踵矣違衆則見嫉  
於通省狗衆則害延於身家盍潔已以自全乎  
莊浪公是其說尋稱病歸不數年而西監之案



果起人以是服馳贈公之先見歸里時經瓦亭  
驛府君患痘勢甚險無處延醫馳贈公已隨莊  
浪公先行留張太夫人及僕婢在後張太夫人  
見不可治將棄之會有村嫗來視塗酒漿遍患  
處痘遂大起得痊謝以金不受曰此兒非常人  
也

乾隆三十九年甲午

府君三歲是年馳贈公自莊浪旋涿州

乾隆四十年乙未

府君四歲

乾隆四十一年丙申

府君五歲

乾隆四十二年丁酉

府君六歲從塾師授小學

乾隆四十三年戊戌

府君七歲

乾隆四十四年己亥

府君八歲從塾師授經書



乾隆四十五年庚子

府君九歲

乾隆四十六年辛丑

府君十歲隨先大父母之山西徐溝縣署時祖

姑丈蔡公

必昌

宰徐溝邀與偕行遂受業於李

石農先生李諱

鑾宣

為山右名宿後官四川布

政使

乾隆四十七年壬寅

府君十一歲自山右還涿州適李石農先生公

車北上仍受業於其門

乾隆四十八年癸卯

府君十二歲

乾隆四十九年甲辰

府君十三歲是年習五經畢授左氏史記諸書

兼學詩句

乾隆五十年乙巳

府君十四歲是年祖姑丈蔡公必昌宰安徽涇

縣邀先大父攜府君往遂受業於方約齋先生

方爲皖省宿學治經有根柢一見府君深器之  
乾隆五十一年丙午

府君十五歲是年始學爲制藝有同學者與府  
君篝燈夜讀漏三下同學者欲就寢府君起而  
掖之曰我與若皆寒峻所賴以慰親心者獨此  
數卷書爲奮昂地耳我憂夜短君顧無同情耶  
某起而謝方聞之益重府君

乾隆五十二年丁未

府君十六歲是年自選有啟禎讀本

乾隆五十三年戊申

府君十七歲

乾隆五十四年己酉

府君十八歲隨先大父歸涿州

乾隆五十五年庚戌

府君十九歲先母張夫人來歸兩淮石港場鹽  
大使對廷公之女今江西布政司庫大使瑞昭  
公之女兄也

乾隆五十六年辛亥

府君二十歲補州學附生是年先大父光祿公  
幕遊關中卒於寶雞縣客館府君聞訃哀毀骨  
立尋迎櫬葬於祖塋事先大母解太夫人敬養  
有加本生祖勉贈公見而歎曰吾可以慰吾弟  
於地下矣

乾隆五十七年壬子

府君二十一歲受業於王乙齋先生諱

天祿

後

官福寧府知府

乾隆五十八年癸丑

府君二十二歲是年山東丁都轉延地贈公至  
署勦理鹺政瀕行府君請歸期地贈公曰汝通  
籍吾始歸耳自是益瘁於學十一月不孝端黼  
生

乾隆五十九年甲寅

府君二十三歲應順天鄉試中式一百八十一

名舉人座主爲都察院左都御史諸城竇公光

蘄兵部侍郎長白玉公保太常寺卿後官直隸

總督桐城方公維甸房師爲內閣中書後官武



昌府知府介休劉公錫五是年姑丈王公樞官

江西新昌縣知縣迎馳贈公自山左至署

乾隆六十年乙卯

府君二十四歲課徒於里門

嘉慶元年丙辰

府君二十五歲禮闈報罷課徒於都門吳衣園

太史家

嘉慶二年丁巳

府君二十六歲是年居於里門

嘉慶三年戊午

府君二十七歲是年居於里門授 不孝端黼 書

嘉慶四年己未

府君二十八歲會試中式六十一名進士座主

為吏部尚書後官大學士大興朱文正公 珪 左

都御史長沙劉公 權 之 戶部侍郎今官大學士

儀徵阮公 元 內閣學士後官步軍統領滿洲文

公 寧 本房師為翰林院侍講學士黃岡李公 鈞

簡 撥房師為翰林院侍讀學士今官大學士吳

縣潘公世恩殿試三甲

賜同進士出身改翰林院庶吉士

嘉慶五年庚申

府君二十九歲次子端仁生

嘉慶六年辛酉

府君三十歲散館引見改兵部主事職方司

行走是年寓於宣武門外之下斜街

嘉慶七年壬戌

府君三十一歲是年堂派在本司副主稿府君

自爲諸生究心經史不專以雕組章句爲長凡  
史傳中名臣言行深通治術體用賅備者必  
一丹黃標識之及官部曹於朝章掌故靡不熟  
悉條貫其時京寓中四壁蕭然炊煙屢斷府君  
不以爲意也

嘉慶八年癸亥

府君三十二歲是年堂派本司正主稿

嘉慶九年甲子

府君三十三歲是年補授職方司主事

嘉慶十年乙丑

府君三十四歲迎臆贈公自江右歸就養於京

寓

嘉慶十一年丙寅

府君三十五歲是年臆贈公自江右初歸先伯

父奉政公亦自山左始旋一門之內骨肉團聚

蓋自癸丑以來咸以家累幕遊四方至是始獲

祿養昕夕承歡後每與端黼等語及斯事未嘗

不涕零也

嘉慶十二年丁卯

府君三十六歲爲

端黼

娶婦孫氏前貴州安順

府知府孫公

升長

之女

嘉慶十三年戊辰

府君三十七歲是年司中有某弁以疎防案咨部議處例應降調府君已定稿矣有堂官某公力議禡職飭易稿同官未能決次日呈稿府君仍執原議某公作色曰爾自以爲熟於例耶對曰遵例耳不敢云熟也如某弁疎防例止降調

若褫職則事有重於此者未審又何以處之某  
公語塞尋出座謝府君曰君言良是吾特敬君  
之直也卒從原議

嘉慶十四年己巳

府君三十八歲是年陞授職方司員外郎

嘉慶十五年庚午

府君三十九歲是年府君與同年任公

蘭祐約

立箭社每下直則與二三同志校射寓齋挽強  
命中爲營弁之所不及後建節封疆到處閱伍

弁兵優劣俱不能稍事欺飾蓋府君講求有素  
凡一切營陣形勢及軍火利器俱已洞悉曉暢  
故見之於施行者確有成竹也

嘉慶十六年辛未

府君四十歲是年隨 圍木蘭較射布靶

賞戴花翎

嘉慶十七年壬申

府君四十一歲是年陞授職方司郎中

嘉慶十八年癸酉



府君四十二歲是年二月京察一等引 見奉

旨著交軍機處記名以道府用十月奉

旨補授湖南糧儲道時貤贈公以春秋高不樂遠涉府

君請就養弗許迺單車就道馳赴湖南留

端黼

等侍養於京寓

嘉慶十九年甲戌

府君四十三歲是年押運北上抵臨清奉漕帥

檄以新漕緊要馳回本任卽聞張太夫人訃信

府君雞斯徒跣卽日交卸戴星北歸

嘉慶二十年乙亥

府君四十四歲二月抵京寓與先伯父奉政公  
持服治喪葬張太夫人於祖塋

嘉慶二十一年丙子

府君四十五歲三月服闋赴部引 見奉

旨補授廣東惠潮嘉道時兩廣制府爲前大學士蔣公

攸銛

府君抵粵蔣公深器之一日偕司道等往

見送至屏外蔣公指二堂公座目府君曰此座  
不久屬君矣好自爲之以副

聖上特達之知也惠潮民俗强悍地方有司率多姑息

遷就府君至以三事飭守令勤聽斷懲奸蠹省

株累不任事者立請於大府撤回省垣下車閱

月而吏民交知儆畏是年爲端續娶趙氏前

四川榮縣知縣及菴公女也

嘉慶二十二年丁丑

府君四十六歲是年委員拿獲會匪邱文栢等

二十餘名並飭和平趙令辦理投首會匪三百

餘名先是惠潮所屬多土匪拜會結盟恣爲民

害懦者無以自存遂被脅出貲聽從入會有司  
慮釀巨獄輒隱忍不以上聞府君曰是宜有區  
別方無枉縱彼會而不匪者愚民也當令其自  
首免罪餘皆論如律自是各屬會匪皆以次置  
法而被脅者爭相投首全活甚衆又咨會鎮營  
於海口塘汛實力堵緝嚴拿接濟禁土匪之外  
竄卽以絕洋盜之內窺詳請大府悉如議行七  
月爲端仁娶婦任氏前杭嘉湖道任公蘭祐之  
女也九月馳贈公卒於京寓府君聞訃一慟幾

絕卽日自粵馳歸

嘉慶二十三年戊寅

府君四十七歲三月抵京寓秋八月與先伯父  
奉政公扶櫬歸涿合葬馳贈公於涑水祖塋  
嘉慶二十四年己卯

府君四十八歲服闋奉

旨補授山東兗沂曹道八月抵任值張秋決口府君奉  
檄防堵晝夜搶護往來河壩又以沿河被災居  
民撫卹給賑督飭印委各員挨戶編查不辭勞

瘁凡閱五月而工竣聞桐城張君

同惠

項大令

立本

有幹才亟延之入幕詢利弊理文案張時  
爲人作書記項方以他事挂吏議府君獨禮遇  
之曰二人皆以鯁直忤世吾不以徇衆失國士  
也後張果依府君而終項後起爲山左廉吏

嘉慶二十五年庚辰

府君四十九歲是年奉檄赴河南儀封大工管  
理東壩分局八月恭讀

仁宗睿皇帝哀詔府君以郎曹舊員曾蒙

特達之知隨班哭臨淚如縻縷十二月奉

命補授湖北按察使二十七日迎摺北上又奉

命補授甘肅布政使

今上御極之初府君於浹旬之間迭蒙

恩遇擢至藩司識者知

天心之將嚮用矣北上時分局中餽千金爲贐卻不

受

道光元年辛巳

府君五十歲正月十四日抵京詣

宮門 召見三次奏對稱

旨陞辭後於三月十七日抵甘肅奏接印日期奉  
硃批知道了慎勉爲之欽此時陝甘制府爲今大學

士威勇公長公 齡 一見深加委任府君遇事匡

勸直言無隱甘省地瘠民貧極累之缺歲有攤  
捐州縣致虧之由職在於此因請於制府籌款  
生息歲得息銀萬兩卽以給累缺之應攤者至  
今稱便十月奉

命護理陝西巡撫印務二十五日行抵咸陽受印視



事 奏鄜州等六州縣被水被雹各村莊應於  
來春借給口糧以資接濟奉

硃批候旨施行欽此是年迎解太夫人就養藩署

補 補州學附生

道光二年壬午

府君五十一歲正月挑濬涇陽縣龍洞渠及華

州方山等河二十一道檄同州府知府鄂公勳

董其事又請以鄂調補西安府奉

旨允行三月交卸撫篆是時西寧口外野番偷渡河

北插帳打牲制府親往督兵相機驅剿例行事  
件均由甘藩就近代 奏府君以二十一日回  
任視事儲糗糧選器械集芻菱飛挽餽師而軍  
儲以裕文縣地震委員妥爲撫卹傾圮房屋均  
如例給予修費 奏奉

硃批覽奏可憫另有旨欽此八月奉

命補授廣西巡撫先赴陝西署理巡撫印務九月十  
五日行抵壽陽 奏接印日期奉

硃批已有旨調汝陝西巡撫矣接奉諭旨後卽接任

理事不必來京請訓欽此府君具摺 奏曰臣初

任封圻深恐措施未當可否

准令於清釐地方要件後進京 陛見一切得有遵

循實深忭幸奉

硃批如現無緊要應辦之事可於封印後來京陛見  
若難分身卽不必前來欽此并於途次奉有迅查

南山情形之

旨因檄陝安道嚴如煜督率文武分投查勘覆 奏

畧曰臣以南山攸關緊要諄飭各員認真確查

現在山陽包穀於未雨之先業已成熟摘收其老林陰坡收成較晚雖未能一律飽滿亦尙不致青空并查山內廂廠皆有富商爲其業主今糧價中平照常工作無須借給資本惟近山濱水各廳州縣乏食貧民應請撫卹一月口糧坍塌民房照例應給修費已分別緩急次第辦理報可又 奏蒲城渭南二縣徵收地丁錢糧實在情形其畧曰 臣 查錢糧絲毫爲重原不容於額外多征但如平色火耗實係應加之項紙張車價

裝鞘之費亦在所必需若概從裁革有司勢難  
賠累必致別滋弊端若明立限制示以定數似  
屬於正賦有加且難保不於所定之外又有浮  
收臣以爲官之所徵須限以定制民之所納仍  
循其舊章陝西年款年清從無拋欠卽此輸將  
恐後之情正可驗其官民相安之實若仍其故  
常禁其太甚似已足昭公允而杜煩苛其或有  
橫征巧取者臣等卽據實叅辦以懲官邪先是  
署撫那文毅公於查核陝西賦役案內 奏奉

諭旨俟盧坤到任後悉心妥議至是議覆具奏奉  
旨允行封印後遵

旨入 覲是年長孫長生生

道光三年癸未

府君五十二歲正月抵京詣

宮門 召見八次

上垂詢陝西吏治情形奏對稱

旨二月旋陝西受印任事府君自上年護篆時沿途  
諮訪周察利弊接見屬吏詢事考言無巨細必

得其實并密札道府直隸州於所屬賢否開具  
切實事蹟隨時密稟又令州縣各抒所見何利  
應興何弊應除用以覘其才識其或有習於奔  
競以聲氣爲攀援者府君一意裁抑之不避嫌  
怨而向之恂幅無華十年不調如陝安道嚴君

如煜

漢中府何君

承薰

輩皆於落漢中覘其操

尚獎拔而倚任之復以陳文恭公所訓地方官  
耐勞苦禁擾累二條專札刊行諄諄教戒及是  
回任又甄別其太甚者數員時府君與蔣相國

書曰關中吏治非不可挽回惟抑奔競以求實效乃目前第一緊要關鍵蓋指此也四月閱伍於省垣旋赴延綏行次延川親自祈雨卽日迭沛甘霖端午奉有藥錠之

賜六月紫陽盩厔二縣先後被水委員撫卹九月赴漢中閱伍由寶雞縣入南山查勘情形週歷幾二千里時外間議者多以南山老林爲漢唐以來未開之山墾荒非便易於叢奸府君因於途次自爲論曰南山介雍梁荆豫之中袤延數千



里自古以來世治則闢世亂則荒徵諸史冊歷  
歷可考也昔秦伐蜀開金牛修棧道南山始闢  
漢高之入漢中實由於此後轉巴蜀之粟以成  
帝業南山之通長安者曰郾閣曰垓南曰堂光  
曰圍谷曰子午谷成帝時公乘興等訟京兆王  
尊曰南山羣盜備宗等數百人爲吏民害尊於  
二旬之間蠲除賊亂民反農桑夫曰反農桑則  
舊爲農桑可想也東漢建寧三年李翕著有郾  
閣頌永平六年鄯君通褒斜道碑內有稻禾天

殘之句是兩漢時南山儼畿輔矣獻帝時張魯據南山之險歷建安章武至建興十年武侯因褒斜之木作棧道棧閣其他山谷林木則皆作諸圍以增守險之勢晉魏以後藉南山定南北界唐初平五谷其後通巴蜀之路如池荷青泥駱谷十八盤子午江口乾佑清陽諸處驛傳往來客邸酒墟芻秣米蔬之屬皆取給山中則唐以來開闢之明驗也宋迄南渡據興州爲蜀口南山東連金商憑爲秦蜀之塞歷金元至明天

順成化二百餘年荒蕪不治荆襄流民劉千斤等得以盤踞其間屢勞剿撫後僅於金商下游添設州縣并建鄖陽府治而南山阻奧未盡闢也其後流賊之患遂爭據爲巢穴我

朝重熙累洽南山日闢乾隆間添設孝義寧陝留壩三同知嘉慶間添設定遠同知道光元年添設塽坪通判流民墾荒附籍爲氓者不下數十萬戶南鄭城固洋縣漢陰等處其地平曠多種稻田此外層巒疊嶂鱗次齒列悉皆樹藝之區曩

時所謂老林今已什去八九惟五方雜處習俗  
不同生聚之時急宜教訓此正今日之要務耳  
盜賊者饑寒之所迫也富足者禮義之所興也  
小民保有室家自食其力無流離失所之虞夫  
亦何樂而爲盜上之人教其積貯以備凶荒教  
其雍睦以安耕鑿編查保甲以聯其屬設立義  
學以啟其蒙此所謂因其勢而利導之也論者  
狃於元明以來之南山而未目擊今日已闕之  
南山無惑乎因噎而廢食也尋以勸立社倉及

變通營制兵額各事宜 奏奉

硃批妥爲商辦會議具奏再降諭旨欽此十月頒到御筆仲秋七日幸萬壽山玉瀾堂賜宴十五老臣賡歌圖墨刻一分十一月 奏酌籌息銀津貼攤捐

及歲修工費其畧曰陝省各項攤捐歷有年所均係咨部立案委無浮靡萬難刪減瘠苦之區籌辦實爲支絀又同州府所屬之華州華陰縣倚山臨渭峪河十有餘道爲山水入渭所經沿河堤岸例由民捐捍禦難期得力查有嶽廟生

息銀可酌借十二萬兩發商生息爲每歲累缺  
攤捐及二州縣隄防工費於吏治地方兩有裨  
益奉

硃批依議妥辦欽此歲除

賞福字鹿肉全分是年第二孫豐生生

道光四年甲申

府君五十三歲正月先母張夫人卒於署二月

命

端黼

扶輿歸里先母歸府君三十餘年共歷

艱辛迄貴顯猶操作如寒素時解太夫人春秋

高每思鄉味先母必手自烹飪以進綜理內政  
區畫悉協從未以瑣屑關白府君也三月各屬  
以修復水利告成詳請覆勘先是府君以雍州  
之田素稱沃野據百川之上流河渠灌溉漸就  
湮塞當事者諉爲緩圖必至失其利而受其害  
因檄各道府認真督屬同時舉行旋據陝安道  
嚴君如煜以所屬漢中興安山田疏濬泉流及  
咸陽藍田鳳翔隴州汧陽華陽六州縣各以開  
復水田畝數詳請覆勘自數百畝至數千畝不

等此外著名河渠溉田最廣如咸寧之龍首渠  
長安之蒼龍河涇陽之清冶二河蓋屋之澇峪  
河郿縣之井田渠岐山之石頭河寶雞之利民  
渠華州之方山河榆林之榆溪芹河均一律深  
通官民捐辦其非濱河處所并無舊渠可引者  
則令民製造水車遞相挹注計是時勘實開復  
水田十一萬九千餘畝府君因札飭各屬曰社  
倉之設通有無而濟豐歉法良意美宜古宜今  
本部院莅陝以來刻以民食爲先務檢查社倉



舊案知陝省捐輸之議創自前部院圖而建倉買貯定於前督院岳其時既有捐輸又經買貯各屬社倉咸多充裕迄今將及百年民欠未還者屢奉豁免因公動用者買補未足而閭閻捐輸又復寥寥截至道光二年奏銷止已缺額六十餘萬石是社倉一項幾致虛設關中山路崎嶇鮮通舟楫設遇歉年本地既無可糴之糧外販又乏轉運之便專指常平官倉實恐難於博濟况社穀散在四鄉社長主之就近借還易於

取攜不僅荒歉有備卽常年春貸秋償無往來  
搬運之勞少胥役追呼之擾以視常平倉已爲  
便利而較之以重息稱貸於人者所省更多在  
豐年有力之家輸之甚易而歉歲乏食之戶得  
之則生上不致有費 國帑下可以周恤民艱  
誠政治所宜先地方之切務也本部院前經飭  
司通行查辦並面諭各廳州縣一律開誠勸諭  
如有願捐者不拘色樣不論多寡聽其自便並  
以民情難與慮始可與樂成各廳州縣中或各

鄉不能遍舉須擇其易行者先行數鄉俟有成  
效各鄉再仿而行之俾令相觀而善踴躍急公  
不得稍涉科派致滋擾累嗣據漢陰廳呈報該  
廳捐職理問陳瑛捐輸稻穀一千石並建倉修  
路等情經本部院據以入 告恭奉

諭旨以該職員陳瑛好義急公洵堪嘉尙加恩賞給  
五品頂帶以示激勸等因欽此又蒙於現在勸捐  
社穀奏內奉

硃批必應辦理之事貴在詳慎妥實勉爲之欽此均

經恭錄行司轉行在案現聞各屬遵照勸捐者甚不乏人而稟報情形者僅止數處此事固不能期諸旦夕亦斷不可再有因循乃聞有以難辦爲言者更有欲移社穀于城者大抵因陝省社倉廢格已久各屬止知其弊未悉其利不究奉行之不善輒謂窒碍而難行是直以私意擾撓也夫社倉始於朱子宋時曾下其法於諸路閱今已數百年我朝雍正年間九卿本朱子之法覆加議奏定有條目如果奉行者實力從

事歲歲借還源源生息則社糧不患不多接濟  
不患不廣今乃息穀無存本穀併缺其咎安在  
各廳州縣身膺民牧於此等必應辦理之事既  
當其任義不容諉或今昔情形不無少異從前  
條約何件尙宜變通現在社倉若干社穀若干  
刻下如何勸捐如何存貯並此外有無推廣之  
處務期詳慎妥實具詳以憑察奪嗣據孝義興  
平等三十七廳州縣共報新捐社穀十一萬一  
百餘石又據富平醴泉耀州同官寧陝三原宜

川安塞延長寶雞郿縣南鄭褒城城固西鄉寧  
羌榆林葭州朝邑白水蒲城紫陽白河平利石  
泉商南山陽鎮安雒南長武邠州洛川綏德洋  
縣興平三十五廳州縣以修復書院添設義學  
籌備膏火銀數章程詳請核覆立案自是百廢  
具舉而地方咸知振作矣又查南山佛坪地方  
距盩厔三百餘里距洋縣二百餘里最爲南山  
扼要處所 奏請設撫民同知一員巡檢兼司  
獄一員并以漢中鎮陽平營守備一員經制外

委一員額外外委一員西鄉營把總一員及陽平營馬步額兵一百六十名均請移駐佛坪以資彈壓奉

旨允行時西嶽廟五鳳樓燬於雷火 奏明勘估向例陝西城工亦由嶽廟生息項下動支府君另片 奏曰五鳳樓爲觀瞻所繫固屬應辦之工第較城垣之攸關保障者究屬有間似應先儘奏修之城工次第辦理再將五鳳樓工程另估與辦奉

殊批依議欽此陝西舊有賞卹陣亡鄉勇銀十五萬

九千餘兩經前撫方公

維甸

聲請緩發事歷多

年遂有奸胥串囑冒領之事其實在死事之家  
屬他徙無存莫沾實惠因 奏請停止給發仍  
飭各地方官將嘉慶八年以前陣亡鄉勇按名  
造冊入祀昭忠祠勿稍遺漏以慰忠魂奉

旨如議是年

賞養正書屋全集一分

欽定春秋左傳讀本一部端午



賞藥錠一匣歲除

賞福字鹿肉全分

道光五年乙酉

府君五十四歲四月先大母解太夫人卒於署

五月扶櫬歸里附墓解太夫人於涑水祖塋

道光六年丙戌

府君五十五歲廬於涑水祖塋六月命

端黼

等

讀書於大房山七月二十一日奉

上諭前任陝西巡撫盧坤現有交辦事件並非奪情

起用著卽行衣來京陛見毋稍遲緩將此諭令知之欽此二十三日馳詣 圓明園

宮門 召見七次

諭授機宜并奉

命於起程時歸省先塋再行就道府君叩頭謝二十  
五日奉

上諭新疆逆回滋事業經調派大兵剋日剿辦一切  
應用軍需糧餉馱載等項事宜最關緊要前已諭  
知鄂山揀派明幹道府大員妥速籌辦前任陝西

巡撫盧坤熟悉陝甘情形著馳驛前往會同鄂山  
總理一切應如何派員籌辦及口內口外如何分  
段經理之處督率總局司道會商妥議具奏一面  
督飭委員及地方官隨時妥速籌備務期源源接  
濟毋得短絀遲悞欽此八月初二日府君由涿起

程端黼

隨侍九月初一日馳抵甘肅是時逆裔

張格爾已據四城悉其精銳屯於喀什噶爾將

以窺阿克蘇揚威將軍長公齡及叅贊兩大臣

統領滿漢官兵三萬七千餘名均奉

諭旨先會於阿克蘇大兵進剿卽以阿克蘇爲後路  
總糧臺烏魯木齊都統英侯惠會請以所屬糧  
石就近撥運足敷大營供支

敕下會議咸以爲便旋奉

諭旨務須於大兵雲集之先籌備三月之糧運至阿  
克蘇存貯復准英侯來咨以該處僅有駝隻七千  
不敷轉運此外玉門以西臺站之需車馬者在  
在告急府君因與鄂制府議曰今大營所急者  
口糧口糧所亟者駝運烏魯木齊儲糧雖裕然

距阿克蘇尙三十二站大營官兵所集約五萬  
餘人每日需糧五百餘石每二石用駝一隻日  
運五百餘石卽應用駝二百五六十隻必每站  
安駝五六百隻始足供一往一還以三十二站  
核計共應需駝一萬六七千隻加以關內外各  
臺站尙應需駝萬餘除烏魯木齊已雇駝七十  
隻此外尙需二萬有餘若以此項駝隻剋期購  
備撥解出關卽以內地之兵餉軍火器械等件  
配運前往於烏城糧運旣不虞有遲悞而各項

軍需亦不虞有短絀矣制府深以爲然當將安  
臺設站及派員襄理各事宜會同馳奏卽請  
勅下山西購駝六千隻陝西購駝四千隻隨於涼州  
途次截留餉銀十二萬兩委員立限如期購辦  
續據甘省州縣報獲駝一萬二千有奇又奉  
旨賞收阿拉善王進駝一千并酌調雅蘇臺官駝四  
千及山陝所購共二萬六千有奇而大營糧餉  
始源源轉運矣又請以伊犁糧石徑由冰嶺運  
赴阿克蘇尤爲便捷堪以協濟經將軍議覆奉

旨允行因與鄂制府條議章程十一事由驛馳奏  
卽於十月初十日馳抵肅州總局先是揚威將  
軍奏大營後路糧臺請以府君前往督辦尋奉  
旨無庸前往仍駐肅州是時制府駐於蘭州總局其  
哈密烏魯木齊托克遜吐魯番喀喇沙爾庫車  
伊犁阿克蘇所設糧臺卽由各城將軍都統大  
臣督員就近綜理而皆以蘭肅二局爲總滙二  
十七日 奏烏魯木齊糧運核實查辦一摺奉  
硃批所奏甚悉汝二人係朕特簡之人朕亦深知汝

二人公忠可靠是以授此重任務宜和衷共濟成此大勛一切出納實心經理斷不可存避嫌遠謗之心欽此又奉

上諭各路糧餉車駝等項雖分段管理而總局專設肅州如有糧臺應辦一切事宜務當隨時咨商總局會同奏辦庶不至各行奏請致有分歧也等因欽此十二月 奏報各路征兵全數出關及撥解口外駝隻二萬有奇先後運至京餉六百萬兩十五日頒到



御書福字并荷包銀鏤瓜果等件各半分是年十月  
先伯父奉政公卒於河南任所府君聞耗痛哭  
欲絕奉政公自爲邑丞洵升河廳清操自勵不  
肯詭隨嗣因曉暢河務受知大府甫經擢用卽  
捐館舍而府君自莅肅局軍書旁午昕夕焦勞  
每至漏盡更闌猶呵凍握管草檄裁書累數十  
紙不少休及聞豫中凶問勞瘁之時益以哀痛  
鬚髮始蒼白矣

道光七年丁亥

府君五十六歲二月大兵進剿府君與鄂制府  
奏請

勅部續撥餉銀以資接濟並以托克遜爲烏魯木齊  
糧運首站請飭臬司方載豫前往督辦奉

旨允行三月會議覆 奏部駁各款先是上年十月

內條議章程十一事續准戶部咨開除請撥陝

西庫貯錢文以平市價及添設臺站夫馬馳遞

軍報暨大營後路酌駐官兵三條均照議准又

軍火器械一條應由兵工二部核議外其餘七

條均行議駁奉

旨勅令商覆至是與將軍會 奏奉

上諭此次回疆用兵遠在口外一切軍行駝載供支等事原與腹地不同前經戶部以鄂山等所議軍需各欸多與定例不符諸欸議駁當降旨令該署督等會商長齡等體察情形妥酌辦理茲據諸欸確覈分晰陳奏朕詳加披閱如烏魯木齊辦運大營軍糧脚費等項及關內關外供支哈密調撥駐防官兵口糧一欸此項應需撥銀若干動碾麥麩

若干遽難截數著糧運事竣再將烏魯木齊前後撥解銀兩用欸及安西肅州等州縣動碾倉麥並伊犁協運兵糧各費一併分別報銷又兵丁加增口糧一欸甘肅食物昂貴口外經行戈壁買食愈難東三省兵丁既於例價口糧外按日加增所有各路調集征兵著照東三省一律給發口內日給銀一錢口外日給銀一錢白麩一觔以示體恤又官兵騎馱馬匹出口籌給草料一欸此項出口行走馬匹官爲採辦草料及抵營後分別留防日給

乾銀進剿日給馬料之處前已准令照辦著於事竣後將採買草料實價及留防日給乾銀細數覈實報銷又買補缺額營馬備調一欸各營調赴軍前馬匹一萬二千有餘自應預行買補以備凱旋時續調現據查明甘肅各屬牧廠孳生之馬逐年撥補各營例倒馬匹外僅有應行出羣馬一千七百餘匹儘數撥補尙不敷額著先發例價支各營酌買十分之六七俾免缺額俟軍務告竣撤回原馬歸營卽以此項酌買馬匹爲常年撥補之用勿

任虛糜又僱運車駝請給守候回空等價一欸該署督等既係援照舊案辦理着仍照例給發其守候回空例准臨時奏請亦着准其酌給半價至軍需項下買備各物現值軍興諸物騰貴自係實在情形着准其照案辦理核實報銷又雇募護臺民夫一欸係爲沿途慎重防守起見現在大兵進剿營壘日移後路糧餉尤關緊要着准其援照川楚成案大臺募夫七十名小臺募夫四十名以資防護又頒給征兵皮衣皮帽並預備賞需牛羊茶葉

等項一欸除皮衣皮帽前已准其頒賞所需銀牌亦經由內庫發交備賞其牛羊茶葉等項本係例所不准姑念回子暨布魯特隨營効用者在在均資其力該將軍等體察同情較賞給銀兩尤爲鼓舞着准其以此項備賞不得另立賞號名目又酌定程站里數一欸口內口外小路崎嶇陡險且有戈壁間阻若悉以百里爲一站似多窒碍著照所請自肅州出關後凡運送軍火兵餉等項由驛站行走者仍以百里爲一站如無驛站處所由軍台

滾運者按程核算不計里數若有一百四十五里之戈壁以一站改爲兩站給與腳價其口內遇有崇山峻嶺溪河間隔處所斷難日行百里者准照例核減以七十里爲一站其餘仍照常辦理以昭核實欽此五月頒到

恩賞藥錠丸散是時大兵收復四城惟張逆潛逃卡外尙在稽誅府君以大兵卽日凱旋遵

旨先行示禁凡帶兵官弁毋得私携婦女幼孩並以關外邊徼物力維艱請



勅下各城大臣查明過兵處所應納賦課有可量爲

體卹者由各城大臣 奏請

恩施奉

硃批朕已見及候旨施行欽此七月服闋奉

命補授山東巡撫尋以辦理糧台

恩加太子少保銜仍着部從優議敘八月奉

命調補山西巡撫卽於謝

恩摺內另片請撤肅局以節糜費奉

硃批所奏是欽此十月查明蘭肅二局承辦出力人

員 奏請鼓勵并以蘭州總局改爲報銷總局  
計此次回疆用兵先後奉撥軍需銀共一千一  
百一十六萬五千兩陝西制錢三萬串遵照部  
議由蘭肅二局支發者統歸蘭局報銷其分撥  
口外各處銀兩卽由各處將軍都統大臣自行  
題銷時那文毅公奉

命出關辦理善後事宜適至蘭州因將遵辦報銷章  
程合詞具 奏府君卽於十二月十九日由蘭  
州起程赴京是年 端黼 以抱疾命先歸涿州

道光八年戊子

府君五十五歲正月以首逆就擒

賞給頭品頂帶二月二十六日抵京詣

宮門 召見十次

上垂詢軍需事宜甚悉  陞辭時

上曰山西營伍平常兵力軟弱該處界連秦豫戰守  
操防均關緊要必須認真訓練有備無患

訓諭者再三府君叩頭謝三月十三日行抵太原

奏接印日期四月以吉州豐鎮等二十九廳州

縣糧價太昂請酌借倉穀以平市價又天鎮右  
玉靈石臨汾大同等縣應買歷年平糶及借碾  
兵米穀石請緩採買以裕民食奉

旨允行頒到

恩賞藥錠五月 奏山西解駝赴肅員弁及籌辦駝  
隻出力人員請一體量予鼓勵奉

旨着照所請六月 奏賀

受俘禮成審結文水縣民李得全等京控一案七月  
奏校閱省城滿漢營伍奉

硃批知道了認真整飭不可稍懈欽此并請選派陝西諳練兵弁來晉教演速戰陣法奉

硃批甚好另有旨欽此八月以代州大茹等村秋禾被雹及解州郭家等村民居被水委員分投撫卹奏請仍復尙嵐州歲試考棚以順輿情奉旨着照所請八月奉

命調補廣東巡撫頒到

御製受俘禮成七言十二韻墨刻一分并審明孝義縣甲頭王文治等京控該縣侵剋駝價一案另

片 奏曰晉省爲五省通衢差務絡繹物價昂  
於他省向遇雇備過路車馬各州縣多歸里下  
承辦借資民力各出分釐協濟差徭相安已久  
今若遽行裁禁遇有緊急差務飭役雇辦恐沿  
途紛紛拉截轉爲行旅之害且州縣廉俸無幾  
設或賠累難支恐致別滋弊端設法取巧於小  
民更有所損 臣 悉心體察似應仍其故常去其  
太甚庶不至除一弊而轉添一弊至採買駝隻  
係數十年偶有之事况有例價可領其中稍有

不敷以及喂養運送之費自應由地方官捐廉貼補嗣後不准藉口舊章再令里下出資津貼以除民累奉

上諭另片奏銜途差務情形着照所議辦理欽此九月甄別地方試用人員并請復設陽曲縣主簿專司水利裁甘桃駟驛丞歸栢井駟兼管十一月以省標教演速戰陣法已臻純熟并飭令大同太原二鎮一律操練所演抬炮火藥鉛丸等項歲需銀二千有奇請以辦銅帮費項下提借

銀三萬兩發商生息每年得息銀三千有奇以  
二千四百兩歸於藥鉛項下支用餘者提歸原  
欵奉

硃批甚好另有旨欵此先是撫標左右兩營及太原  
城守一營共兵二千餘名向例應給月米有閏  
之年止放本色米四月有零無閏之年止放本  
色米五月有零餘月均放折色每名每月僅給  
折色銀三錢晉省菽粟昂貴甲於他省兵丁養  
贍不足難期得力府君因與司道籌議將太原



忻州代州保德州所屬各州縣額征兵糧餘剩  
米六千三百餘石撥給省標三營支放本色所  
需運腳卽於河東道庫硝價項下提銀三萬四  
千兩交商生息作爲運費 奏上奉

旨允行十一月二十九日交卸撫篆十二月初一日  
由晉起程十六日詣

宮門 召見八次

上問晉省民情何如對曰民俗勤儉猶有唐魏遺風  
惟重利負氣錙銖之細釀成命案總由地方官

不能教化臣當引以爲愧

上曰近來州縣太不堪者少無用者多對曰州縣有  
懈弛者亦有勤能者有種老吏以不聽訟爲息  
訟奸頑得志善良無以自全刁風由此起若  
趨向一端以民事爲已事民風可望轉移臣在  
晉八月毫無一點效驗

上曰聖人云三年有成何況凡人何能求速效又  
諭曰抬炮易演否對曰先須鍊膽膽氣壯卽有準  
上曰廣東秋審火器傷人之案太多何以人皆有鳥

鎗對曰潮州濱海前明時倭寇侵掠是以村民多有鎗炮相沿已久其風氣好鬪強凌弱衆暴寡重利輕生不知禮義

上曰如此惠潮道甚要緊對曰誠如

聖訓非廉明勤幹之員不能勝任

上曰汝到任後斟酌之又

諭水師雖非汝管洋面上須留神水師人才難得對

曰人才本難水師尤爲難得但能出洋緝捕卽是好的臣前任惠潮時督臣蔣攸銛統馭水師

最爲嚴肅清查海口嚴禁接濟

上曰這是根子又

諭曰閱

實錄十幾年上有夷人搶竊炮台之事成何事體關係外夷不可一味從寬有當示以兵威者不妨示之以威對曰澳門租與夷人本是弊政

上曰起自何時對曰起自前明中官

上曰由來已久明朝弊政甚多可恨可憫可傷又

諭曰官員中有應行甄別者據實辦理陸辭後行至

涿州館於南臯店度歲頒到

恩賞福字鹿肉全分府君自擢甘藩後屢蒙 召見

敷陳甚多

端黼

不獲詳紀惟此次係府君親筆

恭錄者具存篋中故謹臚列焉

道光九年己丑

府君五十八歲三月初六日抵廣東 奏接印

日期奉

硃批汝之人品材具朕無可諭官官相護畏難苟安  
外省之通病汝當一力振作始終慎勉毋負朕得

人不易之苦衷奏謝知道了欽此又附片覆奏  
嚴拿花會并禁使夷錢奉

硃批隨時認真查辦不可日久又置之於弗顧也欽  
此四月校閱本標官兵五月廣州府屬之南海三水清遠等縣肇慶府屬之高要四會鶴山等縣  
同時被水檄司道親往查勘督率印委各員先  
行撫卹頒到

恩賞藥錠六月 奏各倉屯羨穀石存貯過久應請  
先行變糶以免損耗先是廣東常平缺穀一百

三十萬餘石嗣於籌補案內已買補九十八萬  
八千餘石旋准部議以粵東另有省倉屯羨穀  
一十九萬餘石向無支用卽以此項穀石撥歸  
常平缺穀統計每石一兩應歸價一十九萬餘  
兩卽於應買缺穀價銀內劃出充餉外間以屯  
羨穀石分貯各廳州縣歷年已久紅腐堪虞且  
各州縣中有應買常平缺穀而無此項屯羨者  
有原存此項屯羨而無應買缺穀者若通融撥  
運則水陸紛歧運費尤鉅賠累必多官民咸稱

未便遂請以此項穀石盡行出糶提價報撥其  
未買常平缺穀仍按年依限買補於餉項倉儲  
兩無妨碍奉

旨允行七月 奏勘明被水州縣已經分別撫卹惟  
南海之桑園等十一圍情形較重應征銀米請  
分年緩征並修築南海三水二縣衝決圍基應  
借銀兩亦請分年帶征以紓民力奉

旨着照所請八月頒到

仁宗睿皇帝聖訓全部九月以部駁仁化縣應征屯羨



充公銀兩屢經前撫聲請豁免未邀議准復奉  
旨敕令將部駁情節逐一確查府君與司道等逐層  
細核委因屯糧過重丁力難輸並無另有情弊  
所有每年應完屯羨穀石及二十一年以前未  
完屯羨穀石并變價充公銀兩均 奏請豁免  
以除積累奉

上諭着照所請一併豁免以示體卹該部知道欽此  
尋因常平缺穀已買補一百三十萬九千四百  
餘石尙缺穀二十四萬一千八百餘石州縣依

限買補事屬易行惟地氣潮濕紅朽堪虞徒有  
實貯之名易滋霉變之患應請暫停採買俟各  
屬陳穀糶出十分之五六再行酌量買補其津  
貼銀兩仍按年提解司庫奉

旨如議蓋府君抵任之初卽訪聞州縣採買胥役視  
爲利藪民頗不便且現貯倉儲足資緩急故也  
是年除夕第三孫肇生生

恩賞福字鹿肉全分

道光十年庚寅

府君五十九歲正月親鞫新寧縣民伍亞喜京  
控伍榮撰等毆斃六命一案此案構訟數年不  
能結經府君定讞論如律三月以韶州府水陸  
通衢捕務紛繁非部選人員所能勝任奏請  
改爲在外提補要缺而以羅定直隸州改爲部  
選簡缺奉

旨交部議四月頒到

御製詩初集全部五月頒到

御製巡幸盛京詩全冊時粵東稍旱望澤甚殷府君

與制府虔誠祈禱迭沛甘霖因繪賞雨茅屋圖  
一時題詠甚衆六月頒到

恩賞藥錠七月以廣寶局缺鑄嘉慶年間錢文定例  
每鑄錢一串作銀一兩除歸還工本運費外應  
羨銀一錢六分謂之餘息嘉慶年間共缺鑄七  
年九個月零一卯經前撫題明免其補鑄而部  
中以每年約獲餘息銀六千餘兩共銀五萬有  
奇仍飭在外設法籌補因據實具奏曰伏查  
此項息銀出於按卯鼓鑄錢旣停鑄息何從生

若責令以前辦銅各員賠繳未免累中添累如  
令現任局員補苴必致官匠串通偷工減料於  
錢法大有妨碍司庫所貯悉係報部之款亦別  
無閒款可籌部臣因帑項攸關自應駁飭粵省  
則鑿空籌措委實無力事歷八年銀逾數萬未  
便仍以咨覆邀免合無仰懇

聖恩俯照乾隆年間成案免其籌補以結塵案庶於  
圓法有裨尋奉

旨着戶部議奏欽此八月第四孫壽生生九月奉

命議補江蘇巡撫二十一日交卸廣東撫篆二十三  
日由粵起程行抵清遠承准軍機大臣字寄奉  
旨盧坤着卽馳驛來京陸見欽此十月十五日江西  
吉安途次接准部咨奉

上諭盧坤着毋庸來京卽赴江蘇巡撫新任顏伯燾  
着馳驛前往肅州會同鄂山辦理軍需等因欽此  
府君恭摺具 奏曰伏念回疆甫經底定安集  
延等以窮邊小醜復敢擾亂邊陲實爲覆載所  
不容我

皇上命將出師聲罪致討指日大兵雲集不難迅奏

膚功惟是萬里行師征兵轉餉未免上煩

宵旰前此西師進發

臣從事備胥仰蒙

聖明訓示周詳凡一切糧餉軍火器械馬匹以及安

臺設站駝載運送等項悉皆遵

旨會同督

臣

鄂山籌議章程奏明

聖鑒核定施行此次自可循照次第備辦第回疆進

兵距甘省計程過遠征兵較多路經沙漠戈壁

必得多備駝載庶行兵不致竭蹶卽糧運軍火

器械一切大營所必需者轉運遲速皆係乎此  
是駝載一項尤爲目前至緊至要之務該署督  
等自己早爲籌備臣蒙

皇上特達之知受

恩深重浹髓淪肌當此籌邊緊急之時亟思從事戎  
行稍効涓埃而續奉

諭旨又不敢不卽赴新任惟臣犬馬報

主之忱時覺望雲蹠躩不能自己倘蒙

皇上有可策遣俾得仍効馳驅殫竭愚忱實不勝激



切待

命之至奉

硃批遵旨卽赴新任可也欽此十一月十八日行抵江蘇省城接印任事省城頻值歉收會歲暮頻夜不戒於火府君曰此必有放火奸徒思乘機搶掠者非厲禁不可止榜示通衢有放火者恭請

王命立斬自是火患頓息十二月初九日奉

命補授湖廣總督卽赴新任十三日交卸起程具摺

謝

恩計是年到蘇撫任僅十七日耳除夕

恩賞福字鹿肉全分

道光十一年辛卯

府君六十歲正月初七日抵湖北 奏接印日

期奉

硃批諸凡實力整頓以副委任勉益加勉欽此時兩  
淮嵯務引滯商疲當事者亟籌整飭湖廣每歲  
額銷七十七萬九千九百二十六引分運一百

二十四廳州縣而以湖北漢口爲總岸岸商勾串船戶夾帶重斤歲佔官引之半淮南又不實給運費任聽船戶夤緣爲奸且狃於封輪之例鹽船到岸非二三年不得出售及售出回課岸商恣意開銷先爲淮南分給貸息由是淮南日窘而漢岸引課日絀上年冬

上命戶部尙書王公鼎侍郎寶公興與兩江總督陶公澍籌定章程府君過江寧時會晤 欽使及陶公均言封輪非便府君抵任卽 奏請散輪

并擬於漢岸建倉奉

硃批無分畛域認真查辦建立鹽倉一事妥議具奏  
可也欽此尋奉

諭旨着督飭所屬嚴緝鄰私仍於漢岸江船聚集之  
處酌派幹員設卡稽查以杜盜賣淹銷各弊府君  
覆 奏畧曰伏查楚岸淮引滯銷其大端有二  
溯其佔塞銷路之由有內私外私之分所謂外  
私者宜昌之川私襄陽之潞私衡州之粵私是  
也距漢寫遠淮鹽難到若徒嚴各卡緝私小民

轉虞淡食今若嚴其禁令必先兼籌民食多運  
官鹽量減售價乘此裁省浮費之時成本已輕  
運售亦易縱鄰私不能盡絕梟販必漸斂跡所  
謂內私者鹽船之夾帶重斤也每年不下三十  
餘萬引大爲腹心之患茲蒙

聖訓令於江船聚集之處酌派幹員設卡稽查以杜  
盜賣淹銷諸弊實爲目前最要惟積弊已深非  
實心任事之員莫破其奸查有大冶縣知縣王  
啟炳廉幹篤實不避嫌怨已飭該員專駐江船

聚集之處設卡稽查并派試用府經歷裘惠幫  
同巡察如果認真查辦官銷日暢臣等卽當據  
實奏聞量子獎勵又覆奏查議設局收稅  
之法其畧曰臣查各省鹽課以兩淮爲最鉅各  
省銷引以湖廣爲最多湖廣銷售口岸以漢鎮  
爲最大卽將漢岸厯來積弊逐一釐剔集思廣  
采始知古人議論有可以行之於古不能行之  
於今者如明臣王守仁巡撫江西疏通鹽法於  
贛州立抽分鹽廠一事集載因軍餉不敷暫行

於贛南兩郡及接壤之袁臨吉三府其時江右軍興淮商以路梗不能挽運粵商以路近便於行銷是以設廠抽稅暫准越界仍係閩粵商鹽并非如今之私鹽也然每年抽稅不過三四萬兩所行不過二三百里爲時亦不過三二年而止今湖廣歲額七十七萬九千九百二十六引應征正雜課銀有三百餘萬兩行鹽引地有一百二十四廳州縣以所抽鹽數所納課銀所行路途已難同日而語如欲仿而行之無論商民

盡許販運有引則交課無引則交稅同時並行  
官私相雜竊恐官商先課後鹽成本必重私販  
先鹽後稅成本必輕是商人旺銷口岸私販亦  
可踵至而官鹽本重價昂私鹽本輕價賤勢必  
私鹽行而官鹽積且向來官商分地定引各有  
疆界毋相踰越無論道里遠近有應銷之引卽  
有應運之鹽民間買食無虞短絀私販則惟圖  
便已如深山窮谷長江巨湖有舟楫之需車馬  
之勞資本旣遠不如商誰肯舍近利而販遠賈



必致荒陬僻壤皆有淡食之虞若欲增設稅局  
必須建立公所添派官員繕寫之書吏不能少  
巡緝之差役必應增薪水飯食經費繁多加以  
上下數千里支河汊港在在可通若輩素非善  
類越關偷漏本屬慣常是私販之稅必致有名  
無實而官鹽之課反因此而益絀始而病商繼  
而病民終且病國臣所謂言之於古不能行之  
於今者此也况鹽之爲物係天地自然之利與  
五穀不同五穀資人力種植經年始能收取而

獲利無多至於鹽或煎或晒旦夕可成而獲利甚厚是以五穀任人負販從無商賈輻輳五穀豐盈而有意外之虞獨販鹽之徒安分者少易於滋事自古私梟爲患史冊厯厯可數所以別於五穀必藉官爲主之商爲運之立法之初監於成憲自有深意蓋利之所在害卽生焉其權必操之自上不可使其柄有所旁移彼私販者皆強橫兇暴之徒往來之處盜賊必多祇以各省緝捕嚴密尙在人烟荒僻處所潛形匿跡若

准其納稅聽其所之則凡通都大邑富庶之區  
皆可招致聚集驅之則托名納稅例準售鹽縱  
之則乘衅煽結翦除匪易總之私販之徒既不  
可使之聚衆尤不可使之聚財利愈多則黨愈  
盛害有不可勝言者非特商人滯引虧課而已  
也臣奉

諭旨飭令妥議惟有竭盡心力籌畫萬全斷不敢輕  
議更張致滋流弊計自臣到任迄今十月有餘  
不避嫌怨力加整飭將藉官行私之商人捏報

淹銷之船戶及弊混之鹽行侵越之私販有犯  
必懲無弊不除已將舊綱存積六十餘萬引將  
次售完以視歷年銷數有盈無絀卽爲暢銷明  
驗照此整飭辦理自能日有起色是歲湖廣銷  
引七十一萬有奇較前暢銷二十餘萬幾復原  
額三月 奏地方大概情形首重二事一日緝  
捕一日堤防奉

硃批汝同楊懌會均係朕慎簡之人畀以封疆重任  
望成治理務要和衷共濟隨時隨事認真經理被

除一切積習毋避嫌怨爲國宣猷勉之又勉以副朕望欽此楚北堤防向有官修民修之分官修者襄陽之老龍堤荆門之河洋堤潛江之護城堤武昌之江工金沙蕎麥灣等堤是也此外民修之堤各由地方官於秋冬時按畝派夫簽點董事督率業民自修惟荆門之萬城堤有官工民工之別關係全省歲由巡撫督防自頻罹水患民氣未蘇江陵公安監利諸州縣民修之堤無力修復被淹尤甚府君念民瘼攸關經費有常

當於查驗公安監利二路堤工時沿途咨訪甫  
議分別興修而江漢同時異漲漢黃荆襄諸州  
縣復被大水府君於洪流中泊舟東下飛檄道  
府州縣分投搶護妥撫災民時五月十八日也  
抵省後卽示諭米商照例免稅先附片奏聞  
隨飭藩司親歷查勘碾動常平以資接濟并委  
員齎銀購米運赴災區減價平糶與巡撫先後  
具奏均

報可因自爲文禱於江漢之神曰方今

聖天子懷柔百神山川效順惟神明名垂祀典肅享  
明禋兩楚民生實資保障某承

帝命建節是邦期與惠育羣黎贊襄治化乃者暑雨  
兼旬江湖泛溢荆襄千里浩淼長空田塍沒於  
洪波民舍淪於巨浸人同梗泛尸逐萍流悲深  
燕雀之處堂危甚龍蛇之起陸數百萬垂亡之  
民命數百年未有之災殃蒿目傷心仰天隕涕  
某自慚薄德忝任連圻撫馭乖方致干神怒凡  
有殃咎宜加某躬赤子無辜忍其淪落務體上

帝好生之德鑒

皇上惠下之心布露仁慈挽回造化驚濤速掣險漲  
平消施恩魚鼈之鄉奪命鼃鼃之窟俾井廬之  
復故庶渚澤之無憂老弱得慶更生禾黍尙堪  
補插爲此代民禱籲不盡悚惶伏祈來格苾馨  
昭蘇民困尋因御史邵正笏條陳災務章程府  
君覆 奏畧曰 臣等查北省本年五六月間猝  
被水災業經行司督飭諸州縣多方拯濟又經  
臣等率屬捐廉并勸諭紳商一體捐資妥爲撫



卹於地形較高之處搭蓋棚廠擇誠實者一人以爲之長編列字號分派委員周爲照料江漢二縣災民不下十萬自五月以來按口捐給錢米已有四月之久病者給醫藥歿者給埋葬現在水勢漸退有回藉者給以盤費均係印委各員率同紳耆逐棚查驗臣等仍不時察看親往密訪至各屬煮賑責令紳士自爲經理炊爨人夫卽令災民供役每日煮成之粥悉令經理紳士自先取食以杜攙和皮硝石灰諸弊惟被水

之初雖經出示曉諭令災民安心待賑不可輕去其鄉而投親傭趁覓食他方者究不能免已經通飭各屬遇有災民過境務須妥爲資送其無業可歸者卽酌令留養暫行棲止并咨會鄰省一體查辦其有地痞土棍煽惑災民乘機搶掠者隨時隨地嚴拿懲治現在地方甚屬安靜惟自冬徂春爲日正長應於散放大賑後再行酌動倉穀加以官民捐輸之項接辦煮賑三月以資糊口又覆 奏御史裘元俊條陳災務積

弊一摺畧曰臣等伏查辦理災務全以戶口冊籍爲憑必應逐戶核查方免捏冒侵蝕之弊當卽飭令藩司轉飭各州縣先選各鄉城公正紳士率同里保分段核查并將書役人等詭捏戶名包攬侵蝕諸宿弊逐條嚴禁頒發告示遍貼災區令窮黎一目了然書差人等無敢借端影射其戶口確數應領銀錢若干及設厰處所散放日期均先事一一出示俾災民共見共聞如果州縣辦理不善臣等卽據實嚴叅奉

殊批認真妥辦勿忘視民如傷之意何況已被災之  
百姓也欽此時府君與巡撫楊公懌曾再三會商  
以楚北水患幾無虛歲皆因河道湮塞堤防不  
力必須週勘情形次第疏堵始可以裕

國計而厚民生且大災之後以工代賑實於事兩  
有裨益因請以原署兩淮鹽運司王鳳生來楚  
綜理水利并估修潰缺堤工共需銀三十五萬  
九千餘兩由南北兩庫借項興修在於各業民  
名下分年征還 奏上奉

旨允行是年端午

賜錠藥全匣九月

賜新校康熙字典全部十月頒到

御製文初集全部除夕

賞福字鹿肉全分三弟端仁以是年五月卒於署端

仁之婦任氏亦相繼病亡府君軫念災區數月  
以來寢食俱廢兼以端仁不祿慈懷難釋遂患  
呃逆之症及端黼聞信馳往省視府君雖稍稍  
折慰而呃逆之症實自此起矣

道光十二年壬辰

府君六十一歲正月湖南逆猺趙金隴糾衆滋事府君自湖北馳往督師趙金隴者江華縣錦田鄉猺人也其地深處九冲與粵東八排粵西八寨環結千餘里皆猺居俗尙鬼好讐殺金隴能以祈禳神鬼事惑其衆久之遂萌逆志陰令其黨趙幅才往糾廣東散猺唐八等三百餘人期以上年十二月二十八日集金隴處并金隴自糾千人各製五色旗幟推金隴爲首分授偽

官焚劫兩河口等處營縣往捕不克飛文告急  
永州鎮鮑友智以正月初五日調集兵勇攻賊  
於長塘寨賊傾巢出拒隨掣其黨遁入藍山寧  
遠諸縣分頭裹脇巡撫吳公榮光提督海公凌  
阿已馳往會剿矣二十四日府君聞報卽馳  
奏親往督師并密陳湖北提督羅思舉久歷行  
陣堪以辦賊二月初八日行抵長沙適奉

諭旨飭調羅思舉速帶精兵一千前來會剿并奉有  
吳榮光與盧坤會面後將應辦事宜交盧坤辦

理之

諭十九日戌刻馳抵永州而是時提督海凌阿已先  
於十四日在寧遠下壩地方驅兵深入遇伏被  
戕副將馬韜遊擊王國華守備吳鑑等皆戰沒  
賊乘勢陷新田縣知縣王鼎銘死焉桂陽常寧  
諸土獠遂蠶起應賊衆號數萬府君抵永州隨  
行士卒不滿百人徵調諸路兵共九千餘名均  
陸續在途未能卽至因飭近獠村寨堅壁清野  
以待大兵時賊將北竄九嶷南奔兩粵府君曰



賊聚則易殲散則難撲當於大兵未集之先遏  
其四出勢可一鼓而擒也隨檄衡州協副將海  
福防常寧沅州協副將馬天保防祁陽降調總  
兵鮑友智防桂陽澧州營叅將黃璽防新田都  
司興安泰防嘉禾常德協副將福珠洪阿防道  
州遊擊王俊防江華叅將張應祿防藍山遊擊  
陸景哲防寧遠而以知府王鳴球知州王景章  
往來策應三月初一日金隴至新田之楊家舖  
其黨趙文鳳糾衆二千與之合將與趙幅才北

擾衡州而幅才已被常寧防兵所殲金隴未之  
知也屢攻桂陽與文鳳分股游奕初十日羅公  
思舉至永州府君以賊攻桂陽意在北竄若該  
處禦之太急必舍此而他遁不如令桂陽防兵  
佯與相持毋許角勝卽日趣羅公思舉直統大  
兵由新田中路入而令署總兵霍隆武副將祥  
福各由南北二路以兵來會并檄前派各處防  
兵咸以二十七八等日拔營前進二十六日接  
准六百里

廷寄奉有務須誘至山外一鼓作氣聚而殲旃之  
旨府君以手加額曰

聖訓如此周詳坐照萬里此賊必成擒矣二十九日  
大兵至獠頭距賊巢僅十餘里賊方驚覺會天  
大雷雨我兵乘勢直入賊四顧路絕不知所爲  
始悉其衆屯於羊泉街倚堅壁大宅爲負隅計  
我兵四面合圍賊從牆壁間鑿孔放槍以拒我  
兵會連旬陰雨火器沾濡羅公思舉晝夜督將  
士立泥淖中乘雨稍歇卽仰擲火丸火彈焚燒

大屋數十區斃賊數千人賊勢愈感四月初六日趙文鳳詣營詐降羅公佯許之攻益力初九日生擒逆子趙幅金趙幅銀逆弟趙金旺及逆之妻女并頭目趙文鳳等數百名殺餘賊二千餘名金隴改易服飾思於是日乘間遁爲我兵所擒登時格殺遺有所負小木佛而餘賊尙有數千屯據大宅垂死抗拒故金隴雖已格殺仍疑其尙存也是日未刻新任湖南提督余公步雲奉

命帶黔兵一千前來會剿府君亦以十九日自永州  
至羊泉先以捷聞奉

恩旨均先行交部議敘并奉有白玉翎管搬指小刀  
荷囊之

賜我軍益奮至二十四日轟擊已盡計先後殲賊萬  
餘無一名能漏網者二十六日馳奏蕝事奉

上諭盧坤等此番剿辦該逆一切機宜俱臻妥速且  
調度有方深堪嘉尚盧坤著加恩賞戴雙眼花翎  
並賞給一等輕車都尉世職等因欽此先是

上命御前大臣戶部尙書禧公恩盛京將軍瑚公松額來楚視師未至軍已報蕝事卽駐衡州會籌善後事宜時有廣東徭人趙仔青聞金隴之已誅也糾衆數千入楚界聲言爲金隴復仇府君於羊泉班師時曾飭總兵曾勝領兵二千名在彼防堵因商於欽使咨會提督余步雲協同曾勝前往剿辦六月初旬敗之於濠江銀江等處檻仔青至衡州磔於市廣西徭人盤均華亦以六月十九日祭旗起事將入楚界經廣西官

兵殲其衆於芳林渡均華僅以身免爲楚界防  
兵所執鞠實置於法自是楚境肅清而欽使  
已奉

諭旨馳赴廣東督辦連山排猺府君亦將由長沙還  
湖北矣九月初四日奉

命調補兩廣總督迅赴連州會商連山善後事宜時  
排猺新定府君以二十六日抵連接印卽將留  
撤兵額及編查撫卹各事宜悉心籌畫合詞具  
奏俱蒙

俞允十月初十日由連州起程行次韶州以南韶道  
楊公殿邦所獲巨盜周瘋癩等一百四十六名  
分別定擬立正典刑者共二十有一犯二十七  
日抵省城奉

命兼署巡撫十一月 奏整頓營伍請於楚省將弁  
中曾經練習戎行者酌調數員來粵訓練奉

旨著照所請歲除

賞福字壽字鹿肉獐肉全分

道光十三年癸巳



府君六十二歲正月交卸撫篆二月生擒洋盜  
頭目楊就富等由驛馳奏奉

硃批所辦迅速可嘉另有旨欽此先是越南國奸民  
陳加海與內地游匪楊就富馮生疔等在夷洋  
狗頭山糾結嘯聚嗣因乏食出巢駕駛匪船偷  
渡內洋經副將李元游擊林鳳儀等率領兵船  
駛赴夷洋交界之白龍尾迎截圍捕槍炮并施  
都司余清生擒大頭目楊就富擊破匪船一隻  
獲賊多名餘匪竄逃我兵追至青藍山又斃其

渠魁馮生疔王亞狗等炮擊匪船三隻獲船四隻陳加海率衆搶護被我水練宋敬利等追入夷洋適越南夷目亦以兵船前來會擊斬其頭目吳三狗段俚鹹等陳加海窮蹙帶同妻屬及零匪十餘人遁入荒山府君以蕝功在卽因咨會南越國王曰該匪等恃其巢穴介在外服易於逋竄今楊就富等業經我兵殲斃已盡陳加海遁入荒山苟延殘喘貴國屯目正宜乘此零匪待斃之時率領兵衆入山搜捕設尙須我兵

力該屯目卽可就近知會思勒州判轉請撥助  
蓋除惡期於務盡斯聯疆藉以永綏當亦貴國  
王之所深願也嗣據越南國王覆書及欽州員  
弁稟報盜首陳加海已經該國弋獲匪巢盡掃  
三月二十六日復由驛馳奏奉  
硃批覽奏欣悅另有旨欽此四月頒到

欽定平定回疆勦擒逆裔方畧全部閱駐防八旗官  
兵及督撫二標營伍六月製造草烏船爲誘緝  
之法時粵洋西路均已肅清惟東路惠潮一帶

盜踪時發師船至則引避草鳥船者閩洋賊艘也舵靈槳多闖入粵洋爲患因檄鎮道等仿其式造船六隻伏兵艙內使賊不疑易於搶獲至今便之七月 奏辦理猺山善後事竣先是猺人就撫後府君於善後章程內 奏請遴員入山逐戶編查是月共查得大排八處小冲一百四十處實五千一百三十八戶男婦大小二萬五千七百七十三名口每大排設猺長二名于長二名每三十戶設猺目一名其近猺漢民村

寨每寨設練總一名董率團練共二百七十二  
寨得壯丁八千二百七十八名官給器械以資  
防禦并請以綏徭同知改爲邊疆要缺佐雜教  
職一律改爲邊俸奉

旨允行時廣州肇慶二府所屬大水府君與巡撫朱  
公桂楨捐廉率屬查勘撫卹并示諭地方紳富  
一律捐輸以資民食八月奏請入覲奉

硃批暫緩來京俟十六年秋間奏請可也欽此尋奉  
命兼署巡撫印務九月不孝端實生庶母蔣氏所出

十月以越南國內訂請飭邊防并密陳預籌事  
宜奉

硃批深識大體可嘉之至另有旨欽此是月鞠盜魁  
香山四等八十餘名置於法香山四者原名方  
亞四年少無賴與匪盜侯幅滿胡振二等互相  
煽結聲勢漸張有司徃捕輒先期遁去府君密  
檄香山縣田溥副將秦賴英參將余得彪計擒  
之其黨盡平十二月 奏粵東災務勸捐賑糶  
均係公正紳士分局管理并無吏胥侵冒諸弊

又陳明抵任以來水陸節次捕盜各情形奉

硃批查拿水陸盜匪乃海疆第一要務須一力督辦  
文武有不認真用命者斷毋姑息奮發有爲者務  
當獎勵必期水陸肅清安閭閻而弭後患方爲至  
善勉之勉之以副重寄欽此歲除

賞福字壽字鹿肉麋肉全分

道光十四年甲午

府君六十三歲正月 奏議粵省鐵禁章程向  
例粵省鐵器統歸佛山鑄造非是卽爲私鑄滋

擾殊甚因請嗣後內地有輸餉開爐鑄造農器  
鍊鍋者聽從民便著爲令二月審明瓊州府黎  
匪符元興等分別定擬先是黎匪符元興引誘  
生黎因飢出掠府君檄崖州知州諸鎮往捕之  
擒符元興等事遂平三月以南海順德所屬之  
桑園圍被水後亟應修築請將歲修本款分別  
攤征以紓民力奉

硃批依議該部知道欽此四月第五孫禹生生交卸  
撫篆赴南韶閩伍鞠巨盜蒙叫化等二百二十



八名卽於途次恭請

王命立誅三十二犯五月廣州肇慶二府所屬州縣

皆大水府君於清遠舟次委員撫卹并飭藩司

籌欵酌給口糧先附片奏聞奉

硃批連歲被水情甚堪憫務要盡心查辦欽此六月

拿獲販買鴉片煙土李亞祖等訊係在逃之士

棍姚九歐寬二人開設窑口出資與販檄府縣

先藉其家奏奉

硃批查拿甚好欽此又另片陳節次查辦情形奉

硃批實力查辦斷不可聽屬員奉文了事也欽此七月 奏請將暎咭喇國貨船暫行封艙奉

硃批所辦尙妥所見亦是另有旨欽此先是暎咭喇國夷人自公司散局各自貿易事無統攝本年六月有該國夷目噉嘮嚙來粵稱係查理貿易事務當卽飭令洋商向其查詢該夷目不肯接見旋敢呈遞書函語多迷謬府君以體制攸關申明例禁俾該夷人遵守舊章反覆曉諭該夷目違抗不遵因請照例封艙將該國貿易暫行

停止以示懲抑該國向有護貨兵船例准在外  
洋寄泊嗣聞封艙之令該夷目窮感情急密遣  
兵船進口護貨實借以自衛也初七日乘潮水  
漲發闌入虎門水師提軍李公增階方因病請  
假我兵開炮轟擊該夷船放炮回拒隨拒隨行  
至初九日駛至黃浦府君一面飛章入 奏自  
請交部嚴加議處隨奉

諭旨革去太子少保銜拔去雙眼花翎先行革職暫  
留兩廣總督之任戴罪督辦一面飛飭文武調用

大船十二隻每船用大石塊十萬斤橫沉水內  
復用大木排塞水面堵其入省之路調集提標  
大師船二隻軍標大小師船六隻新會順德各  
營縣巡船二十餘隻配兵備械嚴密巡防又調  
撥督標兵丁三百名撫標兵丁三百名提標兵  
丁七百名府縣壯丁三百名整飭鎗炮在兩岸  
陸路防備其大黃滘支河派委叅將盧必沅帶  
領巡船二十餘隻在彼攔截並用大木排塞河  
面又於對岸建設木閘委都司洪發科率領督

標精銳兵五百名水師兵一百名運帶抬炮及  
劈山威遠大炮以一百五十名防守炮臺以三  
百五十名往來策應並恐澳夷西洋人爲嘆咭  
喇夷人所惑飭委副將秦裕昌會同文員曉諭  
布置一體防範所有夷船入省之路全行堵塞  
其後路在老洲崗地方亦購備大石派永靖營  
兵丁三百名令遊擊玉祿帶管一俟碣石等處  
師船駛入卽將大石堵塞河內以遏其歸並豫  
備大小船百數十隻暗藏硝磺柴草引火之物

以待火攻該夷兵船見大小師船排列數里陸路亦聲勢聯絡軍威嚴整夷目嘩嘍嘩伏處舟中進退無路惶恐悔罪懇求給牌下澳情詞俱窘府君以該夷目違禁胆玩若卽准其出口去來自由不足以懾服其心因飭洋商等嚴加詰問旋卽據該夷商伽唎哈等覆稱嘩嘍嘩係屬夷目與大班不同不曉事體兵船進口實因商船封艙保護貨物起見且該國商艚數千人俱以該夷目不遵法度爲非並無一附和之人府

君以該目既以認錯乞恩衆散商又爲籲求自  
應寬其一線逐令出口卽准該商赴關請牌於  
八月十九日將噍嘍嘍押逐出口該夷兵船亦  
於是日開行押出虎門府君由驛馳 奏尋奉

上諭此等外夷趨利若鶩其不諳例禁處不值與之  
深較朕亦不爲已甚玩則懲之服則舍之該督等  
辦理此案尙合機宜前因該督等不能先事預防  
致令該夷兵船闖入內河勞師驅逐是以降旨分  
別革職示懲今既將該夷目等押逐出口是該督

等始雖失於防範終能辦理妥善不失國體而免  
衅端朕頗嘉悅盧坤着加恩賞還太子少保銜並  
給還雙眼花翎其前此疎防咎亦難辭着仍帶革  
職留任等因欽此是月第六孫桐生生十月閱中  
路營伍至虎門出獅子大洋閱炮臺尋赴香山  
至澳門澳夷備鼓吹伏迎道左情極恭順府君  
犒賞有差咸膜拜稽顙稱謝十一月至潮州民  
扶老携幼郊迎百里外爭拜馬前父老咸相謂  
曰此當年觀察公也有恩德於吾民今亦鬢髮



蒼白矣并歷數某事某案情狀如繪府君慰勞  
之亦爲之低徊難去也十二月事竣回省 奏  
閱伍情形奉

硃批查閱認真所奏亦是另有旨欽此又奉

廷寄傳

諭澳門炮臺建自何時及洋商有無私增稅銀之事  
覆 奏曰查明史嘉靖年間先有夷人佛郎機  
入香山濠鏡澳爲市天啓元年大西洋人來中  
國亦居此澳卽今之澳夷也其建設炮臺以禦

暎夷事載邑志亦係前明時所設嘉慶十三年  
暎夷圖佔澳門迭經前督臣奏明有案該夷住  
澳二百餘年久已涵濡

聖澤與澳中民人耦俱無猜遠方寄跡孤而無援惟  
奉

天朝爲依歸亦視澳門爲世業惟暎咭喇圖佔已久  
該夷番舩僅二百餘名所恃以拒暎夷者獨有  
炮臺耳此時如拆毀炮臺驅逐番舩澳夷必滋  
疑懼且使各國夷人以西洋人爲

天朝所擯棄必致咸生鳩佔之心轉非綏靖海隅之道卽以內地海疆而論澳門爲廣東門戶本應建臺設守該炮臺雖建自夷人設遇海防緊要內地派員督同防護亦未始不可得其捍禦之力又 奏各國夷人在粵貿易原屬

聖朝懷柔遠人臣等凡遇干涉外夷事件總惟力持大體不使稍有逾違而於夷情關涉無不曲加體恤如果洋商婪索擾累必應從嚴懲辦斷不敢曲徇市儉圖利之私心上負

聖主怙冒海疆之厚澤第就現在情形而論夷商來  
粵者日多粵商殷實者無幾疲乏之商不特不  
敢私增稅課轉有跌價賤售以取悅夷人者夷  
商藉此取巧奸徒乘機交結是粵商不但不能  
駿削夷人轉有爲夷人挾持之勢夷情狡獪固  
應使其心悅誠服而挾持之端一開交結之風  
漸長所關甚鉅尤宜立法防閑至商欠夷賬向  
有着追攤賠之例雖年限稍遲仍全數歸欵在  
夷人固不虞虧折而粵商則害切剝膚當此整

飭關務之時誠宜以恤夷昭懷遠之德尤應以恤商爲裕課之源各商之私欠固應飭禁諸夷之私借亦應力除嗣後夷商回國將粵商有無尾欠據實結報其未報者卽屬私借不得一律追賠請着爲令均蒙

俞允歲除

賞福字壽字鹿肉麇肉全分

道光十五年乙未

府君六十四歲正止月命

端黼

赴京供職

奏防

範夷人章程奉

硃批所議俱妥務須實力奉行斷不可不久又成具  
文也勉益加勉欽此是月委員修築南海三水等  
處最要基圍拿獲與販鴉片梁顯業等三十名  
烟泥一萬六千餘斤置於法二月增築虎門炮  
台先是上年 奏押逐曠夷出口奉有沿海炮  
台着該督親往虎門逐加查勘之

旨當於去年校閱中路營伍時與提軍曾公勝乘坐  
西瓜小艇親往虎門逐加查勘與曾公議曰海

口情形當以沙角大角兩炮台爲第一層門戶  
南山鎮遠橫檔三炮台爲第二層門戶大虎炮  
台爲第三層門戶沙角大角二台中距海面千  
數百丈勢難及遠止堪作爲瞭望信炮南山鎮  
遠橫檔三台形如品字中隔海面止三百餘丈  
聲勢聯絡乃中權扼要之區大虎台海而雖寬  
但九十丈以外均係暗沙須於暗沙釘立木椿  
卽使潮汐盛漲夷船亦難駛入其橫檔大虎山  
後另有海道一條直達獅子洋南爲蘆灣山北

卽橫檔山之背向未設有炮台應於兩山之麓  
各建炮台一座以防其間道偷渡再查舊設炮  
位均係五千斤以下炮子及遠不過百丈以外  
年久鏽爛不適於用應共添鑄六千斤大炮二  
十位八千斤大炮二十位轟擊始期得力其施  
放之法自南山至大虎應分爲三段每台列炮  
應分上中下三路無論潮汐漲落皆足以及船  
身遇有防堵一聞沙角大角兩處信炮卽將三  
段炮位裝貯整備每出則上中下三路一齊點



放如船駛至第一段則南山先放次炮三出至第二段則鎮遠橫檔與南山三面對準各放次炮三出至第三段大虎炮台亦如之似此聯絡施放較舊制似爲周密是月新任水師提軍臣復加查勘與府君議合遂繪具圖說以聞奉硃批所議周妥之至另有旨欽此又另片奏於省城中流沙地方添建炮台以資保障奉硃批甚好另有旨欽此四月赴廣西閱伍時廣西提督陳公階平方以疊戰陣法練習士卒府君深

嘉之因議倣照連環三疊陣制令各營一律訓練五月陳閱伍情形另片奏曰疊戰陣法彷彿自宋將吳璘本古人束伍遺意今提臣陳階平所演係變化成法其體式以六十四人爲一隊五隊爲一陣一千六百人爲一旅分之則爲二十五隊每隊騎兵當先烏鎗弓箭矛弩繼之每層左右二人以次遞列末用抬炮二尊護以籐牌其應敵大致三百步以內大炮擊之百步以內槍炮擊之犄角環顧更替疊進馬隊勒於左

右乘勢衝突步隊堅壁靜待爲馬隊之接應進則轉戰而前撤則遞捲而退誠爲原野利用之法惟查山隘用兵峻嶺險崖仰攻俯擊必須隨高下之勢審進退之機臣嘗考前廣西撫臣李紱因粵西多山獠獷悍創爲連環三疊陣其法以兩人爲一疊肩隨而進三疊爲一層五層人爲一隊兩隊爲一路前一疊一人交槍伏地施放第二疊二人跪膝放槍第三疊三人站立放槍六槍齊發一層放訖各隨左右旋至隊末

次層繼進賊施一槍我放六槍山徑多者數路  
並進中路前用五子炮二尊籐牌二十人左右  
兩路各前用五子炮一尊籐牌十人如賊至一  
里以內卽放五子炮賊在百步以內則籐牌炮  
手讓出山路卽用三疊陣層層放槍如須暫退  
卽以後隊作前隊按層遞撤仍可放槍抵禦追  
兵查此陣以放槍之伏跪立取山徑上中下之  
勢進旣得宜退復便易實爲山隘用兵良法李  
紱當時征剿猺獞以此制勝臣與提臣商酌就

現在所演參以三疊陣法似更爲因地制宜奉  
硃批認真督飭訓練務收實用勉之欽此向例校閱  
賞號均有定額府君以整頓吃緊之際優者格  
外重賞劣者立行褫革兵則當場嚴懲凡衣料  
銀牌均由署內捐廉製備故兵弁沾實惠而州  
縣不擾是月 奏防黎善後章程一日查拿漢  
奸以絕煽惑二日設立墟場以通有無三日嚴  
禁越境以杜勾串四日講求水利以免荒旱五  
日籌撥經費以備緩急俱下部議行六月 端緒

掣分戶部貴州司行走七月府君左臂作痛復  
患呃逆舊症胸膈不舒飲食頓減醫者以積勞  
已久猝感風寒宜服疎解之劑八月初一日神  
氣稍倦猶力疾視稿與巡撫祁公墳商榷公事  
良久始息更服清補之藥均未見效初三日已  
刻將督篆鹽政關防移交祁公兼署甫擬拜摺  
請假病勢陡加府君自知不起因伏枕叩頭口  
授遺摺云臣北直庸材仰蒙

仁宗睿皇帝由庶吉士改授部曹擢放外任復蒙

皇上特達之知不次超擢

簡畀封疆道光六年辦理回疆軍需告戢

賞加宮銜嗣因首逆就擒復

賞頭品頂帶十二年因湖南剿辦猺匪微勞

賞戴雙眼花翎世襲一等輕車都尉迭邀

異數之榮皆非夢想所及載戴

鴻慈淪肌浹髓涓埃未効時切悚惶計惟不辭勞瘁

實心辦事以期營伍地方稍有起色東西兩省

臣已校閱將周虎門炮台工程將次就竣惟高

瓊兩鎮官兵定期九月間校閱尙未及前往潮  
橋鹽務積疲已久臣力圖整飭甫經臣奏明籌  
本收鹽官督商銷尙未辦有成效此臣所夙夜  
耿耿寢饋不忘者刻思勉竭駑鈍稍酌  
知遇於萬一孰意福薄灾生病入膏肓逝世有期報  
恩無日瞻望

闕廷不勝嗚咽臣長子端黼係附生捐納員外郎籤  
分戶部行走在京供職幼子端實年甫三歲孫  
六人長孫長生年十四歲隨署讀書餘俱幼穉



臣惟有諄囑臣子端黼勤慎當差殫誠盡職稍  
竟臣未酌之

恩遇並教育幼子諸孫矢志自立上副

生成伏枕瀝忱語無論序謹繕摺交撫臣代為恭

奏叩謝

天恩初四日子時薨逝二十四日奉

上諭兩廣總督盧坤老成練達明敏有為敷歷有年  
久著勞績前派辦回疆軍需告蕝後賞加太子少  
保銜嗣因首逆就擒賞給頭品頂戴續於湖廣總

督任內因剿辦湖南猺匪調度有方蕩平迅速復  
賞戴雙眼花翎並世襲一等輕車都尉世職自調  
任兩廣總督以來辦事認真結實可靠朕方資倚  
畀茲聞溘逝殊深軫惜盧坤着加恩晉贈太子太  
師銜兵部尙書照尙書例賜卹所有任內一切處  
分悉予開復應得卹典該部查例具奏伊子戶部  
候補員外郎盧端瀚着俟服闋後以該部員外郎  
遇缺卽補該部知道欽此是月 內閣議謚奉

御筆圈出



諭祭文

維道光十六年歲次丙申四月癸丑朔越二十四日丙子直隸總督琦善遵

旨遣坐補涿州知州蔚音芳

諭祭於晉贈太子太師兵部尙書原任兩廣總督盧

坤之靈曰

任隆節鉞巖疆資保障之猷勲著旂常懋賞重貞  
良之輔軫老成之凋謝溯篤棐以咨嗟爰考彝章  
式頒奠醑爾晉贈太子太師原任兩廣總督盧坤

端謹持躬通明練事起家詞館歷職樞曹曾觀德  
於畫正旋出膺夫繡服嶺湘直指齊魯分巡楚南  
徵臬事之陳隴右樹藩邗之業擢居開府重寄封  
疆歷七省以撫循晉連圻之總制曩者回疆振旅  
饒運精籌頭銜俾冠羣僚錫命兼隆宮輔旣而令  
嚴軍府氛息楚獠嘉虎節之宣威賜雀翎而增采  
賞延華秩績叙膚功泊乎星移百粵時閱三年倍  
殫心力以忘勞益念股肱之倚重方期矍鑠永贊  
承平忽覽遺章殊深悼悃瞻蓋臣而彌惜施卹典

以宜優特晉宮師予易名以不朽速銓郎署俾後  
嗣之咸昌史冊揚芬几筵錫寵於戲勤宣中外允  
文武之兼資禮備哀榮示始終之勿替懿茲蠲潔  
尙克歆承

年言

三

諭碑文

晉贈太子太師兵部尙書原任兩廣總督謚敏  
肅盧坤碑文

朕惟經文緯武建牙揚節鉞之威崇德報功載筆  
絢旂常之色命之祭而旣陳雕俎選爾勞而爰樹  
豐碑爾晉贈太子太師原任兩廣總督盧坤忠勤  
夙著敷歷有年初踐蓬山旋勦樞部權監司而克  
持風紀典刑名而允肅霜稜隴郡維藩聿奏旬宣  
之績灘江開府更垂明恕之譽陝東西分駐旌麾



山左右疊膺簡畀時則師命西征義符北伐迅奏  
犁庭之績邊徼無塵待酬轉餉之庸宮銜載錫方  
鄂渚拜新除之詔俄熊湘有逆命之苗雲合重圍  
翦渠魁而法伸齊斧翎飄雙暈延世賞而爵襲輕  
車遂乃重莅羊城遠持龍節夷情未達示薄懲而  
冀蓋前愆國憲克彰赦小過而仍還舊秩方深倚  
賴用資翊贊之謨忽告淪徂宜備哀榮之典秩旣  
隆於追贈恩且逮夫後昆像厥生平謚曰敏肅於  
戲樹封圻之範期三事而共勗寅恭增泉壤之光

永千秋而尙膺申錫前勞軫念式視貞珉

<p>五</p>										
----------	--	--	--	--	--	--	--	--	--	--

右府君年譜一冊 不孝端繡 學識譎陋於府君

平日立

朝持已及經世濟物諸大端不能仰窺萬一計自  
垂髫隨侍京寓以及建節楚粵常依膝下中間  
睽隔慈顏者僅五六載耳荷蒙

聖主知遇之隆不次

委任至渥至優 不孝等 生生世世頂戴

高厚難圖報稱所有府君生平事實例得上入

國史以備採擇深懼苦塊迷謬語無倫次僅就聞



ZW 21181008740832

全言

見所及吮血濡毫縷陳梗概掛漏之愆自知自

疚伏乞

當代立言君子進而教之以稍追不孝罪則不孝

等

世世子孫感且不朽

不孝孤哀子端黼泣血稽顙謹編

賜進士及第光祿大夫

經筵日講起居注官東閣大學士管理戶部事務

文淵閣領閣事

國史館正總裁稽察欽奉

學士